


*GINATAGO SA DIOS ANG
IYANG KAUGALINGON DIHA SA
KAYANO, DAYON GINAPADAYAG
ANG IYANG KAUGALINGON SA
MAO RA GIHAPONG PAAGI*

 Salamat, Igsoong Neville. Ang Ginoo magapanalangin kanimo. Maayong buntag, mga higala. Ginaisip ko nga usa kini sa pinakamahinungdanong nahitabo sa akong kinabuhi, ang maania sa tabernakulo pag-usab niining buntaga, nga makita ang maanindot nga istraktura niini, ug ang kahan-ayan sa mga anak sa Dios nga nagapanglingkod sa Iyang balay karon.

² Nanghibulong ako'g maayo sa pag-abot ko dinhi kagahapon ug nakita ang kahan-ay sa bilding. Wala ko gidahum sukad nga mahimo kining ingon niini. Niadtong nakita ko ang mga plano, niadtong human na nilang nahimo ang mga plano, namatikdan ko ang usa pa ka gamay'ng kuwarto nga nakapahiluna sa daplin, apan karon nakita ko kini nga usa—usa man diay ka maanindot nga lugar. Ug mapasalamaton gyud kita sa Makagagahum-satanan tungod niining maanindot nga lugar. Ug kita mga . . .

³ Ginapaabot ko kaninyo, karong buntaga, ang mga pagpangumosta gikan sa akong asawa ug sa akong mga anak, nga nangandoy nga maania unta niining orasa alang sa panerbisyo sa paghalad, ug niining mga semana nga paghalad ngadto kang Cristo. Apan ang mga bata atua sa mga tulonghaan, ug nalisuran nga maka-absent. Ug medyo hinayhinay nang nagakawala ang ilang kamingaw nga makapauli sa balay, apan dili gyud mawala ang among pagbati'g kamingaw alang kaninyong mga igsoon. Dili kana mawala. Aduna gyu'y butang nga paghinigalaay. Ug ako—nagapasalamat ako alang sa akong mga higala, bisan asa, apan aduna gyu'y sa kung unsang butang mahitungod sa dugay mo nang mga higala. Bisan asa man ka magkaaduna og mga bag-ong higala, sa gihapon dili kini ang makatumbas sa kadtong mga dugay mo nang mga higala.

⁴ Bisan asa man ako makaabot, kining lugar magapabilin sa gihapon nga sagrado. Tungod nga, mga traynta na ka tuig ang milabay, sa niining malim-aw og malapok nga yuta, gididikar

ko kining bahin sa yuta ngadto kang Jesus Cristo niadtong kini wala gyu'y lain kondili usa—usa ra ka lapukon nga yuta. Lim-aw pa ang tibuok niini kaniadto. Kana ang hinungdan nga ang dalan wala sa hustong lin- . . . linya didto, ang—ang dalan nga kinahanglan nga ipabiyo pa dinha, aron malikayan ang lim-aw nga ania dinhi kaniadto. Ug dinhi, daghang mga lirio, mga lirio sa lim-aw nga ningtubo.

⁵ Ug ang—ang lirio usa ka talagsaon nga bulak. Bisan pa sa lapuk kini maitanum, manglimbasug gyud kini sa paggitib gikan sa lapuk, ug dayon mogim-aw paibabaw sa tubig ug lunang, para alsahon ang kaugalingon niini ngadto sa ibabaw, aron ipakita ang kaanindot niini.

⁶ Ug ako—sa hunahuna ko, karong buntaga, nga mao kana ang butang nga nahitabo dinhi. Nga, sukad niadtong panahona, usa ka gamay'ng lirio ang migulho sa kaugalingon niini; ug sa pagkalusot niini ngadto sa ibabaw sa tubig, gibukad ang iyang mga pako, nga migawas ang gagmay nga mga gihay niini, ug gireplektar niini ang Lirio sa Walog. Hinaut nga magpabilin kining ingon niana! Hinaut nga mamahimo kining puloy-anan nga bug-os napahinungod ngadto sa Dios!

⁷ Kining tabernakulo mismo gididikar na niadtong 1933. Apan nahunahuna ko, karong buntaga, nga—nga usa ka maayo kaayong butang kini alang sa—sa usa ka gamay'ng panerbisyo sa pag-didikar pag-usab, ug ilabi na sa mga tawong tungod, sa ilang paghigugma ug pagkamatitud-anon kang Cristo, napahigayon kining tanan. Ug gusto kong pasalamat ang matag usa kaninyo tungod sa inyong mga halad, ug sa uban pa, nga inyong gitabang aron maididikar kining simbahan kang Cristo.

⁸ Ug daku kaayo akong pagdayeg, ug pagpasalamat sa kongregasyon, sa pagsulti niining maong mga pulong para sa atong buutan nga mga kaigsoonang lalaki dinhi sa iglesia, nga naghalad sa ilang mga serbisyo alang niini. Si Igsoong Banks Wood, ang halangdon natong igsoon; si Igsoong Roy Roberson, ang halangdon natong igsoon usab; ug daghan pang uban, nga tungod sa pagkamatitud-anon ug usa ra'y tumong sa kasingkasing, naggahin og mga bulan sa pagpatukod niining bilding sa paagi sumala sa kung unsa na kini daan, nagpabilin dinhi aron masigurado nga kini gitukod sa husto.

⁹ Ug sa pagsulod ko, aron tan-awon kining pulpito, mao gyud ang pagkahimo sama sa dugay ko nang gipangandoy, sa tibuok kong kinabuhi! Akong. . . Nasayod gyud si Igsoong Wood kung unsay akong gusto. Wala niya gisulti nga buhaton niya kini, pero gibuhat niya gayud.

¹⁰ Ug namatikdan ko ang bilding ug kung unsa ang pagkabuhat niini, daw sa, oh, hilabihan kaanindot. Ug karon walay igong pulong aron maipahayag ang akong gibati. Wala gyu'y paagi nga

maipahayag kini, kita n'yo. Ug, hinoon, nasabtan kini sa Dios. Ug hinaut nga gantihan ang matag usa kaninyo tungod sa inyong mga amot ug sa tanan nga inyong nabuhat sa paghimo niining lugara sa kung unsa na kini, sa paagi nga pagpatukod, sa usa ka balay sa Ginoo. Ug karon ako—gusto kong isulti kining mga pulonga. Karon, ang bilding, ingon na niana kini ka maanindot, sa sulod ug gawas . . .

11 Ang akong bayaw, nga si Junior Weber, siya'y nagtaud sa mga tisa. Dili ko makita kung unsaon pa pagpaanindot niadto kay sa kung unsa kini, hapsay kaayo nga pagkatrabaho.

12 Adunay usa pa ka igsoon nga ania dinhi, wala ko pa sukad nahimamat ang maong tawo, siya ang nagpahiluna sa sound system. Apan mahimatikdan n'yo nga bisan sa patag nga bilding nga sama niini, akó gyu'y . . . Walay mga paglanog sa mga acoustic. Napahimutang ang mga niini sa mga alkoba, sa nagkalain-laing dapit. Bisan asa ka motindog, mao ra sa gihapon, kita n'yo. Ug ang—ang matag lawak gibuhay, nga anaay mga ispeker, ug mamahimo na ninyo kung unsa mang paagi ninyo gustong maminaw. Sa niini, nagatoo ko nga ang kamot kini sa Makagagahum nga Dios ang nagbuhat niining mga butang. Karon kon . . .

13 Ang atong Ginoo naghatag kanato og usa ka bilding diin mahimo nato Siyang simbahon, diha sa mas maayong kahimtang, sulod sa mga traynta pa ka tuig. Nagsugod kita kaniadto nga yuta lang ang salog, abog sa mga ginabas, ug nanaglingkod dinhi abay sa karaang hudnohan. Ug ang kontraktor, si Igsoong Wood, ang usa kanila, ug si Igsoong Roberson, nagsulti kanako nga kung asa kadtong mga haligi kaniadto, ug kadtong mga karaang hudnohan napahimutang kaniadto sa mga salagunting nga naka-handag, nagbaga ang mga niini ug nasunog, tingali mga duha o tulo gyud ka piye. Nganong wala man kini naugdaw, tungod lamang sa Dios nga maoy nag-amping niini. Ug human nga masunog kini, ug ang kabug-at baya sa tibuok tabernakulo nagaagad niadto, pero nganong wala kini nahugno, tungod sa kamot sa Dios. Karon hinimo na kini sa puthaw ug gipalubong sa yuta, natukod na nga lig-on.

14 Karon sa hunahuna ko katungdanan nato nga siguradohon nga maayo ang sa sulod niini, pinaagi sa grasya sa Dios, nga mapasalamaton gayud sa Dios nga ang atong . . . Dili lamang kini mamahimong maanindot nga bilding nga ginaanhan nato, kondili unta ang tanan nga magasulod dinhi makita ang katahum sa kinaiyahan ni Jesus Cristo diha sa matag tawo nga ania sa sulod niini. Hinaut nga kini mamahimong hinalad nga balaang dapit alang sa atong Ginoo, mga hinalad usab nga katawhan. Tungod nga, bisan unsa pa ka maanindot ang pagkatukod niini, nga ginapasalamatan nato, ang katahum

sa iglesia mao ang kinaiya sa mga tawo. Nagasalig ako nga kanunay'ng magapabilin kini nga balay sa Dios, sa katahum.

15 Karon, sa panerbisyong paghalad kaniadto sa orihinal nga ulohang-bato nga gipahimutang, usa ka panan-awon ang miabot. Ug nasulat kini sa ulohang-bato, sa buntag nga gididikar ko kini.

16 Ug tingali natingala kamo, kaganina, kon nganong nadugay ko'g gawas. Ang akong unang gihimo, sa akong pagsulod niining bag-ong simbahan, gikasal ko 'usa ang usa ka lalaki ug babaye nga nagpaabot kanako didto sa opisina. Hinaut nga usa kini ka tipo, nga ako'y mamahimong usa ka matinuuron nga ministro ni Cristo, aron mapahiandam ang usa ka Pangasaw-onon alang sa seremonya nianang Adlaw.

17 Ug karon buhaton nato ang sama sa gibuhad nato kaniadto sa sinugdanan. Niadtong nagsugod pa kita sa unang pagdidikar sa iglesia, batan-on pa ako niadto ug, naku, siguro baynte-uno, baynte-dos anyos pa ako sa dihang gipahimutang nato ang ulohang-bato. Wala pa ako naminyo kaniadto. Ug dugay ko nang gusto nga makakita og usa ka lugar nga anaa sa hustong kahan-ayan, diha sa Dios. . . para sa Dios nga pagasimbahan, kita n'yo, uban ang Iyang katawhan. Ug mabuhad lamang nato kana, dili pinaagi sa maanindot nga bilding, kondili pinaagi og hinalad nga kinabuhi nga mao ang bugtong paagi nga mabuhad nato kini.

18 Ug karon, sa dili pa kita magdidikar, sa usa ka paghalad nga pag-ampo, basahon sá nato ang pipila ka Kasulatan, ug ididikar ang iglesia pahinungod ngadto sa Dios. Ug dayon aduna ko'y pipila ka. . . Aduna ko'y Mensahe bahin sa ebanghelismo, karong buntaga, aron basihan diha sa akong isunod nga Mensahe.

19 Ug, unyang gabii, gusto kong hisgotan ang ika-5 nga kapitulo sa Pinadayag, nga nagdugtong, gikan sa—gikan sa pito ka mga kapanahonan sa iglesia, padulong sa Pito Ka Selyo. Nga akong. . . Pagkahuman magkaaduna kita og. . .

20 Hisgotan nato sa Lunes sa buntag ang nagasakay sa puting-kabayo. Martes sa gabii. . . Ang nagasakay na usab sa itum-nga-kabayo, ug sunodsunod, ang upat nga nagasakay sa kabayo. Ug dayon ang pagbukas na sa Ikaunom nga Selyo.

21 Ug dayon sa Dominggo sa buntag, sa sunod Dominggo sa buntag, kon itugot sa Ginoo. . . Tan-awon nato unya, ipahibalo nato kini pagkahuman. Tingali, sa sunod Dominggo sa buntag, magkaaduna kita og usa ka panagtigum sa pag-ampo alang sa mga masakiton sulod sa bilding.

22 Ug sa Dominggo sa gabii niana, humanon nato sa. . . Unta tabangan kita sa Ginoo nga maabli ang Ikapitong Selyo, diin adunay hamubo ra nga bersekulo. Ug ingon niini ang ginasulti Niini, "Adunay kahilum sa Langit sulod sa tunga sa oras," tungod nianang kahilum.

²³ Karon, wala ko kabalo kung unsa ang buut ipasabot sa niining mga Selyo. Ako'y halos anaa sa utlanan na sa akong salabutan, bahin niini, sama tingali sa uban kaninyo karong buntaga. Aduna man kita'y pang-simbahan nga mga ideya nga gipresentar sa tawo, apan kana dili gayud makasabut Niini. Ug kung makita ninyo, kinahanglan nga magaabot Kini pinaagi og pagdihog. Kinahanglan ang Dios, Mismo, ang maoy Bugtong Nga makahimo niini, ang Cordero.

Ug unyang gabii mao na ang Basahon sa Katubsanan.

²⁴ Karon, sa niini, ang hinungdan nga wala pa ako nagpahibalo og mga panagtigum sa pag-ampo alang sa masakiton, o uban pa, tungod nga ako . . . nagapuyo ako karon kauban ang pipila ka higala, ug gipahinungod ko ang matag minuto sa akong oras ngadto sa pagtuon ug pag-ampo. Ug kabalo na mo sa pananawon nga nagkaaduna ako sa wala pa ako mibiya ug mipadulong ngadto sa kasadpan, mahitungod niadtong nagalupad nga pito ka Anghel nga miabot. Busa, masabtan ra ninyo kini sa ulahi.

²⁵ Busa nga, karon, sulod sa bilding, siguro kinahanglan natong, sa sulod niini, kung kini naididikar na, o nga ididikar pa lang sa dili madugay, ngadto sa pagsimba sa Dios, kinahanglan nga magpabilin kining ingon niana. Wala gayud og mga pagpamalit o mga pagbaligya sulod sa bilding. Dili gayud kita magbuhat og unsa man nga pagnegosyo sa sulod niining awditoryum. Dili gyud angay nga buhaton kana sa sulod dinhi, kana lang, kanang tugotan ang mga ministro nga mosulod ug magbaligya og mga libro ug tanan na. Bisan unsa pa kana, aduna ma'y ubang lugar para buhaton kana. Tungod, kita—dili gyud kita angay nga magpalit ug magbaligya sa sulod sa balay sa atong Ginoo. Kini kinahanglan mamahimong usa ra ka dapit alang sa—sa pagsimba; balaan, napahinungod lamang alang nianang katuyoan. Kita n'yo? Karon, gihatagan Niya kita og maanindot nga lugar. Ididikar nato kini ngadto Kaniya, ug ididikar usab ang atong mga kaugalingon, uban niini, ngadto Kaniya.

²⁶ Ug karon kini tingali medyo diretsahan kaayo, apan, dili man gud kini lugar para bisitahan. Usa kini ka lugar sa pagsimba. Ni usa gani ka pulong wala gyud ta'y isulti sa sulod dinhi, gawas sa pagsimba, ngadto sa usa'g usa, gawas kon kinahanglan gyud kaayo. Kita n'yo? Dili kita puede magtigum-tigum aron mag-estoryahanay. Dili kita puede maglibotlibot sulod sa bilding, o pasagdan ang atong mga kabataan nga magdagandagan sa bilding. Ug sa pagbuhat nato niini, gibati nato kaniadto, nga sa pagbuhat niini, nga sa pagtukod nato niini masulbad nato ang tanan niini. Karon, naiplastar na nato kini dinhi. Siyempre, daghan pud ang mga dili-taga-dinhi. Ang mga tawo dinhi sa tabernakulo nasayod gyud niini, nga ang bilding gididikar alang sa pagpangalagad ngadto sa Makagagahum-sa-tanan. Busa, sa pagdidikar sa atong mga kaugalingon usab, hinumduman nato,

nga sa pagsulod nato niining santuwaryo, magpabilin nga hilum, ang usa'g usa, ug simbahon ang Dios.

²⁷ Kung gusto nato nga bisitahon ang usa'g usa, aduna ma'y mga lugar nga mahimong bisitahon ang usa'g usa nga sama niana. Apan, ayaw gayud, kanang maglakaw-lakaw, diin dili na ninyo madunggan ang inyong kaugalingon nga nagapamalandong, ug adunay mosulod nga wala nahibalo kung unsay buhaton, kita n'yo, sa tumang kasaba ug tanan na. Tawhanon kaayo, ug nakita ko kini sa mga kaiglesiahan hangtud nga nagguol ako og ayo niini. Tungod kay, wala kita nagaanhi sa santuwaryo sa Ginoo aron himamaton ang usa'g usa. Nagaanhi kita aron simbahon ang Dios, pagkahuman mamauli na sa atong mga panimalay. Gididikar kini nga santuwaryo alang sa pagsimba. Kung. . . Gawas mo, didto mo makig-estorya sa bisan unsang butang nga gusto ninyo, basta husto lang ug balaan. Adto mo sa balay sa usa'g usa. Magbisitahay mo sa kung asang lugar. Apan pagmosulod na kamo nianang pultahan, maghilum na.

²⁸ Nagaanhi kamo aron makig-estorya ngadto Kaniya, kita n'yo, ug ginatugotan usab Siyang makig-estorya kaninyo. Ang problema lang, kita ang sigeng nakig-estorya, ug wala na naminaw. Busa, pagmoanhi gani kita dinhi, maghulat kita Kaniya.

²⁹ Karon, sa kanhi nga tabernakulo, wala tingali ni usa ka tawo ang ania karong buntaga nga nakatambong sa adlaw sa pagdidikar kaniadto, sa dihang si Major Ulrich ang nagtugtog sa musika. Ug nagtindog ako sa luyo sa tulo ka krus dinhi, aron ididikar ang maong lugar. Dili ko mapahanugotan kaniadto ang si kinsa man. . . Ang mga usher nagatindog dinha sa pultahan, aron masiguro nga walay nagaestorya-estorya. Kung, tapos na ang inyong pag-estoryahanay didto sa gawas. Sulod na mo. Kung gusto ninyo, sa walay pag-banha, pagduol mo ngadto sa altar ug mag-ampo nga hilum lang. Balik na dayon sa imong lingkoranan, og ablihan ang Biblia. Kung unsa man ang ginabuhat sa imong abay, sa iya na kana. Wala gyud ka'y butang nga isulti. Kon gusto mo nga makigsulti unta kaniya, moingon lang, "Makigkita na lang ako kaniya unya sa gawas. Ania ako aron magsimba sa Ginoo." Magbasa sa Iyang Pulong, o maglingkod sa hilum.

³⁰ Ug, dayon, ang musika. Igsoong Gertie, wala ko kabalo kung siya ania ba karong buntaga, o wala, Igsoong Gibbs. Ang karaang piano, sa pagtoo ko, napahiluna kini kaniadto dinha sa daplin, sumala sa akong nahinumduman. Ug sa malomong paagi motugtog siya og, "Down at the cross where my Saviour died," maanindot kaayong, malomong pagtugtog, ug—ug, dayon, hangtud nga oras na sa panerbisyo. Ug ang song leader motindog na ug manguna og pipila ka mga pang-kongregasyon nga alawiton. Ug dayon kon aduna ma'y maayong mokanta og solo, ginapakanta nila kini. Pero, dili kanang unsa na lang nga

pagkanta. Ug padayon lang nga ginatugtog ang musika. Ug dayon pagmadungog ko kana, kabalo ko nga kini na ang oras ko aron mogawas.

³¹ Pagmosulod na ang ministro ngadto sa kongregasyon sa mga tawo nga nagaampo, ug uban ang pagdihog sa Espiritu, siguradong makadungog kamo gikan sa Langit. Kana lang. Wala na’y ubang paagi nga mopalayo ka pa gikan niana. Apan kon kamo nagasulod ngadto sa kagubot, nan kamo—kamo . . . kamo—mangalibog gyud mo, ug ang Espiritu magsubo; ug dili nato kana gusto, dili. Gusto natong moanhi aron magsimba. Aduna kita’y mga maanindot nga panimalay, nga gusto kong hisgotan, sa makadiyut, ug ang uban pa; sa balay, kon diin nagabisita ang atong mga higala ug didto usab nato sila ginadala. Kini mao man ang balay nga iya sa Ginoo.

³² Karon, adunay gagmay’ng mga bata, karon, gagmay’ng mga masuso. Karon, wala sila masayod sa kalainan. Sila, ang bugtong paagi aron makuha nila ang ilang gusto, mao ang paghilak alang niini. Ug usahay ang pag-inom kini sa tubig, ug usahay nanginahanglan sila og pagtagad. Ug mao nga aduna kita’y, pinaagi sa grasya sa Dios, gigahin nga usa ka lawak. Gitawag kini, sa listahan, usa ka “lawak hilakanan,” pero anaa kini mismo nakaatubang sa unahan nako. Kini, sa laktod nga pagkasulti, dinha niana dad-on sa mga inahan ang ilang mga bata.

³³ Karon, dili kini naka-istorbo, tingali, kanako dinhi sa pulpito. Tingali dili ko makamatikud niini, ingon nga dinihogan. Apan adunay ubang mga tawo nga nagalingkod sa duol, ug naka-istorbo kini kanila, kita n’yo, ug nagatambong sila dinhi aron madungog ang panerbisyo. Busa ang mga inahan maoy . . . Pag inyong gagmay’ng bata magsugod na sa paghilakhilak; dili ninyo mapugngan kana. Aba, sigurado, kini usa . . . Kinahanglan ninyong, angay pud ninyo kining ubanon. Ang matuud nga inahan gustong ubanon ang bata niya ngadto sa simbahan, ug kana mao ang butang nga kinahanglan ninyong buhaton.

³⁴ Ug aduna kita og lawak dinha nga makita ninyo ang matag daplin sa bilding, ang tibuok awditoryum; ug adunay usa ka ispeker dinha, kon diin makontrolar ninyo ang kalanog-sa-tunog sa unsa man nga gusto ninyo; nga aduna pud og—og gamay’ng kasilyas sa tumoy niini, ug palanggana sa tubig, ug tanan nang butang nga tukma gayud para dili-malisuran ang usa ka inahan. Adunay mga bangko ug mga butang, nga malingkuran ninyo; lugar aron ilisan ang inyong bata, kon gikinahanglan kini nga ilisan, ug tanan na napahiluna dinha. Naandam na kini tanan.

³⁵ Ug dayon, daghang mga higayon, nga ang mga kabatan-onan ug usahay mga edaran na, nagahimo og . . . Kabalo na mo, ang mga batan-on magpasahay og mga sinulat, o magkinomedyas, o mga ingon nianang butang, sulod sa simbahan. Karon, igo na ang

inyong pangidaron nga makahibalo sa mas maayo pa niana. Kita n'yo? Kinahanglan nga mas nasayod na kamo niana. Kita n'yo? Dili unta kamo moanhi dinhi nga . . . Kung naglaum kamo nga mamahimong usa ka matarung nga tawo sa umalabot nga adlaw, ug magtukod og usa ka pamilya sa Gingharian sa Dios, nan sugdi ninyo kini nga batan-on pa mo, nakita n'yo, ug—ug manglihok nga matarung ug mangbuhat nga matarung, ug karon, siyempre.

³⁶ Karon, anaa ang mga usher nga nagatindog dinha sa mga daplin sa bilding, ug uban pa. Ug kon aduna ma'y mga pagpasaway, sila—sila ang mga giordenahan, ingon nga ila kining katungdanan, ug ang mga tinugyanan usab nga nagalingkod dinhi sa atubangan, nga sa higayon nga aduna ma'y magbanha, sila'y mga sinugo aron sultihan ang maong tawo nga maghilum.

³⁷ Dayon, kon wala sila og ingon anang pagtahud, mas maayo pa nga ihatag ang iyang lingkuranan ngadto sa uban, tungod kay aduna ma'y uban nga gustong maminaw. Adunay ubang tawo nga nagaanhi nga ingon niana ang katuyoan, ang maminaw. Ug kana ang hinungdan kon ngano nga ania kita dinhi, aron patalinghugan ang Pulong sa Ginoo. Ug mao nga ang tanan gusto nga maminaw Niini, ug gusto nila nga maghilum lang kutob sa ilang mahimo. Maghilum lang kutob sa ilang mahimo; ingon niana, dili nga usa ka hugpong sa mga nagatabi ug nagasige'g banha.

³⁸ Siyempre, ang tawo nga nagasimba sa Ginoo, ingon niana gyud ang malauman mo. Ingon niana gyud ang angay'ng mahitabo. Mao kana kon ngano nga mianhi kamo, aron simbahon ang Ginoo. Kon gibati ninyo nga dayegon ang Dios, o mosinggit, ipadayon lang, kita n'yo, tungod kay mao man kana ang hinungdan kon ngano nga ania kamo dinhi, kita n'yo, nga, aron simbahon ang Ginoo sa kaugalingon ninyong paagi sa pagsimba. Apan walay tawong nagasimba sa Ginoo nga nagasige'g tabi ug nagapasahay og mga sinulat, ug nagatabang pa hinoon ngadto sa uban nga mapahilayo gikan sa pagsimba sa Ginoo, kita n'yo, busa mabati nato nga sayup kana. Ug gusto natong himoon kana nga balaod sa atong simbahan, nga sa atong kongregasyon, nga, kining bilding, kining iglesia ginadidikar ngadto sa Gingharian sa Dios ug sa pagwali sa Pulong. Sa pag-ampo! Sa pagsimba! Mao kana ang hinungdan nga mianhi kamo dinhi, aron sa pagsimba, kung ingon niana.

³⁹ Ug dayon ang usa pa ka butang, kung tapos na ang panerbisyo, kasagaran ang mga tawo sa iglesia . . . Siguro—wala man siguro ingon niana dinhi, tungod nga . . . kanunay akong wala, kita n'yo, tungod nga sige ko'g lakaw.

⁴⁰ Kasagaran, bisan sa pagwali sa ubang mga panerbisyo, nagaabot ang pagdihog, ug nagahitabo ang mga panan-awon. Ug maluya gayud ako, ug mogawas na ako og mopadulong ngadto

sa lawak. Ug siguro si Billy, o pipila sa mga kalalaken-an didto, ginahatud ako sa balay, ug papahulayon ako sa makadiyut, hangtud nga mahimasmasan ako niini, tungod sa hilabihan gayud nga kakapoy.

⁴¹ Ug dayon aduna ko'y nakita nga mga iglesia, bisan pa, kon diin ang mga bata ginapasagdan lang nga magdagandagan sa tibuok santuwaryo, ug—ug ang mga edaran na atua ra didto ug nagtabi sulod sa maong lawak, sa usa'g usa. Mao kana'y epektibong paagi nga madaut ang panerbisyo nga igapahigayon nianang gabhiona, o unsa man nga oras kini. Kita n'yo?

⁴² Pagkahuman nga pagkahuman sa panerbisyo, biyai ang awditoryum. Human na man kamo, sa pagsimba nianang higayona. Kung ingon niana manggawas na ug makig-estorya sa usa'g usa, ug sa unsa man nga buut ninyong buhaton. Kung aduna man kamo'y butang nga gusto ninyong isulti kang kinsa man, o—o makigkita kanila, bueno, kuyog mo kanila, o adto mo sa ilang balay, o unsa man, apan ayaw ninyo kini buhata sulod sa awditoryum. Ididikar nato kini ngadto sa Dios. Kita n'yo? Kini maoy Iyang tagboanang dapit, kon diin kita nagapakitagbo Kaniya. Kita n'yo? Ug ang Balaod naggikan sa santuwaryo, siyempre. Ug ako—nagatoo ako nga kana ang makapahimuot sa atong Langitnong Amahan.

⁴³ Ug dayon pagmoanhi mo, ug namatikdan ninyo nga ang mga gasa nagasugod nga mokunsad dinha kaninyo. . . Karon, sa kasagaran kini. . . ako nagasalig nga dili gayud kini moabot dinhi; apan, sa diha nga ang mga tawo aduna na'y bag-ong simbahan, ang unang butang kabalo mo, ang kongregasyon nahimo nang pormal. Ayaw gyud tugoti nga mahitabo kana kaninyo. Bisan pa man, kini mao ang dapit sa pagsimba. Balay kini sa Ginoo. Ug sa diha nga ang espirituhanong mga gasa nagasugod na og abot kaninyo. . .

⁴⁴ Nasabtan ko, nga sukad niadtong paglakaw ko, nga ang mga tawo nangbalhin dinhi nga gikan pa sa nagkalainlain nga bahin sa nasud, nga dinhi nang magpuyo. Mapasalamaton ako, mapasalamaton ako sa Dios, nga, nagatoo ako nga. . .

⁴⁵ Sa buntag niadtong akong gididikar ug gipahiluna ang ulohang-bato dinha, ingon nga usa pa ako niadto ka batan-ong lalaki, nag-ampo ako nga magpabilin kini hangtud sa Pagbalik ni Jesus Cristo. Ug sa nahimo ko na kadto, nagkautang-utang ako og liboan ka mga dolyares, ug dunay. . . Ang makuha mo lang nga halad sa kongregasyon nga ingon niadto ra kita kadaghan kaniadto ug traynta o kuwarenta sentimos ra, ug ang atong obligasyon anaa sa mga usa ka gatus ug singkwenta, duha ka gatus ka dolyar kada bulan. Unsaon ko man pagbayad niadto? Ug ingon nga ako nagtrabaho man, ug hinayhinay kong gibayaran kadto. Ako. . . Dise-siete ka tuig sa pagkapastor nga walay gikuha ni usa ka sentimos man lang, kondili gipanghatag

pa hinoon ang ania kanako, mismo, gawas lamang kadtong para sa mga panginahanglanon ko para mabuhi; ug ang tanan nga gisulod sa gamay'ng kahon diha sa likod, tanan niadto gihatag alang sa Ginharian sa Dios.

⁴⁶ Ug ang mga tawo nagpropesiya—propesiya ug nagtagna-tagna nga sulod daw sa usa ka tuig himoon na kono kini nga usa ka garahean. Gipaningkamotan ni Satanas nga sakmiton kini gikan kanato nianang usa ka higayon sa hinimohimong depekto, usa ka kaso aron manglimbong. Dunay usa ka tawo ang nagreklamo nga nadaut kono ang iyang tiil samtang siya nagtrabaho dinhi, ug mihawa siya kaniadto nga okey ra, ug pagkahuman. . . ug nagdemanda siya ug gusto niyang kuhaon ang tabernakulo. Ug sulod sa pipila ka mga semana mibarug kong gibantayan kini. Bisan pa sa tanan nga dili pagkasinabtanay ug bisan pa sa dili maayong mga pagtagna-tagna, ug bisan unsa pa'y ilang gipangsulti, nagpabilin kini karon ingon nga usa sa pinakamaanindot nga mga awditoryum ug pinakamaayong mga simbahan nga aduna sa Estados Unidos. Husto kana.

⁴⁷ Gikan dinhi mikaylap ang Pulong sa buhing Dios, sa tibuok kalibutan, kita n'yo, sa tibuok kalibutan; ug nagpadayon Kini sa pagtuyok sa tibuok kalibutan, ngadto sa tanang nasud sa silong sa Langit, ingon sa atong nasayran, mituyok sa tibuok kalibutan. Magmapasalamaton kita tungod niini. Magmapasalamaton kita alang niini.

⁴⁸ Ug karon nga aduna kita'y usa ka dapit nga kapuy-an, atop nga mapasilungan, usa ka limpyo, matahum nga iglesia nga adunay malingkuran, ididikar nato ang atong mga kaugalingon sa maong buluhaton, ug ihalad ang atong mga kaugalingon ngadto kang Cristo.

⁴⁹ Ug si Igsoong Neville, ang atong bilihong igsoon, tinuod nga pastor, alagad sa buhi nga Dios. Sumala sa nasayran nianang tawhana sa Mensahe, gihuptan gayud niya Kini, sa tanan nga anaa kaniya. Husto kana. Usa siya ka buutan nga tawo. Siya medyo may kahadlok, o, walay kahadlok; dili kana ang buut kong ipasabut. Apan siya, buutan kaayo siya, medyo lang siya, dili siya estoryador, kabalo na mo, sama sa—sa pagsulti og butang nga mahait ug makapasakit, o, “Maglingkod lang,” o, “Hilum lang!” Akong—namatikdan ko kana, ug naminaw ko sa mga teyp niini.

⁵⁰ Apan ang nagakahitabo nga mahimo ko kana. Busa ako—ako. . . Ug ako—gusto kong hinumdoman ninyo ang akong mga pulong, nakita n'yo. Ug tanan kini nai-teyp, kita n'yo. Ang tanantanan naka-teyp. Ug, palihog lang, nga kinahanglan sa matag diyakono barugan ang iyang katungdanan, ug hinumdumi nga anaa kamo ilalum sa sugo sa Dios, nga huptan kanang katungdanan nga may pagkabalaan. Kita n'yo? Ang

matag tinugyanan, ingon niana usab. Ang pastor mao ang nagahatag sa...

⁵¹ Dili na kana buluhaton sa pastor nga siya pa ang magsulti niana. Ang mga tinugyanan na...o, buot kong ipasabot ang mga diyakono, tungod kay sila man ang mga pulis sa iglesia. Nga, kung adunay mga batan-ong magtiayon nga miabot dinha sa gawas ug magbusina, ug, kabalo na mo, nga kanunay na nila ginabuhat, o butang nga sama niana, panahon sa tigum, o duna siya'y ginapagawas didto. Ug gipasimba sa inahan kining iyang anak nga babaye, ug mogawas kini aron mouban niining mabudhion nga batan-ong lalaki, ug modagan kini pagawas ngadto sa sakyanan, ug ang iyang inahan nagdahum nga ania gayud siya sa simbahan, nga sama niana. Kinahanglan nga makita kana sa diyakono. "Mahimong mosulod ka dinhi ug molingkod, o pasakyon ko ikaw sa akong sakyanan ug ihatud ka sa balay sa imong inahan." Kita n'yo? Kamo, kinahanglan buhaton n'yo kana.

⁵² Hinumdumi, ang gugma nagapanul-id, kita n'yo, sa kanunay. Ang tinuod nga gugma nagapanul-id, busa kinahanglan makadawat kamo og pagpanul-id. Ug, mga inahan, kabalo na mo karon nga adunay lugar dinha para sa inyong mga masuso. Mga kabataan nakahibalo na kamo sa kalainan pagmodagan-dagan mo sulod sa bilding. Kita n'yo? Ug kamong mga edaran nakahibalo na mo sa kalainan pagmag-estoryahanay mo ug magsige'g tabi sulod sa awditoryum. Kita n'yo? Ayaw ninyo buhata kana. Sayup kana. Dili kana makapahimuot sa Dios.

⁵³ Miingon si Jesus, "Nahisulat na, ang Akong balay pagahimoong balay sa pagsimba, pag-ampo. Gikan... Paganganlan kini nga balay sa pag-ampo, sa tanang mga nasud!" Ug sila nagapamalit ug nagapamaligya didto, ug mao nga nagsalapid Siya og mga pisi ug gipang-abog ang mga tawo pagawas sa awditoryum. Ug siguradong dili nato gusto nga mahitabo kana sulod niining santuwaryo. Busa, ihalad nato ang atong mga kinabuhi, ang atong iglesia, atong mga katungdanan, atong mga buluhaton, ug ang tanan-tanan nga anaa kanato, alang sa Gingharian sa Dios.

⁵⁴ Karon, karon gusto kong mobasa og pipila ka Kasulatan sa dili pa kita magkaaduna og pag-ampo alang sa pagpahinungod. Ug—ug, dayon, kini usa lamang ka pagdidikar pag-usab, tungod kay ang tinuod nga pagdidikar nahitabo na kaniadtong traynta na ka tuig ang milabay. Karon sa usa ka... Kung ingon niana—kung ingon niana sa atong—atong pagbasa niining Kasulatan ug sa paghisgot bahin Niini sa dili madugay, nagasalig ako nga igahatag sa Dios ang Iyang mga panalangin kanato.

⁵⁵ Ug karon aduna pa'y usa ka butang nga akong isulti. Oo. Sa una bisan asa na lang nato ginabutang ang atong mga rekorder,

ug uban pa, aduna na ta karon og regular nga lawak dinha, para sa kadtong mga gustong mag-rekord. Adunay mga pinatuyo nga nakakonektar sa mga linya, ug tanan na, nga direktang gikan sa pinakapunoan nga mikropono, dinha.

Adunay mga kwarto, mga kalupo, tanan nang butang alang sa pang-bautismo nga panerbisyo.

⁵⁶ Ug dayon usa ka butang, daghang mga tawo nga kasagaran nagbati og dili-maayo kanako, mga tawong wala makasabut sa Kasulatan, bahin sa pagbutang og krusipiho sa simbahan. Nahinumdom ako usa niadto ka higayon nga may butang nga nahitabo dinhi bahin niana. Aduna ako dinhi og tulo ka mga krus, ug ang usa ka igsoong lalaki naglibog og ayo tungod sa nadungog niya sa ubang denominasyon nga nagsulti nga pagmay krusipiho ka Katoliko ka.

⁵⁷ Gusto ko kung aduna ma'y estudyante, o si kinsa man, o Cristohanon man nga natawo na pag-usab, ang moingon nga ang mga Katoliko lang ang adunay katungod sa krusipiho. Ang krusipiho ni Cristo dili nagrepresentar sa Katolisismo. Nagrepresentar kana sa Dios, sa Ginghamian. Karon, ang mga santos kono nagrepresentar sa Katolisismo. Nagatoo kita nga adunay "usa ka Tigpataliwala tali sa Dios ug sa tawo, ug kana mao si Cristo." Apan ang mga Katoliko nagatoo sa tanan nga matang sa mga tigpataliwala, liboan ka mga babaye ug lalaki, ug tanan na; ang si bisan kinsa man nga butang Katoliko, halos, nga namatay, nangahimong tigpataliwala. Karon, ang krusipiho ni Cristo nagrepresentar kang Jesus Cristo.

⁵⁸ Kabalo ba mo nga ang nahaunang mga Cristohanon, sumala sa—sa pinaka-karaang kasaysayan sa nahaunang iglesia, nagbutang sila og mga krus sa ilang mga likod, bisan asa sila moadto, aron ipakahulogan ug ipaila ang ilang mga kaugalingon nga mga Cristohanon? Karon, ginaangkon sa mga Katoliko nga sila kono kadto. Siyempre, ginaangkon nila nga sila kono ang mga nahauna, pero ang iglesyang Katoliko wala pa gani natukod niadtong tungora. Kita n'yo? Apan ang mga Cristohanon nagbutang na og krus. . .Nadungog na ba ninyo ang mga tawo nga nag-ingon, "krus-sa-likod." Ginapahinungod ba diay ninyo kana sa Katoliko?

⁵⁹ Ang mga tinuod nga katoliko kadto, ang pangtibuok-kalibutan nga Iglesiang Espiritu Santo sa kalibutan, ang husto. Kita ang mga katoliko. Kita ang orihinal nga mga katoliko, ang katoliko nga magtotoo-sa-Biblia. Kita n'yo? Sila ang iglesia, ang Katoliko, nga organisasyon. Dili kita sakop niana. Kita mao ang pagpadayon sa Doktrina sa mga apostoles. Kita mao ang pagpadayon sa bautismo sa Espiritu Santo ug sa tanang mga butang nga gibarugan sa nahaunang Iglesia, ug ang iglesiang Katoliko wala kanila kini. Kita n'yo?

⁶⁰ Busa, gibutang nila ang krusipiho dinhi, nga dinala dinhi, giputol gikan sa kahoy nga olibo kon diin ilalum niini nag-ampo si Jesus kaniadto. Mao kana ang krusipiho nga hinimo sulod sa pila ka tuig, ug gihatag sa ako ni Igsoong Arganbright. Ug gusto kong ididikar kini uban niining simbahan.

⁶¹ Ug tukma kaayo, nga, kung kinsa man ang nagsab-it niini dinha. Wala ko masayud kung kinsa, ang nagsab-it niini dinha sa akong—sa akong wala nga bahin. Gipasaylo kaniadto ni Jesus ang kawatan nga atua sa Iyang tuo; ako kana.

⁶² Ug ang usa pa ka butang nga ginarepresentar niini, sama sa pagduko sa Iyang ulo, nga nakita ninyo ang Iyang pag-antus. Ang si kinsa man nga tawo . . . Nagalantaw Kini ngadto sa altar. Ug nagpaabot Siya dinhi kaninyong, makasasala, ug magatan-aw Siya kaninyo. Sa dili madugay magkaaduna sila og gamay'ng suga nga igabutang dinhi, nga sa dihang himoon na ang pagtawag sa altar, ipasiga ang suga dinha, nga kung ang mga tawo ania na dinhi sa . . .

⁶³ Moingon kamo, “Nganong kinahanglan man ninyo kana? Angay nga wala na kamo og ingon nianang mga imahe.”

⁶⁴ O sige, kung ingon niana, ang mao rang Dios nga miingon, “Ayaw kamo maghimo sa inyong kaugalingon og bisan unsang linilok nga mga larawan,” ang mao ra nga Dios ang nag-ingon, “Paghimo og duha ka kerubin ug ipagdugtong ang ilang mga pako, ug ibutang kini sa lingkuranan sa kalooy diin ang mga tawo nanag-ampo.”

Nakita n'yo, kini—kini, walay pagsabut. Kita n'yo?

⁶⁵ Busa, dinasig kana ug direktang gisab-it sa hustong lugar niini. Ug mapasalamaton kaayo ako ang anaa sa tuong bahin niini. Nagsalig ako nga gipasaylo na Niya ako, tungod kay ako, sama sa literal nga pagpangawat sa unsa mang butang, sa akong nahibaloan, wala ko gayud kini nabuhat sa tibuok kong kinabuhì; apan sayup kong nagamit ang Iyang oras hangtud nga nakapangawat ako nianang paagiha. Ug nakabuhat ako og daghan pang mga butang nga dili ko unta angay buhaton. Ug nagpasalamat ako sa Dios, niining buntaga, nga gipasaylo Niya ang akong mga sala.

⁶⁶ Ug karon gusto kong basahon gikan sa Libro sa Unang Mga Cronicas 17, ug magwali lang sa mga lima ka minutos sa panerbisyo sa paghalad, mag-ampo, ug pagkahuman moadto na ta sa Mensahe. Karon, sa Unang Mga Cronicas, ang—ang ika-17 nga kapitulo.

Ug nahitabo, sa diha nga si David mipuyo sa iyang balay, nga si David miingon kang Nathan ang manalagna, Ania karon, ako nagapuyo sa usa ka balay nga cedro, apan ang arca sa tugon sa GINOÓ nagapuyo sa ilalum sa mga cortina.

Pagkahuman miingon si Nathan kang David, Buhata ang tanan nga anaa sa imong kasingkasing; kay ang Dios nagauban kanimo.

Ug nahitabo sa maong gabii, nga ang pulong sa GINOO midangat kang Nathan, nga nagaingon,

Lakaw ug suginli ang akong alagad nga si David. . . Lakaw ug suginli si David nga akong alagad, (diay), Kini mao ang giingon sa GINOO, Dili ka magtukod ug balay alang kanako nga akong puy-an:

Kay wala ako magpuyo sa usa ka balay sukad sa adlaw nga gidala ko ang Israel hangtud niining adlaw; apan ako magbalhinbalhin gikan sa usa ka balong-balong ngadto sa usa ka balong-balong, ug gikan sa usa ka tabernakulo ngadto sa usa.

Sa tanang mga dapit nga ako naglakaw uban sa tibuok Israel, namulong ba ako sa usa ka pulong sa kang bisan kinsa nga mga maghuhukom sa Israel, nga akong gisugo nga pakaonon ang akong katawohan, nga nagaingon, Nganong wala ako ninyo buhati sa usa ka balay. . . ?

Busa karon kini mao ang ipamulong mo sa. . . kang David, Kini mao ang giingon sa GINOO sa mga panon, Gikuha ko ikaw gikan sa sibsibanan, gikan sa pagsunodsunod sa mga carnero, aron ikaw mahimong principe sa akong katawohan nga Israel:

Ug ako nag-uban kanimo bisan diin ikaw mahiadto, ug nagputol. . . sa tanan mong mga kaaway gikan sa imong atubangan, ug himoon ko ikaw nga bantugan sama sa atalan. . . nga bantugan nga tawo nga anaa sa yuta.

67 Gusto kong isulti, sa niining punto, nga—nga nakita ni David ang mao ra nga butang nga atong nakita. Miingon si David, “Dili kini husto nga kamong mga tawo tukoran ako og usa ka balay nga cedro, ug ang arca sa tugon sa akong Dios anaa lang gihapon ilalum sa mga cortina.” Mga panit kadto nga gisumpay-sumpay’g tahi, gikan sa carnero ug mga mananap. Siya miingon, “Dili kini husto alang kanako nga magpuyo sa usa ka maanindot nga balay, ug ang arca sa tugon sa akong Dios nagapabilin lang gihapon sa usa ka balong-balong.” Busa, gibutang sa Diyos sulod sa iyang kasingkasing ang pagtukod sa usa ka tabernakulo.

68 Apan, si David, ingon nga usa—usa ka tawo nga—nga may paghigugma ug pagpahinungod-sa-kaugalingon ngadto sa Dios, bisan pa niana nagpatulo siya og daghan kaayong dugo. Busa miingon siya. . . si David, gipamulong niya kini sa atubangan sa propeta alang niadtong panahona, nga mao si Nathan. Ug si Nathan, ingon nga nahibalo nga gihigugma sa Dios si David, siya miingon, “David, buhata ang tanan nga anaa sa imong kasingkasing, kay ang Dios uban kanimo.” Pagkamaanindot nga pahayag! “Buhata ang tanan nga anaa sa imong kasingkasing,

kay ang Dios uban kanimo.” Ug nianang gabhiona mismo... Makita ang pagpahinungod ni David sa kaugalingon niini ngadto sa paghigugma sa Dios.

⁶⁹ Ug dayon ang makita, sa mao rang gabhiona, ingon nga nahibalo nga anaa sa sayup si David, nga dili siya puedeng mapahanugotan nga buhaton kini, aduna ang Dios og igong grasya aron moadto didto ug makigsulti kang Nathan. Ug kanunay kong gusto ang ingon niining mga pulong, “Lakaw ug suginli si Nathan nga Ako... Lakaw ug suginli si David nga Akong alagad, nga, ‘gikuha Ko ikaw gikan sa toril-sa-mga carnero.’” Siya, wala gyu’y ikapangandak.

⁷⁰ Ug ako—gusto kong ipahinungod kana dinhi, sa makadiyut lang. “Gikuha Ko ikaw gikan sa wala, ug Ako—Ako—gihatagan Ko ikaw og ngalan. Nakaangkon ka og ngalan sama sa bantugang mga tawo nga anaa sa yuta.” Ug gusto kong ipahinungod kana diha sa—sa paagi nga kita-kita lang, pero sa—sa paagi gihapon sa paghimo og usa ka punto. Naghunahuna ko nga...

⁷¹ Mga tuig na ang milabay, ania ako nagpuyo niining lungsod, ug walay usa nga nagpalangga kanako. Walay usa nga nahigugma kanako. Ug nahigugma ako sa mga tawo, apan walay usa nga nahigugma kanako, tungod sa kaagi sa akong pamilya. Dili sa pagbaliwala sa minahal kong inahan ug amahan.

⁷² Hilabihan kong gipangandoy nga unta buhi pa si mama aron makatamak man lang sulod niining santuwaryo, karong buntaga. Daghan sa mga tigulang nang dugay na kaayo dinhi nga nag-amot sa ilang kwarta aron itabang sa pagtukod niini dinhi, siguro ang Dios, niining buntaga, tugotan sila sa pagtan-aw lahus niining barandilya.

⁷³ Apan ang pamilyang Branham walay maayong ngalan niining lugara, tungod sa paghuboghubog. Walay gustong makighilambigit kanako. Ug nahinumduman kong gisultihan ko ang akong asawa dili pa lang dugay, hunahunaa lang nga ako—dili ko maaghat ang si kinsa man nga makig-estorya kanako. Walay usa nga nagpalangga kanako. Ug kinahanglan pang magtago, aron makapahulay og gamay.

⁷⁴ Ug karon gihatag sa Ginoo kanato kining maanindot nga lugar, ug—ug kining dagkung mga butang nga Iyang gibuhat. Ug gihatagan Niya ako og usa ka... Luyo sa—sa usa ka dimaayo og dungog, gihatagan Niya ako og ngalan nga sama sa pipila sa mga bantugan nga tawo. Ug gipukan Niya ang akong mga kaaway sa bisan asa ako moadto. Wala sukad nagkaaduna og unsa man nga nakabarug sa atubangan Niini, bisan asa Kini miadto. Apan, ug mapasalamaton kaayo ako tungod niana.

⁷⁵ Ug giunsa ko man paghibalo; ingon nga usa ka gamay’ng nagkagidlay nga bata dinhi, nga duha o tulo ka kanto gikan dinhi, mao ang Tulonghaan sa Ingramville, diin nahimo akong

kataw-anan sa eskwelahan, tungod sa luoy kong mga suot, ug nadigyas pa sa karaan na nga lim-aw didto? Giunsa ko man pagkahibalo nga ilalum nianang lim-aw aduna diay og binhi sa lirio nga manglimbukad nga sama niini? Ug giunsa ko man paghibalo, nga, bisan wala ni usa ang gustong makig-estorya kanako, ug sa gihapon gihatagan Niya ako og—og usa ka ngalan nga pagatahuron sa Iyang mga katawhan?

⁷⁶ Ug, karon, si David wala gitugotan nga itukod ang templo. Dili niya kini mahimo. Apan miingon Siya, “Ako magpagawas gikan sa imong kaliwatan, ug iyang tukoron ang templo, ug kana nga templo mamahimong usa nga walay katapusan nga templo. Ug pinaagi sa imong anak nga lalaki, anak nga lalaki ni David, pagatukoron ang usa ka walay katapusan nga gingharian; nga iyang pagaharian.” Si Solomon, nga anak ni David sa natural, gikan sa iyang natural nga kusog, ang maoy nagpatukod og usa ka balay alang sa Ginoo, usa ka templo.

⁷⁷ Apan sa dihang miabot na ang tinuod nga Binhi ni David, ang Anak ni David, giingnan Niya sila nga moabot ang panahon nga wala na’y bato nga nakapatong pa sa usa pa ka bato, nianang templo. Gipaninguhaan Niya lang nga itudlo sila ngadto sa usa pa ka templo.

⁷⁸ Si Juan, ang tigpadayag, diha sa Libro sa Pinadayag, nakita niya kini nga Tabernakulo. Pinadayag 21, nakita niya, “Ang bag-ong Templo nagaabot, mikanaug gikan sa Langit, nga gidayandayanan maingon sa usa ka pangasaw-onon nga gidayandayanan alang sa iyang bana. Ug usa ka Tingog gikan sa templo, ang miingon, ‘Tan-awa, ang Puloy-anan sa Dios anaa uban sa mga tawo, ug ang Dios makauban nila, ug pagapahiran ang tanang luha gikan sa ilang mga mata. Ug wala na’y kagutom, ni kasubo, wala na’y kasakit o kamatayon; kay ang unang mga butang nangagi na.’”

⁷⁹ Dayon ang tinuod nga Anak ni David, nga makita nato sa umalabot niining mga pagtuon niining semanaha, magaabot sa Iyang Templo, ang Templo sa Dios, ang tinuod nga Tabernakulo nga tungod niini miadto Siya aron pagatukoron sa karon. Tungod kay, Siya miingon, sa Juan 14, “Sa Balay sa Akong Amahan adunay daghang puloy-anan, ug Ako moadto. . .” Unsa ma’y Iyang pasabut niana? Gitagana na kining daan. “Ug Ako moadto aron sa pag-andam og Dapit alang kaninyo, ug magabalik, aron kuhaon Ko kamo.” Ug, siyempre, nahibaloan nato nga sa dakung Kapanahonan na kana nga umalabot. Ug ang tinuod nga Binhi ni David magalingkod sa Trono, nga mao si Jesus Cristo, ug didto magahari sa Iglesia, ingon nga Iyang Pangasaw-onon, sa Puloy-anan nga kauban Niya, ug sa taliwala sa dose ka mga banay sa Israel, sa tibuok nga Eternidad.

⁸⁰ Ug ang gagmay’ng mga dapit niini; maingon nga si David, dili siya puede motukod sa tinuod nga Tabernakulo sa Dios,

tungod kay dili siya ang giandam aron sa pagbuhat niini. Walay unsa man nga puede niyang buhaton. Usa siya ka mortal, ug nakapagpatulo og dugo. Maingon man usab kini sa karon, kanato, dili kita andam sa pagtukod sa tinuod nga Tabernakulo sa Dios. Adunay Usa lamang nga puedeng magtukod niana, ug ginatukod na Kini karon.

⁸¹ Apan kining gamay'ng tabernakulo, kauban ang templo nga gitukod ni Solomon alang Kaniya, ug kauban ang mga uban pa, mga temporaryo lamang nga mga dapit sa pagsimba hangtud moabot ang panahon kon diin ang tinuod nga Tabernakulo mapahiluna na ibabaw sa yuta. "Ug ang pagkamarung magahari gikan sa mga langit. Ug wala na'y kagulan-anan." Wala na'y mga panerbisyong-wali sa paglubong sa nianang Tabernakulo. Wala na'y mga pagkasal, tungod kay magkaaduna og usa ra ka dakung Kasal sa Eternidad. Pagkamaanindot nga panahong umalabot!

⁸² Apan tinguhaon nato sa atong mga kasingkasing, karon, nga sa paghandum ug paghulat sa nianang Tabernakulo nga umaabot, maipaila nato ang atong kaugalingon pinaagi sa Iyang Espiritu, nga magasimba kita dinhi niining dapita sama sa daw sa anaa kita sa nianang pikas Dapit, nga nagahulat alang nianang Dapit nga moabot.

⁸³ Karon manindog kita, ug samtang ginabasa ko ang Balaang Kasulatan.

Ug unya nakita ko ang usa ka bag-ong mga langit ug ang usa ka bag-ong yuta: kay ang unang langit ug ang unang yuta maoy nangahanaw na man; ug ang dagat wala na.

... ako si Juan nakita ang balaang siyudad, ang bag-ong Jerusalem, nga nanaug sa langit gikan sa Dios, nga naandam ingon sa usa ka pangasaw-onon nga gidayandayanan alang sa iyang bana.

Ug nadungog ko ang... tingog gikan sa langit nga nag-ingon, Tan-awa, ang tabernakulo sa Dios anaa uban sa mga tawo, ug siya maoy magapuyo ipon kanila, ug sila mahimong iyang katawhan, ug ang Dios gayud mao ang magpakig-uban kanila, ug mahimong ilang Dios.

Iduko nato ang atong mga ulo karon.

⁸⁴ Langitnon namong Amahan, nagatindog kami nga may pagkataha. Nagatindog kami diha nga may pagtahod ug may Balaan nga pagyukbo. Ug nangamuyo kami Kanimo, Ginoo, nga dawaton Nimo ang among halad, ingon nga gihatagan Mo kami og grasya, salapi, aron makapag-andam og usa ka dapit nga pagasimbahan alang Kanimo. Wala na'y lain pa, o wala na'y dapit nga maandam namo dinhi sa yuta, nga—nga mahimong puy-an sa Espiritu sa Dios. Apan ginahalad namo kini nganha Kanimo ingon nga timaan sa among gugma ug mga pagbati alang

Kanimo, Ginoo. Ug kami nagapasalamat Kanimo sa tanang mga butang nga gihimo Mo alang kanamo.

⁸⁵ Ug, karon, ang bilding ug ang yuta niini nadidikar na sa dugay nga panahon, ngadto sa buluhaton, ug kami nagapasalamat Kanimo tungod niining handumanan sa mga kagahapon nga milabay. Ug karon, Ginoong Dios, sama sa usa ka panan-awon nga gipakita kaniadto, mga pipila na ka tuig ang milabay, nga ginapahayag kini, nga nakita ko ang daan na nga mga bilding nga didto kaniadto ang mga tawo, ug gipang-ayo kini ug nahimo nang bag-o, ug ako gipadala balik patabok sa suba.

⁸⁶ Karon, Ginoong Dios, Magbubuhay sa mga langit ug yuta, ania kami ingon nga mga katawhan sa Imong panon. Ania kami nagatindog ingon nga—nga—nga mga katawhan sa Imong Gingharian. Ug ako, ug uban ang pastor, ug ang iglesia, uban sa katawhan, among ginadidikar kini nga bilding alang sa buluhaton sa Makagagahum nga Dios, pinaagi sa Ngalan ni Jesus Cristo, nga Iyang Anak, alang sa buluhaton sa Dios, ug nga may kataha ug pagtahod sa Dios. Ug hinaut nga ang Ebanghelyo magadagayday gikan niining dapita hangtud nga Kini magpahinungdan sa kalibutan nga moduol gikan sa upat ka kanto sa kalibutan, aron makita ang Himaya sa Dios nga nagagikan dinhi. Ingon sa Imong ginahimo sa nangaging panahon, hinaut nga ang umalabot mamahimong pinilo pa nga mas daku.

⁸⁷ Amahan, ginahalad namo ang among mga kaugalingon ngadto sa pagpangalagad, pinaagi sa Pulong, uban sa tanan nga ania kanamo. Ginoo, ang kongregasyon ug ang mga katawhan, ginahalad nila ang ilang mga kaugalingon, niining buntaga, ngadto sa pagpatalinghug sa Pulong. Ug kami, ingon nga mga ministro, ginahalad usab namo ang among kaugalingon, “Sa pagwali sa Pulong; magmakugi sa panahon, sa dili panahon; sa pagpamadlong, sa pagsaway uban sa bug-os nga pagkamapailubon.” Ingon sa nahisulat na dinha sa ulohang-bato, mga traynta na ka tuig ang milabay. Giingon Mo, “Moabot ang panahon nga ang mga tawo dili na molahutay sa maayong Pagtulon-an, kondili magatigum sila sa ilang kaugalingon og mga magtutudlo, nga may mga dalunggan nga gikatlan; ug motalikod gikan sa Kamatuoran, manghisalaag ngadto sa mga sugilanon lamang.” Ginoo, sa pagpaningkamot namo nga maipahayag ang Pulong ngadto sa mga tawo, hinaut nga kami madasig ug malig-on pa nga may dobleng pagpaningkamot. Ginoo, ingon nga dobleng bahin sa Espiritu ang nagakunsad niining dapita, hinaut nga ang maong Balaang Espiritu . . .

⁸⁸ Maingon sa adlaw sa paghalad sa templo, niadtong nag-ampo si Solomon; ang Balaang Espiritu, sa pormang Haliging Kalayo ug Panganud, mikunsad sa atubangan sa pultahan, milukop palibot sa mga Kerubin, nagpadulong didto sa

Balaang Dapit ug didto Kini nagpabilin ingon nga Iyang dapit kapahulayan. Oh Dios! Miingon si Solomon, “Kung ang Imong katawhan magka-problema man bisa’g asa, og molantaw nganhi niining Balaang Dapit ug mag-ampo, nan dunggon Mo gikan sa Langit.”

⁸⁹ Ginoo, hinaut ang Balaang Espiritu, niining buntaga, mosulod sa matag kasingkasing, sa matag hinalad nga kalag nga ania dinhi. Ug nagaingon ang Biblia, nga, “Ang Himaya sa Dios hilabihang kadaku hangtud nga ang mga ministro dili na makahimo sa pag-alagad, tungod sa Himaya sa Dios.” Oh Ginoong Dios, tugoting mahitabo kini pag-usab sa dihang ginahalad namo ang among mga kaugalingon nganha Kanimo, uban sa iglesia, sa pagdidikar alang sa panerbisyo. Ug nahisulat na kini, “Pangayo, ug madawat ninyo.”

⁹⁰ Ug among ginatugyan ang among mga kaugalingon, uban sa among paghalad sa iglesia, niining buntaga, nganha Kanimo, alang sa pagpangalagad, alang sa mga Kahayag sa katapusang-adlaw, alang sa pang-gabiing panahon nga mga Kahayag; aron kami makahatag og kahupayan ug pagtoo sa mga tawo nga nagpaabot alang sa Pag-abot sa Pamanhonon, nga masuk-oban ang Pangasaw-onon sa Ebanghelyo ni Cristo, aron pagadawaton ni Ginoong Jesus. Kini’y among ginahalad, ako, si Igsoong Neville, ug ang kongregasyon, alang sa pag-alagad sa Dios, sa Ngalan ni Jesus Cristo. Amen.

Makalingkod na kamo.

⁹¹ Miingon si David, “Nalipay ako sa pag-ingon nila kanako, ‘Mangadto kita sa balay sa Ginoo.’” Ug hinaut nga anaa kini kanunay kanato, nga, pagnahisgotan kini, nagakalipay kita pagnagakatigum kita sa balay sa Ginoo. [Nagaingon ang kongregasyon, “Amen.”—Ed.] Amen.

⁹² Karon, pagkahuman sa hamubong panerbisyo sa paghalad, aduna pa ako og usa ka oras karon.

⁹³ Ug, karon, hinumdumi gayud kung asa kita gihalad; ngadto sa kataha, pagkabalaan, kahilum sa atubangan sa Ginoo, pagsimba atubangan sa Ginoo. Ug magmatinahuron gayud kutob sa inyong mahimo, pag-anaa sa balay sa Ginoo. Ug, karon, ug sa diha nga ang panerbisyo tapos na, sa gilayan nga human na ang panerbisyo, manggawas dayon kita sa bilding. Kita n’yo? Ug maghatag kana og panahon sa dyanitor aron mosulod dinhi ug hinloan kini para sa sunod na usab, ug maiandam kini. Ug kung ingon-ana walay mahimong gubot sulod sa balay sa Ginoo. Ug . . .? . . . Siguro inyong . . . mamahimong hawan na ang inyong puwesto sulod sa kinse minutos pagkahuman sa panerbisyo. Siguradohon nga magmahigalaon. Makiglamano sa tanan, ug dapiton ang tanan nga mobalik.

⁹⁴ Ug—ug nagalaum kita nga magkaaduna, niining umalabot nga semana karon, og usa sa pinaka-balaanong mga panerbisyo

nga maipahigayon dinhi sa tabernakulo. Nagapaabot kita niana. Karon, ako—ako . . . dili gyud klaro kanako hangtud adunay usa ka butang. . . hangtud sa dugay, nga gabii na, gabii na kaayo, diha sa pag-ampo, nagsugod akong makakita og usa ka butang. Mao nga, nagasalig ako nga mamahimo kining usa ka halangdon nga kahigayonan, nga ginatooan kong mamahimong ingon niana gayud, kon tabangan kita sa Ginoo. Busa, karon, kung ingnon ko, “halangdon nga kahigayonan,” karon, magahisgot ako sa usa ka butang mahitungod niana, niining buntaga. Kabalo na mo, ang ginatawag sa tawo nga “halangdon,” usahay dili man halangdon. Apan ang ginatawag sa Dios nga “halangdon,” ginatawag sa mga tawo nga kabuangan; ug ang ginatawag sa Dios nga “kabuangan,” ginatawag sa tawo nga halangdon. Busa timan-an nato kana sa atong mga hunahuna, sa atong pagtimbang-timbang sa matag Pulong.

⁹⁵ Karon, magkahataas ang oras sa mga panerbisyo. Dugay mahuman, tungod medyo malisod ang hilisgutan, daghang pagtudlo, nanginahanglan og konsagrasyon. Ug ako lang . . .

⁹⁶ Ang lugar nga akong ginapuy-an, ang mga tawo didto naningkamot gayud, ug tanan gusto nilang ipakaon kanako, apan ako . . . Miingon, “Hala, daku gyud ang pagkunhod sa imong timbang, Igsoong Branham, tanan na.” Apan kanunay man gud ko anaa sa buluhaton. Kinahanglan ko na usab mobiya dinhi sa sunod Dominggo sa gabii, aron makaadto sa usa pa, sa gilayon, ngadto sa Mexico. Busa, malisod kaayo. Mao nga, naningkamot gyud ko nga makalikay sa sobrang pagkaon, ug—ug ginaandam ang akong kaugalingon.

⁹⁷ Ug malipayon ako, niining buntaga, nga makita si Igsoong Junior Jackson, ug—ug si Igsoong Ruddell, ug—ug ang nagkalainlaing mga ministro, ug uban pa, sa palibot dinhi. Panalanginan kamong tanan sa Dios.

⁹⁸ Karon ako—gusto ko nga—nga hisgotan kaninyo niining buntaga ang mahitungod sa usa ka hilisgutan nga aduna ako’y pipila ka mga sinulat dinhi karon. Ug gusto kong basahon usá gikan sa Libro sa Isaias, ang ika-53 nga kapitulo. Karon, samtang nagaabli kamo niini, gusto kong maghatag og usa ka pagpahibalo, o duha.

⁹⁹ Nga, unyang gabii, gusto kong hisgotan ang mahitungod *niining* Libro, nga ginadugtong Niini ang katapusang kapanahonan sa iglesia hangtud ngadto sa pag-abli sa Selyo. Karon, adunay usa ka dakung gintang diha niana.

¹⁰⁰ Ug, kaniadto, sa dihang natapos kong hisgotan ang mga kapanahonan sa iglesia, naghisgot usab ako mahitungod sa kapitoan ka semana ni Daniel, pagkasunod niini, tungod kay nagkatakdo kini. Ug ingon ko, “Karon, kon hisgotan ko man ang bahin sa Pito ka Selyo, kinahanglan ko nga tapuson kining kapitoan ka semana ni Daniel, aron magkatakdo diha sa mga

Selyo.” Gibiyaan niini nga abli ang usa ka butang, ug kana mao ang ika-5 nga kapitulo, mahitungod sa Libro nga Selyado-sa-Pito-ka-Selyo. Ug hisgotan nato kana unyang gabii.

¹⁰¹ Paninguhaon natong magsugod og sayo unyang gabii. Unsa kaha kung akong . . . Nasulti mo na man kaha kini, di ba, ang pagsugod og sayo? [Nag-ingon si Igsoong Neville, “Oo.”—Ed.] Unsa kaha, mahimo ba sa tanan nga makaanhi sa mga alas siete? [Nagaingon ang kongregasyon, “Amen.”] Sige. Sugdan nato ang regular nga panerbisyo sa alas sais-traynta, ang panerbisyo sa pag-awit, ug maania ako sa mga alas siete. Ug dayon sa tibuok semana sugdan nato og sayo kaayo. Ug—ug atong, karon, moanhi kita . . .

¹⁰² Walay kinsa man nga mahigugmaon sa pag-awit nga sama sa ginabuhat sa mga Cristohanon. Mahigugmaon kita sa pag-awit. Mahigugmaon kita sa nianang mga butang.

¹⁰³ Apan sa karon kita—kita anaa na sa ubang butang karon. Kita—ania kita karon sa Pulong, kita n’yo, busa kita—magpabilin kita Dinha karon. Buhaton nato kana. Kita—ania kita karon sa pagtudlo. Ug inyong masayran kung unsa ka hilabihan kana kalisod para kanako, kita n’yo, tungod kay, kung duna ko’y matudlo og unsa man nga sayup, manubag gyud ako niini. Kita n’yo? Ug mao nga dili angay gamiton nako kung unsa man ang ginaingon sa uban. Kinahanglan ko . . . Kinahanglan nga dinihogan kini. Ug nagatoo ako nga ang Pito ka mga Manulonda, Nga nagakupot niining Pito ka mga Dalogdog, magtugot niini. Kita n’yo?

¹⁰⁴ Ug karon sa Isaias, ang ika-53 nga kapitulo sa Isaias, sa unang bersekulo, o ikaduha. Gusto kong ipangutana ang kining pangutana.

¹⁰⁵ Karon, dili kini nagapahinungod sa Pito ka mga Selyo, man lang. Kini usa ka Mensahe lamang. Tungod kay, nahibalo ako nga kinahanglan magkaaduna ako og pagdidikar, ug dili ko pa mahimong hisgotan Kana tungod nga wala ako’y oras. Apan nahunahuna ko, alang sa usa ka hamubong panerbisyo sa paghalad, alang sa usa ka panerbisyo sa paghandum para niining iglesia, o usa ka panerbisyo sa paghalad, diay, kung ingon-ana kini—kini . . . wala na’y oras kung ingon niana nga moadto pa sa kung unsay gusto kong isulti, kita n’yo, mahitungod niining pag-abli sa maong Libro, mao nga buhaton ko kini unyang gabii. Ug karon kini usa lang ka hamubong panerbisyo, nga, kini—kini motakdo mismo Niini, sa gihapon.

¹⁰⁶ Busa, karon, paminaw sa matag Pulong. Sabta Kini. Ug—ug kung ginakuha ninyo Kini sa mga teyp, o unsa man, kung ingon niana magpabilin kamo mismo nianang Ginatudlo diha sa teyp. Ayaw gayud pagsulti og unsa man gawas sa kung unsa lang ang ginaingon sa teyp. Isulti lamang sa eksakto kung unsa lang ang ginaingon sa teyp. Kita n’yo? Karon, tungod kay, ang pipila

nianang mga butang, daghan ang masabtan nato mahitungod niini karon, ug kon nganong nasaypan kini sa pagsabot. Kita n'yo? Ug siguradohon gayud, isulti lamang kung unsa lang ang ginaingon sa teyp. Ayaw na pagsulti og unsa pa man. Kita n'yo? Tungod kay, wala ko Kana ginasulti sa akong kinaugalingon. Siya man Kini nga nagsulti Niini, nakita n'yo. Ug busa daghan kaayong mga higayon, adunay mga kalibog, motindog ang mga tawo ug moingon, "Aba, si *Ingon niini-ug-ingon niana* nagsulti man nga *ingon niini-ug-ingon niana* man kono ang pasabot Niini." Kini—kini pasagdi lang gayud sa paagi kung unsa Kini.

¹⁰⁷ Kita n'yo, kana ang paagi nga gusto nato sa Biblia. Sa paagi lamang nga ginaingon Kini sa Biblia, kana ang paagi nga gusto nato Kini, lamang—ingon lang Niana. Ayaw Kini butangi og kinaugalingon mong hubad. Gihubad na Kini, nakita n'yo. Karon:

Kinsa ba'y nakatoo sa among balita? ug kang kinsa man gipadayag ang bukton sa GINOO?

¹⁰⁸ Tugoti akong basahon Kini pag-usab karon, og ayo.

Kinsa ba'y nakatoo sa among balita? (Pangutana!) ug kang kinsa man gipadayag ang bukton sa GINOO?

¹⁰⁹ Sa ubang mga pinulongan, "Kung nagtoo kamo sa among balita, nan naipadayag ang bukton sa Ginoo." Kita n'yo?

Kinsa ba'y nakatoo sa among balita? ug kang kinsa man gipadayag ang bukton sa GINOO?

¹¹⁰ Karon gusto kong basahon usab sa Libro sa Ebanghelyo ni San Mateo, sa ika-11 nga kapitulo sa San Mateo. Ug, karon, magdala mo og inyong mga papel ug ingon-anang mga butang, tungod kay sunod-sunod nato kining ipadayon. . . Kung wala kamo og rekorder, inyong—dalhon ninyo ang. . . inyong papel aron masulat nato kini. Ang ika-11 nga kapitulo sa San Mateo, sa ika-25 ug ika-26 nga mga bersekulo, 11:26 ug 27. Sige, si Jesus kini nga nagasulti, diha sa pag-ampo. Gusto kong sugdan medyo sa mas naunang bahin niana. Himoon nato kining ika-25 ug ika-26 nga bersekulo. Nagatoo ko nga mao kana ang gisulti ko, sa gihapon, tungod gimarkahan ko kini dinhi sa akong Biblia.

Ug niadtong panahona si Jesus mitubag ug miingon, nagapasalamat ako kanimo, Oh Amahan, Ginoo sa langit ug sa yuta, tungod kay imong gililong kining mga butanga sa mga makinaadmanon ug mga masinabuton, ug nga gipadayag sila ngadto sa mga bata.

Oo, Amahan: tungod kay mao man usab ang nakapahimuot pag-ayo sa imong mga mata.

¹¹¹ Sabta n'yo kining duha ka Kasulatan. "Kinsa ba'y nakatoo sa among balita? Ug kang kinsa man gipadayag ang bukton sa Ginoo?" "Bisan si Jesus kaniadto nagpasalamat sa Dios nga Iyang gililong ang mga misteryo sa mga makinaadmanon ug mga

masinabuton, ug gipadayag kini ngadto sa gagmay'ng mga bata ingon sa gusto makakat-on, kay kini nakapahimuot og ayo sa Dios nga buhaton kana.”

¹¹² Karon, gikan sa niining teksto, o, nga maoy tawag nato niini, o gikan sa pagbasa niining Kasulatan, gikuha ko ang teksto: *Ginatago Sa Dios Ang Iyang Kaugalingon Diha Sa Kayano, Dayon Ginapadayag Ang Iyang Kaugalingon Sa Mao Ra Gihapong Paagi*. Karon, tungod sa mga pag-teyp kanunay ko kining ginabalik-balik og sulti, tungod sa mga pag-teyp, nakita n'yo, tungod kay sila—ginateyp nila Kini. Kita n'yo? *Ginatago Sa Dios Ang Iyang Kaugalingon Diha Sa Kayano, Dayon Ginapadayag Ang Iyang Kaugalingon Sa Mao Ra Gihapong Paagi*.

¹¹³ Pagkatalagsaon hunahunaon kung unsa nga ang Dios ginabuhat ang usa ka butang nga sama niana. Ginatago sa Dios ang Iyang Kaugalingon sa usa ka yano kaayong butang nga nahimong hinungdan sa mga manggialamon nga dili nila kini makita sa minilyon ka milya; ug dayon balikan, kanang, yanong butang pinaagi sa kayano Niyang mga pamaagi sa pagpamuhat, ug ipadayag mismo ang Iyang Kaugalingon pag-usab. Nahunahuna ko nga nakapahigayon kini og usa—usa ka hilisgutan, nga mahimo natong tun-an sa dili pa kita mopadulong ngadto sa—sa—sa dakung Pagtudlo mahitungod sa Pito ka mga Selyo. Daghan ang wala nakakita Kaniya tungod sa paagi Niya sa pagpadayag sa Iyang Kaugalingon.

¹¹⁴ Karon, ang mga tawo adunay ilang kaugalingong pangagpas kung unsa gayud ang Dios ug kung unsa ang buhaton sa Dios. Ug sama sa akong gihimo nga kanhing pahayag sa daghang mga higayon, nga, ang tawo magapabiling tawo sa gihapon. Ang tawo kanunay'ng nagahatag og pagdayeg sa Dios tungod sa kung unsay Iyang gibuhat, ug kanunay'ng nagalantaw sa umalabot kung unsa ang pagabuhaton Niya, ug ginabalewala kung unsa ang ginabuhat Niya sa karon. Tan-awa? Kita n'yo? Sa ingon niana nga paagi nga dili nila kini makita. Ginatan-aw nila balik ug makita nila kung unsa ka dagkung butang ang Iyang gibuhat, apan napakyas silang makita kung unsa ka yanong butang ang Iyang gigamit, aron mabuhat kadto. Kita n'yo? Ug dayon sila nagalantaw sa umalabot ug nakita ang usa ka dakung butang nga nagasingabot, nga magakahitabo, ug, nuebe gikan sa diyes ka beses niini, kini nagakahitabo na mismo sa taliwala nila. Ug pagkayano kaayo niini nga wala sila kahibalo. Kita n'yo?

¹¹⁵ Usa niadto ka adlaw, may usa—usa ka tawo dinhi sa Utica . . . Ug kon aduna ma'y pila sa iyang mga paryente ang ania dinhi, dili ko ginaingon kini alang sa kung unsa man—sa unsa man nga dimaayong pagbutyag bahin sa maong tawo. Siya usa—usa ka beterano sa Gubat Sibil kaniadto. Ug nagatoo ako nga siya . . . wala lang ko masayud kung asa siya dapig kaniadto, apan nagatoo ko nga siya usa ka Rebelde kaniadto. Apan, siya—

usa siya ka ateista, ug nag-angkon siya nga wala kono og ingon nianang butang nga sama sa Dios. Nagpuyo siya didto sa Utica. Ang ngalan niya si Jim Dorsey. Daghan kaninyo tingali ang nakaila kaniya.

¹¹⁶ Daghan siyang nahatag kanako nga mga sandiya, niadtong gamay'ng bata pa ako. Dugay na siyang nagtanum og mga watermelon didto duol sa suba, sa—sa ubos nga bahin didto. Ug suod siya nga higala sa akong amahan. Apan miingon siya, usa niana ka adlaw, usa sa pinakamahinungdanon nga mga butang ang nasulti kaniya, nga lahi. Karon, bata pa lang ako niadtong panahona. Apan, bisan nga lahi sa iyang pagtoo, nagpahinungdan kadto nga sa paglakaw niya palayo ug nakaduko ang iyang ulo ug nagahilak. Ug akong nasabtan nga, tungod niadto, ang maong tawo mahimayaong nakabig kang Cristo sa edad nga halos otsentay-singko na ang panuigon.

¹¹⁷ Gipangutana niya kaniadto ang batang babaye, usa niana ka adlaw, nga naggikan pa sa Sunday School, kon ngano konong ginausikan man sa maong batang babaye ang iyang panahon sa pagbuhay sa usa ka butang nga sama niana? Miingon ang bata, tungod kay nagtoo man siya nga adunay Dios. Ug ingon ni Mr. Dorsey, siya miingon, “Anak, pagkasayup nimo, nga toohan ang usa ka butang nga sama niana.”

¹¹⁸ Ug ang batang babaye nagduko ug nagpudyot og usa—usa ka gamay'ng bulak nga gikan sa . . . gikan sa yuta, gibira kini gikan sa mga gihay, ug miingon, “Mr. Dorsey, mahimo mo bang isulti kanako kung giunsa niini pagkabuhi?”

¹¹⁹ Didto na. Sa diha nga sugod niya kining gisusi pabalik, mahimo man niyang isulti sa bata, “Aba, mitubo ra man kini sa yuta.” Ug dayon magpahinungdan man kini og sunod-sunod nga mga pangutana, “Asa man naggikan ang yuta? Giunsa man pagkadangat nianang binhi dinha? Giunsa man niini pagkahitabo?” Pabalik, ug pabalik, ug pabalik, ug hangtud sa pinaka-gigikanan niini hangtud sa makita niya. Kita n'yo?

¹²⁰ Dili kini sa dinagku og madanihon nga mga butang nga atong mahunahuna, kondili dinha sa yanong mga butang nga anaa gayud ang Dios, sa kasimplihan. Busa, gikahimut-an sa Dios nga ipadayag ang Iyang Kaugalingon, ug pagkahuman itago ang Iyang Kaugalingon; dayon itago na usab ang Iyang Kaugalingon, ug ipadayag na usab ang Iyang Kaugalingon, diha sa yano, gagmay'ng mga butang. Kini—ginapahimutang kini lagpas sa ulo sa tawo.

Tungod kay, kung moingon mo, “Nganong buhaton man sa matarung nga Dios ang ingon niana?”

¹²¹ Tungod nga ang tawo gibuhay, sa sinugdanan, dili aron maninguha nga magkinabuhing kinaugalingon. Gibuhay ang tawo aron bug-os nga mosalig sa Dios. Mao kana ang hinungdan nga kita gipakasama sa mga nating karnero, o karnero.

Ang karnero dili mapangunahan ang iyang kaugalingon; nagkinahanglan siya og usa ka tigpanguna. Ug ang Balaang Espiritu mao ang angay'ng tigpanguna nato. Mao nga, ang tawo gibuhat nga ingon niana.

122 Ug gibuhat sa Dios ang tanan Niyang mga buhat nga yano kaayo, aron nga ang mga tawong yano makasabot niini. Ug ginahimo sa Dios nga yano ang Iyang kaugalingon, uban ang mga tawong yano, aron masabtan sa mga yano. Sa laing bahin, miingon Siya, sa Isaias 35, ako nagatoo. Giingon Niya, “Nga bisan ang mga borong, dili mangahisalaag niini.” Pagkayano kaayo Niini!

123 Ug nahibalo kita nga ang Dios daku kaayo, hangtud nga naglaum kita niini ingon nga usa ka daku nga butang, ug nasipyatan nato ang yanong butang. Napandol hinoon kita tungod sa kayano niini. Dinha nato nasipyatan ang Dios, tungod napandol kita sa kayano niini. Yano kaayo ang Dios hangtud nga ang mga iskolar sa niining panahon, ug sa tanang panahon, minilyon ka milya nga wala nila Siya nakita. Tungod, diha sa ilang mga salabutan, nahibaloan nila nga walay unsa mang butang nga sama Kaniya, sa pagkadaku; apan, sa Iyang mga pagpadayag, ginabuhat Niya kini nga ingon kayano kaayo nga napalagpas nila kini ug wala nakita kini.

124 Karon, tun-i ninyo kana. Tun-i Kini Tanan. Ug kamong mga tawo nga nagabisita dinhi, pag-nakapauli na kamo sa inyong mga lawak sa motel, baliki kanang mga butang ug pamalandungi kini. Wala na kita'y igong panahon aron Kini atong masaysay pa og ayo maingon nga kinahanglan man gyud nga maisaysay pa Kini og dugang, apan gusto kong tun-an ninyo kini kung moabot na kamo sa motel, o hotel, o bisan asa man kamo nag-estar, o sa balay. Magtigum-tigum mo ug tun-i Kini.

125 Wala nila Siya nakita sa paagi nga gipadayag Niya ang Iyang Kaugalingon; tungod nga Siya daku kaayo, pero, ginatago Niya ang Iyang Kaugalingon diha sa kayano, aron mapaila Niya ang Iyang Kaugalingon ngadto sa labing gamay. Kita n'yo? Ayaw sulayi pagsabot sa paaging mga dinagku, tungod kay gilagpasan Niya kini. Apan paminawa ang kayano sa Dios, ug dinha n'yo makaplagan ang Dios sa mismo nianang yano nga paagi.

126 Ang mga binansay og ayo, ang kalibutanong kaalam, ang mga edukado, kanunay silang dili makakita Kaniya. Karon, wala ako moanhi . . . Ug nahibalo ako nga adunay mga magtutudlo sa eskwelahan, duha o tulo, nga akong nailhan, ang nagalingkod dinhi. Ug wala ako moanhi dinhi aron batokan ang pag-eskuwela ug edukasyon, ug maningkamot nga suportahan ang kawalay-alamag. Wala ako moanhi dinhi alang niana. Apan, ang nagakahitabo nga, gihatagan kana sa mga tawo og labing kahinungdanon hangtud nga sila, bisan sa mga seminaryo

ug uban pa, dili na nila makita ang mismong butang nga gipahimutang sa Dios sa ilang atubangan.

¹²⁷ Mao kana kon ngano nga dili ako batok sa mga kaigsoonan nga anaa sa denominasyon, kondili supak ako sa sistema sa mga denominasyon, tungod kay kini naninguha nga ipataas ang kaugalingon niini, ug—ug—ug ipa-eskuwela gyud ang ilang mga ministro sa *ingon-niini-ug-ingon-nianang* lugara, hangtud nga, kung sila walay hustong pag-eskuwela ug edukasyon, papahawaon sila. Ug—ug kinahanglan silang mopasar sa pasulit sa espesyalista sa pangutok, ug uban pa. Dili ko nagatoo nga kabubut-on kini sa Dios nga susihon sa psychiatrist ang usa ka ministro, kondili ang susihon siya pinaagi sa Pulong. Kita n'yo? Kini—kini—kini mao ang pamaagi sa Dios sa pagsusi sa Iyang tawo nga gipadala Niya, nga magdala sa Pulong.

¹²⁸ “Iwali ang Pulong!” Karon, sa karon ang ginawali nato pilosopiya, ang ginawali nato kredo ug denominasyonalismo, ug daghan pang mga butang, ug gipamiyaan ang Pulong, tungod kay ginaingon nila nga dili Kini masabtan. Masabtan Kini. Nagsaad Siya nga ipasabot Niya Kini. Karon ginapangamuyo nato Kaniya nga buhaton Niya kini.

¹²⁹ Karon magkuha kita og pipila ka mga tawo dinhi alang sa pipila ka minutos.

¹³⁰ Himatikdan nato ang mga adlaw ni Noe. Sa mga adlaw ni Noe, nakita sa Dios ang kalibutanong kaalam nga gihatagan na og kamahinungdanon ug gitahud og ayo, mao nga nagpadala Siya og yanong mensahe pinaagi sa usa ka yanong tawo, aron ipakita kanila ang Iyang pagkadaku.

¹³¹ Karon, nahibaloan nato nga sa adlaw ni—ni—ni Noe, ginaangkon nila nga hataas kaayo ang sibilisasyon, kaniadto, nga ang maong kahintang wala pa nato kini maabot, sa atong modernong sibilisasyon karon. Ug nagatoo ako nga sa kaulahian maabot ra nato kini, tungod kay miingon ang atong Ginoo, “Maingon sa nahitabo sa mga adlaw ni Noe, mao man usab sa Pag-abot sa Anak sa tawo.” Naghatag Siya og pipila ka mga paghulagway.

¹³² Ug nagtukod sila kaniadto og piramide ug sphinx didto sa Egipto, ug nagtukod sila og higanteng mga butang nga kita walay gahum, karon, nga magtukod og ingon niana. Aduna sila og—og—og usa ka pang-embalsamar, nga mahimo nilang embalsamahon ang usa ka lawas, himoon kini og ingon ka natural hangtud nga magpabilin kining ingon niana sa gihapon karon. Dili kita makabuhat niana. Dili kita makabuhat og usa ka mummy sa karon. Wala kita og kagamitan aron buhaton kana. Aduna sila og mga kolor nga—nga mokapyot og ayo, nga sulod sa upat o lima ka libo ka tuig na ang milabay, nagpabilin kini ingon nga mao ra nga kolor sa gihapon sama kaniadto. Kita n'yo? Wala kita og mga ingon nianang butang sa karon.

133 Ug daghang dagku nga mga butang ang kaniadtong sibilisasyon nga nagapakita nga mas hawod kadto kaysa sa atong modernong sibilisasyon. Ug busa mahunahuna ninyo kung unsa ka hataas ang edukasyon ug siyensya kaniadto, nga nagbilin kanato og ingon-ana ka dakung mga timaan, nga aduna diay og ingon nianang sibilisasyon kaniadto. Unsa—daw sa unsa siguro ka dakung sibilisasyon kadto, bueno, tungod sa niining mga handumanan, kung unsa ka importante kadto nga siyensiya ug—ug modernong sibilisasyon ug edukasyon para sa—sa usa—usa ka katawhan kaniadto. “Siguradong importante kaayo kadto para kanila. Sigurado gayud.” Halos wala ni unsa man, sa tan-aw ko, og unsa mang kaburong sa ilang taliwala, man lang.

134 Ug mao nga, ang Dios, sa pagpangita Niya latas sa tibuok sibilisasyon niadtong mga adlaw, sa ilang mga sistema, wala Siya, tingali, nakakita og hustong klase nga tawo, hangtud nakakaplag Siya og usa ka walay-edukasyon, siguro, mag-uuma nga ang ngalan si Noe, usa ka magbalantay sa karnero. Ug gihatag Niya kaniya ang Iyang mensahe aron iwali sa mga tawo, nga yano kaayo, para sa ilang—ilang mga eskolar niadtong adlaw, hangtud nga ang mga tawo nangapandol tungod sa kayano sa maong mensahe. Ug, bisan pa man, ang mao nga mensahe, sa atubangan sa siyensiya, “Pagkalahi kaayo! Unsaon pagkaadunay ulan didto sa kawanangan, nga wala ma’y ulan tawon didto?” Kita n’yo? Ug ang yanong mensahe sa—sa pagtukod og arka, nagtukod og usa ka butang nga pagasudlan, nga wala ma’y tubig aron nga kalutawan niini. Hala, nahimo siyang usa ka panatiko. Ug nahimo siyang usa—usa—usa—usa ka . . . nga ginatawag nato karon nga, kung pasayloon n’yo ako sa maong sinultihan, usa ka “salikwaut.”

135 Ug halos tanan nga mga tawo sa Dios “salikwaut,” kita n’yo. Ingon niana sila. Malipayon ako nga mahimong usa kanila. Busa, kabalo na mo, sila—lahi sila gikan sa—sa modernong urog sa sibilisasyon, mao nga nahimo silang lahi, talagsaon. Giingon Niya nga ang Iyang mga katawhan “Usa ka talagsaon nga katawhan, lahi, talagsaon; apan usa ka espirituhanon nga pagka-sacerdote, usa ka harianong nasud, nagahalad og espirituhanong mga halad ngadto sa Dios, ang mga bunga sa ilang mga ngabil, nanagdayeg sa Iyang Ngalan.” Daw sa—pagkabulahan kaayo nga mga tawo! Mga panag-iyu Niya sila.

136 Ug himatikdi, karon, daw sa unsa ka salikwaut nga butang ang nahitabo niadtong adlaw, para sa usa ka panatiko nga moadto sa simbahan; usa ka panatiko, ug magawali og ebanghelyo nga wala sa linya, kung ibasi sa ilang ginatooan. Ug para sa mga siyentipiko kaniadto, “Aba, kana—usa gyud kana ka binuang.” Mapamatud-an man gyud nila sa siyentipikanhong pamaagi nga walay ulan didto!

137 Apan mitoo kining yano nga magbalantay sa karnero, “Kung giingon sa Dios nga moulan, moulan gayud.” Kita n’yo?

138 Ug busa ikumpara kana sa karon, bahin sa usa ka tawong naayo. Moingon sila, “Emosyon lang ’na. Mahimo kong pamatud-an kaninyo sa siyentipikong paagi nga ang maong kanser, o ang maong butanga, o—o—o ang ingon-anang butang anaa pa sa gihapon.” Apan, para sa yano nga magtotoo, kini wala na. Kita n’yo? Tungod kay, wala siya nagatan-aw sa maong butang, nagatan-aw siya sa saad, sama sa gibuhat ni Noe kaniadto.

139 Busa wala ba ninyo makita, “Sama sa nahitabo kaniadto sa mga adlaw ni Noe, maingon man usab kini sa pag-abot sa Anak sa tawo”?

140 Sa siyentipikong paagi, walay usa . . . Ang doktor puedeng moingon, “Tan-awa dinhi, ang hubag nimo anaa gihapon. Ang kanser nimo anaa gihapon. Ang bukton mo ingon ka baldado sa gihapon sama sa kung unsa kini kaniadto. Nabuang ka na.”

141 Ug, hinumdumi, kana ang mao rang espiritu gikan sa mga adlaw ni Noe, nga nag-ingon, “Wala’y ulan didto sa itaas. Mahimo natong susihon ang bulan sa mga instrumento, ug walay ulan didto.” Apan kung giingon sa Dios magkaaduna gyud og ulan didto!

142 “Kay ang pagtoo mao ang pasalig kanato sa mga butang nga atong ginapaabot, ang panghimatuod sa pagkaanaa sa mga butang nga dili makita.” Ug ang pagtoo anaa kanunay nagapabilin sa iyahang permanenteng dapit pahulayan nga mao ang Pulong sa Dios. Dinha kanunay makaplagan niini ang iyahang dapit pahulayan. Nasabtan ba ninyo? [Nagaingon ang kongregasyon, “Amen.”—Ed.] Anaa sa Pulong sa Dios ang iyahang dapit pahulayan.

143 Dinha kon diin nagpahulay si Noe, “Mao man ang giingon sa Dios.” Mao na gyud kana. Karon kung namatikdan ninyo pag-usab, kaniadto, maingon nga, si Noe, tungod sa iyang pagtoo niini, nahimong usa ka panatiko.

144 Ug ang mga tawo karon nga nagatoo sa bautismo sa Espiritu Santo. Karon, ginaingon sa iglesia, “Kining mga tawhana mga panatiko. Sila walay lain kondili usa ka pundok sa mga dali-mobati, emosyonal, dali-matandog nga mga tawo.” Apan halos wala sila nahibalo nga ginatudlo kana sa Pulong sa Dios. Usa kini ka saad.

145 Ug, kang Noe, bisan kung giunsa pa nila pagsulti, “Nawad-an na og pangisip ang maong tigulang nga lalaki; nga sa siyentipikanhong paagi sayup siya; ug—ug—ug, sa pangisip, sayup gyud siya.” Apan, kang Noe, mao kadto ang Pulong sa Ginoo, ug si Noe nagpabilin niini. Ug ang mga makinaadmanon ug masinabuton nangapandol tungod sa kayano niini, ug sila

nangalaglag. Usa ka grabe nga—nga—nga pagsaway kadto, bisan sa karon, sa niining henerasyon!

146 Daghang mga tawo ang moingon, “Kung buhi lang ako unta kaniadto!” Dili, siguradong mao pud ang imong taras. Tungod kay, sa karon, mao ra mismong butang ang ginabuhat nila pag-usab sa karon, sa uban lang nga porma, nangapandol sila Niini sa karong panahon sama sa nahitabo sa mga tawo kaniadto.

147 Walay pagduhaduha, nga niadtong mga adlaw, daghan sila og mga magwawali, apan si Noe dinihogan sa Dios. Ug sa pagtan-aw ni Noe sa gawas ug makita niya kung unsa ang siguradong mahitabo, ug nahibalo siya nga ang usa ka mananapaw ug dautan nga henerasyon, nga sama niana, dili gayud mapahanugotan sa Dios nga magpabilin. Busa unsa man ang atong mamahimo, sa karon, ingon nga makita nato ang mao mismong butang! Usa ka modernong Sodoma ug Gomorra, kita n’yo, dautan, mananapaw nga mga tawo, mga hinashasan kaayo nga mga iskolar nga nangapandol tungod sa kayano sa pagpadayag sa Dios sa Iyang Persona ug sa Iyang Pulong, sa pagpasundayag Niya sa Iyang Pulong.

148 Walay tawo sa kalibutan, Rosella, nga, o, si kinsa man—kinsa man ang makahimo sa pagsulti nga—nga wala nato nakita nga uban kanato ang mismong Pulong sa Dios nga napadayag. Ang mismong saad sa kaulahiang mga adlaw, ang mismong pang-gabii nga mga Kahayag nga gitagna nang magadan-ag, mapribilihiyo kitang mga tawo nga makita kana. Ug, diin, ang hataas-og-hinashasan nga kalibutan, gililong kini gikan kanila. Ingon ni Jesus sa Dios, nga Amahan, miingon Siya, “Kini nakapahimuot Kanimo nga ililong kini gikan kanila. Oo, Amahan, gililong Mo kini.” Pasagdi sila, tungod sa ilang kaalam . . .

149 Nakita n’yo, ang kaalam kadto ang maoy nagpasugod ligid sa bola diha sa lapuk sa kasal-anan, didto sa sinugdanan; tungod kay si Eva nangita man og kaalam niadtong nahimamat niya si Satanas, ug gihatag kini ni Satanas ngadto kaniya, kita n’yo. Ug supak sa Pulong ang kaalam. Wala kita giingnan nga kinahanglan magkaaduna kita og kaalam. Ang giingon kanato nga kinahanglan magkaaduna kita og pagtoo sa kung unsa ang mga nasulti na. Busa, kita n’yo? Apan, karon, ang mga iskolar ginadayandayanan Kini sa ingon nianang paagi, ug gipahimutang Kini, gibutangan nila Kini og ilang kaugalingong hubad Niini, kanunay nang ingon niana. Mao ra sa gihapon ang ginabuhat nila karon; mao ra gihapon nga buhat. Karon, ang mga tawo, apan ang . . .

150 O, ang mga tawo kaniadto wala nila nakita kini, ingon man usab nga wala nila makita kini ug ginabuhat nila kini sa gihapon karon. Mao ra gihapon. Mao ra gihapon ang ginabuhat nila karon. Tungod kay, sila . . . Ang hinungdan nga wala nila nakita

kini, tungod nga sila mga maantigo man kaayo mao nga dili na nila matoohan kini. Kita n'yo? Karon, ang mensahe kaniadto yano ra kaayo, nga ang mga maantigo hilabihan na ka maantigo nga dili na nila matoohan ang kayano sa mensahe. Oh, grabe! Gibuhat kini sa Dios nga pinaka-yano, diha sa Kamatuoran, nga nasipyat ang mga maantigo ug ang mga intelektuwal nga makita kini, tungod kay kini yano ra kaayo. Bueno, mao kana ang labi pang nagpadaku sa kadaku sa Dios; tungod kay, ingon nga labing daku, mahimo Niyang buhaton ang Iyang kaugalingon nga yano ra.

¹⁵¹ Ang mga tawo sa karon, nagapakita lang nga dili sila iya sa Dios, daku na sila ug maningkamot pang mamahimong labi pang daku, ug ipaila gyud ang ilang mga kaugalingon nga mas daku, ug, “Dakung Obispo, Doktor Balaang Papa,” tanan na, ginahimo ang ilang kaugalingon ingon nga dili man sila ingon niana. Ug ang Dios, nga ingon ka daku kaayo, ginapaubos ang Iyang Kaugalingon ngadto sa pagkayano. Kahalangdon ang kayano.

¹⁵² Makahimo kita og eroplanong jet, makapalupad kita og rocket ngadto sa...sa...o magpabiyo og usa—usa—usa ka missile ngadto sa kawanangan. Ug mahimo nato ang tanan niining mga butang, bisan pa man, apan dili kita makahimo og usa lang ka dahon sa balili. Uh-huh. Amen. Unsa man kana? Pero imbis nga paninguhaong balikan ug susihon kung unsa ang nagpatubo nianang balili, ug dawaton ang Dios nga maoy nagbuhat sa balili, naningkamot na hinoon kita nga makabuhat og missile nga makaabot didto nga mas paspas kay sa gihimo sa uban nga tawo. Kita n'yo?

¹⁵³ Kita mga utokan na kaayo ug intelektuwal, sa atong mga simbahan, hangtud nga mahimo na natong magtukod og usa ka milyong-dolyar nga bilding, o napulo-ka milyong-dolyar nga bilding, apan, bisan pa niana, ug maningkamot gyud nga makapagtukod og usa ka mas maanindot kay sa Methodist, o ang Baptist magtukod og usa ka mas maanindot kay sa mga Presbyterian, ug ang Pentecostal dili pud magpapildi sa maong lumba. Apan ang tinuod gyud niini, mao kini; nga kita, bisan pa, sa atong mga pagkautokan ug pagkadili na mairog sa atong mga pamaagi hangtud nga nangapakyas kita nga magpaubos sa atong kaugalingon aron masayran nga ang Dios diay anaa ra sa gamay'ng misyon diha sa usa ka kanto. Kita n'yo? Husto kana. Bueno, kana, nagakapandol kita sa kayano niini. Dugay na kining ginabuhat nila.

¹⁵⁴ Karon, sila, sila mga—sila mga utokan na kaayo mao nga dili na sila makatoo sa ingon niana ka yanong mensahe. Wala kini og igong pagkashas alang sa ilang mga siyentipikanhong pagpanuki. Dili kini—dili kini maalamon, ang mensahe dili moigo, para sa ilang programa pang-edukasyon nga aduna sila niadtong mga adlaw. Kita n'yo? Nanagtuon sila aron mahibaloan nga adunay Dios, ug nanagtuon sila aron

mahibaloan nila nga ang Dios daku, ug gipaningkamotan nila nga padakuon usab nila ang ilang mga kaugalingon uban Kaniya. Sa dihang, ang dalan paitaas mao man kanunay'ng paubos.

155 Karon, kinsa ma'y nakahibalo kung ang North Pole ba mao ang Amihanan, o ang South Pole ba mao ang Amihanan; o ang North Pole mao ang Habagatan, ang South Pole ba ang Amihanan? Asa man niini ang anaa sa itaas ug asa man ang anaa sa ubos? Nagalutaw man 'ta sa kawanangan. Ginaingon nato, "Ang North Pole mao ang anaa sa itaas." Giunsa man ninyo pagkahibalo? Ang South Pole mahimo man tingali og Amihanan. Kita n'yo, dili mo mahibal-an. Busa hinumduman nato, ug kining Pulong . . .

156 Miingon, "Kung ingon niana unsaon man nimo pagsulti, Igsoong Branham, nga ang, 'Paitaas maoy paubos'?"

157 Basi mismo sa Pulong ni Jesus Cristo! Giingon Niya, "Siya nga nagapaubos sa iyang kaugalingon igapahitaas, apan siya nga nagapahitaas sa iyang kaugalingon igapaubos, ipaubos gayud." Busa kung ingon niana, sa pagkatinuod, ang paitaas maoy paubos, ug ang paubos maoy paitaas.

158 Sama sa giingon sa tigulang nga balaan didto sa Chicago, nga . . . Usa ka lalaki, usa ka ministro gikan sa usa ka organisasyon, nibarug atubangan sa pipila ka mga Pentecostal. Dala-dala niya ang tanan niyang intelektuwal nga mga butang. Misaka siya didto ug migamit og mga pulong nga wala gyu'y nahibal-an ang mga Pentecostal, ug mibarug siya didto, ug nakita niya nga wala kini masabti sa mga tawong Pentecostal. Ug misaka siya, nga nakatuy-od ang iyang dughan, ug siya si "*Balaang Doktor Ingon niini-ug-ingon niana,*" kabalo mo, gikan sa *usa—usa ka* daku nga tulonghaan didto sa Chicago. Ug milantaw siya sa palibot, ug silang mga Pentecostal nagtinan-away sa usa'g usa. Ni wala man lang gani sila mahibalo kung unsa ang iyang ginahisgotan; tungod edukado siya kaayo, maantigo kaayo, maalam. Wala sila'y nasabtan.

159 Sama niadto sa usa ka inila nga senador, o usa ka tawong nagpapili sa pagka-presidente ug napildi. Giestorya kanako ni Tuck Coots. Niadtong nagwali ako sa lubong ni Mama Ford, ug naghisgot ako bahin sa pagkabanhaw, ang garantiya sa pagkabanhaw, "Sa ingon ka sigurado nga mosubang gayud ang adlaw, ingon usab ka sigurado nga magabangon ako. Sa ingon ka sigurado nga mamatay ang mga balili sa panahon sa Tingdagdag, ug ang mga dahon magakahulog gikan sa kahoy, ingon ka sigurado usab nga magabalik kini. Sa diha nga nagabalik ang kalibutan ngadto sa orbit niini, siguradong mobalik kini pag-usab."

160 Miingon si Tuck, "Nagapasalamat gyud ko niadtong Mensahe, Billy." Si Igsoong Neville ug ako magkauban nga

nagalingkod didto sa sakyanan. Ug miingon ko, “Tuck . . .” Siya miingon, “Nagapasalamat gyud ko sa imong mga Mensahe.”

Miingon ko, “Tuck, wala ko’y edukasyon,” ang ingon ko.

Miingon siya, “Mao kana ang maayo nga bahin mahitungod niini.” Kita n’yo?

¹⁶¹ Ug, karon, ingon niya nga miadto kono siya aron makita . . . Bueno, pasayloon man siguro ko sa tawo, dili ko tuyo . . . si Adlai Stevenson, kaila na mo. Ug ingon niya nga naminaw kono siya kaniya sa mga kinse minutos. Ug si Mr. Stevenson usa ka maalam nga mamumulog, inila, kabalo na mo, hangtud nga ingon ni Tuck . . . Sa hunahuna ko siya migradwar sa kolehiyo. Ingon niya nga naglingkod kono siya didto ug nakatulog. Ug ingon niya nga nakatulog kono siya, sa pagpaminaw kaniya, sulod sa kinse minutos. Apan miingon pa, “Sa kolehiyo niyang edukasyon, wala ko makasabut gawas sa pipila ra ka mga pulong nga giingon niya; mga taas-ug-hinashasan man gud nga mga pulong.” Ingon niya, “Dili mo gayud ako makita nga natulog sa usa sa imong mga panerbisyo, nakita mo ba, Igsoong Branham?”

¹⁶² Busa, kita n’yo, tungod kini sa kayano Niini, sa mga yano ra, dinha kon diin anaa ang Dios.

¹⁶³ Karon, sila mga—sila mga utokan na kaayo, niadtong adlaw, nga dili nila masabtan ang kahulogan sa yanong mga paagi sa Dios sa pagbuhat sa mga butang. Dili kadto hapsay para kanila. Kinahanglan kini nga hapsay gayud, kinahanglan gyud nga may maanindot nga sinubong, o dili nila makita kini. Karon, apan, ang halangdon nga si Jehovah natago sa Iyang Pulong. Ug gipaila Niya ang Iyang Kaugalingon ngadto sa mga tawo nga mitoo sa Iyang Pulong, pinaagi sa pagluwas kanila, ug gipahitabo ang maong yanong mensahe. Ang yanong mensahe kaniadto ni Noe, gipahitabo kadto sa Dios. Karon himatikdi kana.

¹⁶⁴ Karon, pagkahuman niadto, sa mga adlaw usab ni Moises, matikdi ang usa na usab ka panahon sa kaluwasan.

¹⁶⁵ Sa diha nga ang Dios duol na mobuhay og usa ka butang aron luwasan ang Iyang mga katawhan, ang Dios nagapadala og usa ka Mensahe ngadto sa mga tawo. Ug, yano Kini kaayo, ingon nga makita nato kini diha sa pag-abli niining mga Selyo. Mao kana ang katuyoan ko nga hisgotan kini una. Nga, makita nato nga ang pag-abli sa maong mga Selyo yano kaayo, ang—ang—ang mga maantigo dili nila Kini makita, usa ka milyon ka milya. Kita n’yo? Nagalaum ako nga pagadihogan ako sa Dios alang Niini. Kita n’yo? Kita n’yo? Kini nagalagpas lang sa ilang ulo. Ug mao kana ang hinungdan nga akong nahunahuna nga kining Mensahe, niining buntaga, mamahimong angay ra gyud, sa pagpahiluna og pundasyon, mahitungod sa kayano sa Dios, kita n’yo, kung ginaunsa pagtago sa Dios sa Iyang Kaugalingon diha sa kayano.

166 Hunahunaa lang, mahimo nilang bulagbulagon ang mga atom ug mabuhat ang tanang uban pang mga butang; apan paghisgotan na gani ang bahin sa kinabuhi, dili man gani nila masulti kung diin kini naggikan. Usa ka yano ra nga dahon sa balili, ug mitago ang Dios sa sulod niini. Makapalupad sila og rocket padulong sa bulan, ug—ug maglansad og radar paingon didto, o unsa pa man, ug bisan pa niana dili nila mahimong isaysay ang kinabuhi nga anaa sa usa ka dahon sa balili. Husto kana. Kita n’yo? Tungod kay dili man kini mahimong isaysay. Pagkayano kaayo, nga nasipyat silang makita kini.

167 Karon himatikdi si Moises, sa adlaw nga pagawason na sa Dios ang mga anak sa Israel, sumala sa Iyang Pulong. Siya, unsa man ang gibuhat Niya? Gipili Niya ang usa ka yanong pamilya. Wala kita og rekord bahin kanila. Kita n’yo, basta “usa ra ka anak nga lalaki ni Levi,” ang atong nahibaloan. Kita n’yo? Ug busa atong . . . ug ang iyang asawa. Usa lamang ka yano, siguro usa—usa siya ka trabahador sa lapok, sama sa gihunahuna sa kalibutan, atua siya didto nga nagabuhat og tisa para sa kaaway. Usa lamang siya ka yanong ulipon sa Israel, apan gipili sa Dios kadto nga pamilya aron maipadala Niya ang maong manluluwas; usa lamang ka yanong pamilyang Judio. Wala Siya miadto ug nagkuha og tawong harianon ug inila, o unsa man, o nagkuha man og pari. Gikuha niya ang yano, ubos nga pamilya. Kita n’yo? Kayano! Himatikdi kung unsa ang Iyang gibuhat, kaniadto, nagpadala Siya og usa ka bata, usa ka yanong tawo. Siya wala . . .

168 Mahimo man unta Niyang—mahimo man unta Niyang sugoon ang adlaw, kung gustohon Niya, aron luwason sila. Mahimo man unta Niyang sugoon ang hangin aron luwason sila. Mahimo man unta Niyang sugoon ang Manulonda aron luwason sila. Oh, alleluyah! Mahimo sa Dios ang unsa man nga gusto Niyang buhaton.

“Buena, giunsa mo man pagkahibalo niana, Igsoong Branham?”

169 Dili biyaan sa Dios ang Iyang programa. Mao kana ang hinungdan nga nahibaloan nato nga, sa niining panahon, mamahimo Kining yano sa gihapon. Kita n’yo? Karon, kanunay Siya nagapamuhat diha sa kayano. Apan ang Dios, sa sinugdan, nga mahimo Niyang ipawali ang adlaw sa Maayong Balita, o ang hangin man nga maoy magwali sa Maayong Balita, o usa ka Manulonda nga magwali sa Maayong Balita, apan ang tawo ang maoy gisugo Niya alang nianang katuyoan, ug wala Niya kini sukad ginausab. Wala gyud Niya ordenahi ang sa . . . Wala Siya nagsugo og mga denominasyon. Wala Siya nagsugo og mga grupo sa mga kalalaken-an. Mga kalalaken-an ang gisugo Niya aron sa pagwali sa Maayong Balita; dili makina, mga kasangkapan man pag-makina, o unsa man nga Manolunda. Ang tawo ra gyud!

170 Ug sa dihang gihatud Niya ang kaluwasan ngadto sa maong mga tawo didto, usa ka yanong tawo ang gipadala Niya, nga natawo gikan sa usa ka yanong pamilya gikan sa pundok sa mga ulipon. Oh, grabe! Pagkahalangdon nga Dios Siya, nga ginapaila ang Iyang Kaugalingon diha sa kayano!

171 Karon himatikdi. Ug gitugotan Niya siya nga mabansay sa kalibutanong kaalam, aron nga mapakyas siya, ug maipakita nga dili ang kaalam ang mamahimong paagi aron kita maluwas. Kini'y pinaagi sa pagtoo nga kita nangaluwas. Gitugotan Niya siya nga makaeskwela ug makakuha og hataas nga edukasyon hangtud nga mahimo na niyang tudloan og kaalam ang mga taga-Egipto; utokan na kaayo siya. Ang Dios nagauban niadtong yanong pamilya nga, tingali, dili gani makahimong magsulat sa ilang ngalan. Ug gipaeskwela si Moises ngadto sa pinakataas nga pagtuon, nga tungod nianang dakung edukasyon, mahimo niyang tudloan og kaalam ang mga magtutudlo. Mahimo niyang tudloan bisan ang mga hawud-sa-salabutan. Oo. Ug gitugotan siya sa Dios nga maabot ang ingon nianang kahimtang aron maipasundayag sa Dios ang Iyang Kaugalingon diha sa pagkamapainubsanon, aron maipakita nga walay kahilambigitan niini ang kaalam. Ug si Moises makalolooy nga napakyas bisan pa sa iyang kahawud-sa-salabutan. Gitugotan Niya siyang maabot ang ingon nianang kahimtang alang sa Iyang katuyoan, aron nga mapakyas si Moises. Ug napakyas gyud siya, ug nalukapa siya.

172 Busa, aron maipakita nga, “Dili pinaagi sa gahum, dili pinaagi sa kusog,” dili pinaagi sa kaalam sa Egipto, dili pinaagi sa kaalam sa atong mga eskwelahan, dili pinaagi sa gahum sa atong mga seminaryo, dili sa gidak-on sa atong mga organisasyon, dili pinaagi sa gahum sa atong manggialamong pagpanudlo, “kondili pinaagi sa Akong Espiritu, ang ginaingon sa Dios.” Nahanaw ra ang kaalam ni Moises ug misangko kini sa pinakataman ra nga mahimo niini, niadtong nahimamat niya ang Dios didto sa nagadilaab nga kahoy'ng talongon. Gipuhas niya ang iyang sapatos ug gipaubos ang iyang kaugalingon sa pagkamapainubsanon, ug gikalimtan tanan ang mahitungod sa iyang kaalam.

173 Ang Dios, nga nagahatud og kaluwasan, kinahanglan Niyang bansayon si Moises sa kaalam, pasagdan siyang mapakyas, aron maipakita nga dili ka makasalig sa kamot sa kaugalingon mong panabut, o panabut ni kinsa man. Gipasagdan siyang mapakyas, aron mapakita Niya ang Iyang kamot. Nakita ba ninyo kini? [Nagaingon ang kongregasyon, “Amen.”—Ed.] Ang katuyoan kon ngano nga ginabuhay sa Dios ang ingon niini, aron maipasundayag Niya ang Iyang Kaugalingon diha sa yanong paagi. Ug gipasagdan Niya si Moises nga mamahimong pinakalabaw, hangtud nga siya na—siya na ang mamahimong sunod nga faraon. Usa siya kaniadto

ka gamhanang heneral. Sumala sa kasaysayan, gipangbuntog niya, si Moises mismo, ang mga nasud nga nakapalibot. Ug dayon sa diha nga anaa na siya sa buluhaton sa Ginoo, gamit ang tanan niyang mga talento, gipasagdan siya sa Dios nga mapakyas sa gilayon, aron sa ingon niana dalhon Niya siya didto sa kamingawan ug tangtangan kadto tanan nga anaa pa kaniya; ug pagkahuman nagpakita Siya kaniya, sa yanong paagi, ug gipadala siya dala ang usa ka sungkod sa iyang kamot, aron pagawason ang mga katawhan.

¹⁷⁴ Sa dihang, dili niya kadto mabuhat pinaagi sa usa ka sinundalong pamansay, pinaagi sa edukasyon, pinaagi sa siyentipikong edukasyon. Ug pinaagi sa puwersang militar dili niya kadto mabuhat. Ug gihatagan Niya siya ug usa ka baliko og karaang sungkod gikan didto sa kamingawan, ug nahimo kadto sa Dios uban kaniya. Ang Dios diha sa mapainubsanong, yanong paagi! Ang Dios nga anaa sa maong sungkod ug nga anaa usab kang Moises. Ug samtang nga anaa kang Moises ang sungkod, nan ang Dios ang naggunit niana, tungod kay atua man ang Dios kang Moises. Sigurado.

¹⁷⁵ Himatikdi, “Dili pinaagi sa gahum, ni pinaagi—pinaagi sa kusog, kondili pinaagi sa Akong Espiritu.” Kondili pinaagi sa yano rang pagtoo!

¹⁷⁶ Si Moises aduna na’y panabut nga siya ang mamahimong manluluwas, tungod sa pagtudlo sa iyang inahan. Ug gibansay niya ang iyang kaugalingon diha sa pamaaging militar, aron aron buhatan kini, apan napakyas kini. Kita n’yo? Aduna siya og kahibalo, aduna na siya og edukasyon, apan wala kadto’y pulos. Busa kinahanglan niya kadto kalimtan tanan, ug magdangop sa yanong butang nga saligan lang ang Dios diha sa Iyang Pulong, ug tungod niana naluwas niya ang mga katawhan. Oo, sir.

¹⁷⁷ Ang Dios nagaluwas pinaagi sa (unsa?) pagtoo diha sa Iyang Pulong. Ingon niana na kini kaniadto pa. Mahimo natong balikan kung aduna pa kita’y oras. Aduna kita og mga baynte minutos pa. Kita adunay . . .

¹⁷⁸ Mahimo natong balikan si—balikan si Cain ug Abel, kung unsa nga—nga gipaningkamotan ni Cain nga mahimuot ang Dios pinaagi sa kung unsang butang nga matahum.

¹⁷⁹ Sa uban usab nga paagi, ang mga tawo naghunahuna, “Pinaagi—pinaagi sa halangdon, maanindot manamit nga kongregasyon, pinaagi sa pari nga—nga . . . naka-toga nga mga ministro, ug naka-toga nga mga choir, ug tanan na nga—nga mga pagdayandayan, sa pagpahimuot sa Dios.” Nakita ba ninyo kung asa gyud kini naggikan? Gisulayan pud ni Cain ang ingon nianang butang. Ug nagtukod siya mismo og usa ka halaran, og siguradong gibuhat niya kadto nga matahum.

180 Ug sinsero ang maong tawo. Nagsimba siya. Nahunahuna niya, “Basta sinsero ako, wala kini kalainan.” Duna gyu’y kalainan. Puede ka man mamahimong sinsero nga sayup.

181 Himatikdi, iyang—iyang gitukod kining halaran ug siya, nga mas mora og, nagbutang siya og mga bulak ug giplastar og ayo kini, ug nagbutang og lami nga mga prutas, ug naghunahuna, “Sigurado, ang usa ka halangdon, balaan, hinlo, og matahum nga Dios magadawat gyud nianang halad.” Apan, kita n’yo, gibuhat niya kadto pinaagi sa iyang kaugalingong kaalam. Gibuhat niya kadto pinaagi sa iyang kaugalingong mga hunahuna.

182 Ug mao kana kung unsa kini sa karon. Siya—siya... Ginabuhat nila kini pinaagi sa ilang kaugalingong kaalam, pinaagi sa ilang pagtuon, pinaagi sa ilang edukasyon ug mga etiko nga ilang nakat-onan.

183 “Apan si Abel, pinaagi sa kapadayagan, pinaagi sa pagtoo, naghalad ngadto sa Dios og labi pang maayo nga halad.” Walay unsa mang kahinlo bahin niadto, kon tan-awon kadto, sa tinawhanong pagkasulti. Ang luoy’ng mananap, ug gisakmit niya kini sa liog ug gigapos kini og balagon, nga sama *niana*, ug giguyod kini ngadto sa halaran. Walay unsa mang kaanindot niana. Gipatong kini ibabaw sa halaran, ug giluba ang gamay’ng tutunlan niini sa usa—usa ka mahait nga bato, hangtud nga mopunsit ang dugo niini ngadto kaniya, ug mobahaha kini, og mamatay. Mangil-ad kini nga talan-awon, kita n’yo, kon tan-awon kini. Kini yano ra, bisan pa man.

184 Diha sa yanong paagi, nasayod siya nga siya natawo sa dugo sa iyang inahan ug amahan, natawo sa dugo sa iyang inahan, pinaagi sa dugo sa iyang amahan; ug ang dugo ang nagpahinungdan sa pagkahulog, mao nga ang dugo ang makapasig-uli niini pabalik. “Busa naghalad siya ngadto sa Dios og labi pang maayo nga halad, tungod kay gipadayag kini ngadto kaniya.”

185 Ug ang uban sa mga kaigsoonan, karon, nagdahum nga mikaon ang maong mga tawo kaniadto og mga mansanas ug mga peras! Ug nakita ko ang pinaka-radikal nga butang niadtong usa ka adlaw, diha sa mantalaan. Ingon nila, “Karon napamatud-an nila nga dili man diay mansanas ang gikaon ni Eva.” Nga, ako—sa akong pagsabot nga ang ingon nila, “Usa diay kono kadto ka melokoton.” Busa, oh, nakita n’yo na kung asa gikan kana nga espiritu!

186 Ug nanag-ingon sila, nga, “Si Moises kono wala man motabok sa Dagat nga Mapula. Nga, usa—usa ra kono ka hugpong sa mga tigbaw ang atua didto, usa ka dagat sa mga tigbaw. Ug iyang gidala ang mga anak sa Israel latas sa dagat sa mga tigbaw. Patabok sa kinatumyang daplin sa—sa dagat, adunay usa ka dakung hugpong sa mga tigbaw ang atua didto.

Ug si Moises kono mitabok sa dagat, apan usa kono kadto ka dagat sa mga tigbaw ang iyang gitabok; kabalo na mo, ang sagbot, tag-as, sama sa mga bugang ug ingon anang mga butang, nga mitabok kono siya didto.” Kataw-anan kaayo!

¹⁸⁷ Sa dihang, “Ang tubig,” ingon sa Biblia, “nabahin ngadto sa tuo ug wala, ug ang Dios ang naghimo nga usa—usa ka makusog nga hangin sa sidlakan ang magpabahin niadto.” Kita n’yo? Kita n’yo?

¹⁸⁸ Sila, gusto nilang paninguhaon nga sabton kadto sa kinaugalingon nilang paagi. Ug sa ingon nianang paagi sila kanunay nangapakyas, ug padayon sila nga nagakapakyas. Kabalo na mo, sa tanan niining mga butang!

¹⁸⁹ Ug si Cain ang mismong tipo sa tawong karnal-ang-panghunahuna sa karon, nga relihiyoso sa panggawas. Gusto niyang mobuhat sa usa ka butang nga panggawas, apan usa siya . . . Nagasimba siya, ug—ug nagabuhat siya og daghang mga butang para matukod ang—ang bilding.

Adunay usa lamang ka Iglesia, ug wala kamo nagapamiyembro Niana.

¹⁹⁰ Kini mga kapunongan lang. Kita n’yo? Nagapamiyembro kamo sa kapunongan sa Methodist, sa kapunongan sa mga Baptist, kapunongan sa mga Presbyterian, kapunongan sa mga Pentecostal.

Apan gikahimugso kamo sa Iglesia. Oo, sir. Kita n’yo?

¹⁹¹ Kining tanan mga kapunongan. Dili kini mga iglesia. Sila mga kapunongan lang. Ug walay ingon nianang butang nga sama sa Methodist nga “iglesia,” o Pentecostal nga “iglesiang.” Dili, walay ingon nianang butang. Wala, tanan kana sayup. Kita n’yo? Sila’y mga . . . Husto kana. Sila, mga kapunongan sila nga ginapamiyembrohan nianang mga tawo.

¹⁹² Apan gikahimugso kamo pasulod sa Iglesia sa buhi nga Dios, ug kana mao ang espirituhanong Lawas ni Jesus Cristo nga ginaporma na.

¹⁹³ Karon, apan, nakapahimuot kadto sa Dios nga ipadayag ang Iyang tinago ngadto kang Abel, pinaagi sa yano rang pagtoo ngadto sa giula nga dugo. Oh, kung aduna pa unta ako og oras gusto kong mailatag kana sa mas dugay-dugay. Kita n’yo?

¹⁹⁴ Bisan pa niana, si Cain, uban ang tanan niyang kaalam, maantigo siyang tawo! “Oh,” moingon mo, “karon, Igsoong Branham, giingon mo nga siya . . . Gipanguhaan mong himoon siyang edukadong utokan?” Ingon niana siya. Usa siya ka maantigong . . . Subaya ang iyang—subaya gani ang iyang kagikanan. Tan-awa ang iyang mga anak. Ang matag usa kanila mga siyentista, ug mga doktor, ug maantigo nga mga tawo, ang matag usa.

195 Apan, subaya gani ang henerasyon ni Seth, mapainubsanon sila, mga magyuyuta, ug mga mag-uuma, ug uban pa, hangtud na niadtong kagub-anan.

196 Apan ang mga anak ni Cain mao ang maantigo ug intelektuwal nga grupo. Gani sila, ginaangkon nilang, makahimo sila paghulma og mga tumbaga, ug makahimo sila og mga puthaw; ug sila’y mga magtutukod. Ug maantigo sila nga mga tawo.

197 Samtang—samtang, kining ubang mga tawo nagpuyo lamang diha sa mga tolda, ug nagbakiro sa ilang mga karnero, ug nagsalig sa mga saad sa Dios. Kita n’yo? Kita n’yo? Nakita n’yo kung unsa kini kaniadto? Karon subaya lang ang kagikanaan sa maong mga tawo pabalik, ug tan-awa kon dili ba kana husto. Kita n’yo? Nagpabilin sila sa saad sa Dios.

198 Sa ingon nianang hinungdan nga napili si Noe, gikan nianang matang sa mga tawo. Sa ingon nianang hinungdan nga gikuha si Pablo gikan sa iyang panon. Kita n’yo? Sa ingon nianang hinungdan nga, sila John Wesley, Martin Luther, ug uban pa. Sa ingon nianang hinungdan nga kamo nangahimong kung unsa na kamo karon, kita n’yo, tungod sa mao rang butang, ang pagkamapainubsanon, aron toohan ang yanong saad sa Dios.

199 Karon, matikdi, makapahimuot kini sa Dios nga—nga magpaila. Karon, ang Dios sa kanunay magpamatuod kung kini ba mao ang Kamatuoran o dili. Kita n’yo? Karon, daghang mga tawo ang maningkamot diha sa ilang kaugalingon nga manglihok ingon nga usa ka butang nga minilyon ka milya ang kalayoon sa Dios niini. Husto kana. Apan sa dihang makita n’yo ang Dios nga nagabalik, ingnon Kini’y. . . puntohan Kini, nagaingon, “*Kana’y husto, Kana’y husto, Kana’y husto,*” nan mahibaloan ninyo nga matuod Kana.

200 Karon, sa dihang ang mga halad atua na sa halaran, gisalikway sa Dios ang pang-intelektuwal nga panabut ni Cain mahitungod sa Dios. Apan sa dihang hingkit-an sa Dios si Abel, tungod sa yanong pagtoo niini aron toohan nga dili kadto mga mansanas o mga bunga sa kapatagan, kondili dugo; pinaagi sa pagtoo gitooan niya kini, pinaagi sa kapadayagan gikan sa Dios. Gipamatud-an sa Dios si Adan pinaagi sa pagdawat sa iyang halad. Kita n’yo?

201 Dinha kita nagapamalandong bahin sa pag-ampo alang sa mga masakiton, sa bisan unsa pang butang. Giingon ni Jesus, “Kung kamo magapabilin Kanako, ug ang Akong Pulong anaa kaninyo, managpangayo lamang kamo sa bisan unsa nga buot ninyo ug pagabuhaton kini kaninyo.”

202 Karon sa pagpadayon nato, agpason nato karon, may mga baynte minutos pa kita.

203 Himatikdi, sa mga adlaw ni Elias, gipili sa Dios nga itago ang Iyang Kaugalingon diha sa usa ka yanong tawo. Karon hunahunaa lamang kini. Gipili sa Dios. Mao kana ang Iyang pagpili. Hinumdumi, aduna sila kaniadto og mga rabbi, mga sacerdote. Aduna sila og bantugan nga mga tawo niadtong mga adlawa. Bisan si Haring Ahab, mismo, usa ka Judio. Aduna usab siya og halangdong mga tawo sa kayutaan, niadtong mga adlawa. Apan gitago sa Dios ang Iyang Kaugalingon diha sa usa ka yanong tawo; dili usa ka eskolar; dili, dili sa usa ka inila nga tawo sa kalibutan, sa usa man ka inilang maalamon nga sundalo o unsa man; dili, dili sa dikampanyang ngalan. Wala man gani nato nailhan kung kinsa ang iyang amahan ug inahan. Wala gyud ta'y nahibal-an og unsa man mahitungod sa iyang mga kagikanan. Usa lamang siya ka ordinaryong tigulang na nga mag-uuma sa kung asa, nga gipatungha alang sa katuyoan nga mamahimong usa ka propeta. Gipapuyo siya sa Dios didto sa kamingawan aron magkinabuhing nag-inusara sa iyang kaugalingon. Ang butang lamang nga atong nahibaloan, basta na lang siya nga migawas sa kung asa, miadto mismo didto ug gikondena ang tibuok pang-simbahang sistema. Grabe!

204 Ug nahibaloan ba ninyo kung unsa ang sa ilang hunahuna bahin kaniya? “Unsa kahang tulonghaan siya gikan?” Kita n’yo? “Unsa kahang denominasyon siya nahiuban? Kauban kaha siya sa mga Fariseo, mga Saduceo,” o unsa pa man ang aduna kanila kaniadto? Dili siya sakop sa bisan kinsa pa man kanila, apan gikondena niya ang maong tibuok butang. Kita n’yo? Gipili sa Dios nga buhaton kadto.

205 Apan, usa ka yanong tawo, walay edukasyon. Wala kita’y nahibal-an nga lugar kung asa gyud siya nag-eskuwela. Wala kita’y nahibal-an og unsa man mahitungod kaniya. Usa lang ka yanong tawo, apan ang Dios nahimuot nga magtago sa ingon-nianang yanong tawo. Ang Dios, kaniadto, pinaagi niining yanong tawo, nagtago sa usa ka tawo. Nasabtan ba ninyo kini? [Nagaingon ang kongregasyon, “Amen.”—Ed.]

206 Ang Dios nagtago diha sa usa ka “burong nga salikwaut nga tawo,” sumala sa kalibutan. Tungod kay, kabalo na mo, ilang—giakusahan nila siya og tanan na, bisan ingon nga usa ka “barangan,” si Elias. Ang tanan man nga mga propeta giakusahan, og ingon-niana, kita n’yo.

207 Busa, giakusahan si Jesus og ingon niana usab, nakita n’yo, “Beelzebub; ingon nga buang.” Miingon, “Aba, buang ka. Oo, nasayud kami nga adunay yawa diha Kanimo. Ikaw—wala ikaw sa hustong pangisip.” Kita n’yo?

208 Dinha kon diin giingon Niya kanila, “Kung Kini moabot diha sa kaulahiing mga adlaw, nga sila magpa...nga kana mamahimong pagpasipala, ang pagbuhat og ingon-niana.” Gipasaylo Niya sila, apan dili na kini mapasaylo pa sa

kaulahi-ang mga adlaw. Kini kinahanglan nang pagabayran, og Eternal nga pagkahimulag, “Dili na gayud pagapasayloon, sa niining panahon o sa umalabot pa nga panahon.”

²⁰⁹ Apan si Elias giisip kaniadto nga usa ka buang nga tawo. Mahunahuna ba ninyong atubangon didto ang... Ang—ang mga kababayan-an nga nagapaputol tanan sa ilang buhok sama niining modernong mga adlaw, nga tingaling, ug nagapangmeyk-ap sama ni Jezabel, ang unang ginang sa nasud kaniadto. Ug—ug ang tanang mga magwawali nahimo nang kalibutanon ug tanan na. Ug dayon unsa man ang nahitabo? Ug ania karon migawas ang tigulang nga si Elias, nga ginakondena ang maong tibuok butang, gikan kang Jezabel ngadto sa ubos.

²¹⁰ “Aba,” naghunahuna sila, “dili namo kinahanglan maminaw kanimo! Aduna man kami og mga pastor.”

²¹¹ Oo, dili man nila kinahanglan maminaw, apan siya ang ilang pastor bisan pa man. Siya mao ang pastor ni Jezabel. Dili niya gusto kini. Mahimong aduna siya og ubang pastor. Apan, apan, ang pinadala-sa-Dios, siya ra. Kita n’yo? Siya ang pinadala sa Dios nga pastor alang kaniya. Gikadumtan niya siya, apan siya ang pastor niya bisan pa man. Himatikdi.

²¹² Ug gipaubos ni Elias ang iyang kaugalingon ug nagpabilin sa kung unsa lang ang gisulti sa Dios, sa paagi, nga kini nakapahimuot sa Dios nga kuhaon ang mao ra nga Espiritu gikan kang Elias ug nagsaad nga gamiton Kini sa tulo pa ka higayon gikan niadto. Kita n’yo? Amen. Ug gibuhat Niya kini. Amen. Siguradong, gibuhat Niya. Sigurado gyud. Gisaad Niya Kini, nga moabot Kini. Ug miabot Kini ngadto kang Eliseo, ang misunod kang Elias; dayon miadto kang Juan Bautista; ug, sumala sa Malaquias 4, Kini kinahanglan nga maania pag-usab sa kaulahi-ang adlaw. Kita n’yo?

²¹³ Gihigugma sa Dios kana nga Espiritu nga atua niadtong yanong, dili-edukadong lasangnon-nga-tawo nga gikan pa didto sa mga kakahoyan kung asa man. Ug, busa, masinugtanon Kini sa Iyang Pulong, nga maingnan Niya, “Elias, buhata *kini*,” ug buhaton kini ni Elias. Ug gitago sa Dios ang Iyang Kaugalingon diha kaniya, diha sa maong kayano!

²¹⁴ Ang ingon nilang tanan bahin kaniya, “Kanang tigulang nga sapoton, ayaw pagpakighilambigit kaniya,” ug uban pa.

²¹⁵ Apan usa ka adlaw, sa dihang siya—tigulang na siya, ug ang iyang ulo upaw na, ug ang iyang—ang iyang balbas nagadunghay, nga gipang-uban, ug ang gamay’ng buhok nga aduna siya nakalaylay kini sa iyang abaga; hagdip nga tigulang na ang mga bukton, ug ang mga panit nangloyloy na nga sama niana; nagalakaw siya niadtong dalana paingon sa Samaria, ug nagalantaw kadtong mga mata sa kawanangan, nga dala ang usa ka baliko nga sungkod diha sa iyang kamot. Dili siya maayo tanawon, apan anaa kaniya ang “MAO KINI ANG GINAINGON SA

GINOO” alang sa maong panahon. Wala siya magbungábungá Niini. Wala gayud siya nagngángá. Wala niya ingna, “Karon, *halangdong* Ahab.” Miadto siya didto ug miingon, “Walay bisan tun-og ang mahulog gikan sa langit gawas kung isulti ko kini.” Alleluyah! Kita n’yo? Gipasidunggan sa Dios ang iyang pagka-yano.

216 Karon, nakita ninyo, samtang atua kini sa yanong paagi, ug ang tanan—ang tanan nahimong batok kaniya, ang tanan gusto siyang patyon. Ang tibuok kapunongan sa mga ministro, ang tanan nang uban pa, gusto siyang patyon, tinuod kana, naninguha nga mawala siya sa eksena ug tanan na. Apan, sa nianang kayano, bisan pa nga wala sila og pagpakigtambayayong sa iyang mga buluhaton ug unsa pa man nga aduna siya kaniadto. Ang tanan na naghunahuna nga buangbuang siya. Gitago lang sa Dios ang Iyang Kaugalingon.

217 Apan niadtong miabot ang panahon aron mahinog kadtong binhi, nga naipugas na, gipadayag sa Dios ang Iyang Kaugalingon pinaagi sa pagpadala og Kalayo gikan sa Langit ug gisunog ang halad. Ang Dios nga mitago diha sa kayano, ug dayon gipadayag na usab ang Iyang Kaugalingon. Kita n’yo? Sigurado. Nakapahimuot kini sa Dios nga buhaton ang ingon niana. Kanunay Niya kining ginabuhat sa ingon niana nga paagi. Oo, sir. Karon, nahibaloan nato nga Iyang—gisaad Niya ang kining mga butanga.

218 Ang problema, sa karon, ang kadaghanan kanatong mga tawo, gusto natong mamahimong pinaka, kabalo na mo, pinaka makaseminaryo-, ug makadenominasyon-, nga kinahanglan edukado gayud, nga dili na kita mahimong gamiton sa Dios. Mahimong hatagan sa Dios ang usa ka tawo og usa ka butang nga masugdan, ug hatagan siya og usa ka ministryo; mahibaloan mo na lang, mas tagdon pa niya kung unsa ang ginaingon sa uban, ug, mahibaloan mo na lang, nasangit na siya sa kung unsa na lang nga butang. Ug dayon ilayo na sa Dios ang Iyang mga kamot gikan kaniya, ug pasagdan siyang mag-inusara. Kita n’yo? Kita n’yo?

219 Dayon paninguhaon sa Dios nga makapangita og ubang tawo, usa ka tawo nga mobuhat niini. Kita n’yo? Kinahanglan Niyang makapangita og usa nga andam—andam motuman sa Iyang Pulong, dawaton ang Langitnong pinadayag ug dili gayud matarug Niini, nga magapabilin mismo nianang Pulong. Mao kana ang paagi nga Iyang—Iyang ginabuhat kini. Kanunay Niyang ginabuhat kini sa ingon niana nga paagi.

220 Busa sa diha nga ang tawo nahimo nang edukado kaayo ug maantigo, nga, naninguha nang iapil ang kaugalingon niyang interpretasyon. Bueno, sama sa ginaingon nila, “Ang bautismo sa Espiritu Santo,” ginaingon nila, “oh, para ra man kana sa laing panahon.” Apan, kung dili man, bueno, “Dili Kini alang

sa laing panahon, apan, sultihan ko kamo, wala man Kini nagaabot susama sa pag-abot Niini kaniadto didto sa Adlaw sa Pentecostes. Madawat man nato ang Espiritu Santo sa dihang mitoo kita.” Ug—ug tanan na nga matang sa mga butang nga susama niana, nakita n’yo. Ug paghisgotan mo ang mahitungod sa bautismo sa Ngalan ni Jesus Cristo, sila . . . kon diin gitudlo kini sa Biblia sa ingon niana nga paagi; bueno, moingon mo, “Bueno, apan, ang ginaingon sa seminaryo! Ug ang ingon man ni *Ingon niini-ug-ingon niana!*” Pagpakigkompromiso kana. Kita n’yo? Dili gyud magamit sa Dios ang usa ka tawo nga ingon niana. Kita n’yo?

221 Mahimo Niyang tugotan nga daugdaugon sa tibuok nasud ang usa ka tawo nga sama niana, ug abugon kini ug kataw-an, ug biaybiayan, ug tanan nang uban pa nga sama niana. Apan pagmoabot na ang tinuod nga pagpakigsangka, pagabarugan sa Dios ug pagapamatud-an ang Iyang Kaugalingon dinha mismo sa ingon nianang kasimplihan.

222 Nagatubo kini, sama sa bulak. Ang binhi, kon tan-awon mo wala na, mamatay kini ug malubong sa yuta. Kaloton mo ang maong binhi, ug nadunot na kini, ug luoy kaayo tan-awon. Apan gikan niana moturok ang kinabuhi aron mamunga na usab og usa ka bag-ong bulak.

223 Ang Dios kini diha sa kasimplihan. Ginabuhat Niya ang ingon nianang butang. Ang dalan paitaas maoy paubos, kanunay. Ipaubos ang inyong kaugalingon. Ayaw gayud pag-ingon, “Bueno, aduna ako og *ingon niini* ug *ingon niana*.” Wala gyud ka’y unsa man nga imo. Hinoon—hinumdumi lamang, kon anaa man ang grasya sa Dios kanimo, magmapasalamaton ka niini, ug magmapainubsanon tungod niini. Kita n’yo, padayon lang nga magpaubos sa inyong kaugalingon.

224 Karon kinahanglan kong magdali, tungod kay ang oras . . . Dili ko gusto nga dugayon pa kamo og ayo, tungod dili ko gusto nga hagoon kamo, kita n’yo. Aduna pa kita og taas-taas nga panahon sulod niining semanaha.

225 Karon, ug karon makita nato nga ang mga tawo nangahimo nang maantigo kaayo ug edukado na.

226 Karon gusto kong ipakita sa inyo ang usa pa ka butang. Ang—ang uban napahilayo na ngadto sa usa ka direksyon, nangahimo silang mga panatiko, sa pagpaninguha nga mamahimong relihiyoso. Karon, nasayod kita nga aduna kita og ingon nianang pundok. Kita n’yo? Mipaingon sila ngadto sa usa ka direksyon.

227 Dinha ako wala miuyon sa grupo sa mga kaigsoonan nga mibiya dinhi dili pa lang dugay palayo sa—sa dalan sa Kahayag. Sila, dili nila makita ang maong mga milagrang nagakahitabo gawas kon maghimo sila og ilang kaugalingong grupo, mao nga nagtigum sila didto sa Canada ug—ug nagtukod sila og

ilang grupo sa mga tawo nga ilang ipadala ug naghimo og mga apostoles ug mga propeta sa taliwala nila, ug ingon-anang mga butang. Ug dinha kini nahulog. Kita n'yo? Ug mamaingon niana kini sa kanunay. Kita n'yo? Nangahimo silang. . . Gibati nila nga tungod kay sila mga. . . nga ayaw nilang. . . Bug-os nilang ginakondena ang ubang butang, ug—ug kung unsa pa, hangtud nga napahilayo na sila hinoon paingon ngadto sa laing direksyon. Kita n'yo?

²²⁸ Adunay pundok nga grabeng pagka-intelektuwal, mabugnaw ug walay pagpakabana, ginasalikway ang tanan na lang. Ug ang uban usab napaingon sa ubang pundok, sa ubang pundok nga grabe ang hugpong sa emosyon, ug ginasalikway ang Pulong.

²²⁹ Apan ang tinuod nga matuod nga Iglesia nagapabilin lang dinha tunga sa dalan. Karon, kung inyong mahimatikdan, kini—kini—aduna kini og pagsabot sa Biblia sa kung unsa ang giingon sa Dios, ug kini—kini may igong pagka-espirituhanon aron mopadilaab sa sulod sa kasingkasing, ug kini mismo ang dalan. Miingon si Isaias nga kana ang mamahimong dalan. Giingon niya, “Didto may usa ka dalan. . .”

²³⁰ Ug ang mga gipanalanginan, balaan, bililhon kong mga higala sa iglesia Nazarene, usa kini ka gamhanang gamay'ng kalihokan nga gisugdan sa Dios, apan unsa ma'y ilang nadangtan? Sa diha nga ang Dios nagpasugod og pagsulti sa laing mga dila sulod sa maong iglesia, grabe sila ka relihiyoso ug grabe na sila ka pormal, nga ginatawag nila kadto og “yawa.” Ug nakita ba ninyo kung unsa ang nahitabo kanila? Kita n'yo? Kita n'yo? Sila, sila, “Mas balaan kami kay kaninyo.” Ug—ug busa makita nato nga ang tanan niadtong mga butang mipaingon sa pagka-binihi ug nangamatay dayon. Kita n'yo? Ug ang—ang uban pud nga pundok.

²³¹ Karon, ang usa ka pundok nahimong panatiko. Ang usa pud ka pundok nahimong bugnaw ug pormal.

Karon, giingon ni Isaias, “Didto may usa ka dalan. . .”

²³² Ug ang mga Nazarene, ug daghan sa tigulang na nga mga tawong holiness, nagaingon kaniadto, “Ang gipanalanginan nga karaang dalan! Himaya sa Dios! Nagalakaw kita sa karaang dalan!” Apan, hinumdumi ninyo, dili kana ang eksaktong giingon ni Isaias.

²³³ Ang ingon niya, “Didto may usa ka dalan, ug,” ang *ug* usa ka panugtong, “ug usa ka alagianan.” Ug kini dili pagatawgon ang dalan sa pagkabalaan, kondili, “Ang alagianan sa pagkabalaan.”

²³⁴ Karon, sa dalan sa pagkabalaan, ginapugos sa mga tawo nga himoon ang ilang kaugalingon nga balaan. Ug kung buhaton ninyo kana, susama lang kini sa ginaingon ko kaniadto, susama kini sa usa ka. . . Mamahimong sama ra kini sa usa ka buitre nga naninguha nga magbutang og mga balhibo sa salampati

diha sa iyang kaugalingon, aron nga mamahimong salampati pinaagi niini, samtang ang iyang kinaiya buitre ra gihapon. Kita n'yo? Siya, kini. . . Mamahimong sama ra kini sa usa ka uwak nga naninguha nga magbutang og—og mga balhibo sa usa ka salampati, o balhibo sa usa ka pabo, ug moingon, “Nakita n'yo, ako usa na ka matahum nga langgam.” Kita n'yo, usa kini ka butang nga hinimo-himo ra.

²³⁵ Apan ang pabo dili kinahanglan nga mabalaka kung magkaaduna man siya og mga balhibong pabo o dili. Ang salampati dili kinahanglan nga mabalaka kung magkaaduna man siya og mga balhibong salampati o dili. Kung ang iyang kinaiya usa ka salampati, magkaaduna gyud siya'y balhibo sa salampati.

²³⁶ Ug, kita n'yo, ang mga tawong holiness moingon, “Ang mga babaye kinahanglan adunay tag-as nga buhok ug magsul-ob og taas nga mga manggas, ug—ug tanan na niining mga butanga, ug taas nga mga sayal, ug dili magsul-ob og mga singsing sa kasal o unsa man nga matang sa alahas.” Kita n'yo, nahimo kining pagkabalaan nga pangkinaugalingon-nga-pagkamatarung. Kita n'yo? Kita n'yo? Kana—kana ang—mao kana ang hinimo-himong pagkabalaan. Apan ang tinuod nga Iglesia sa buhi nga Dios maoy. . . Ug tan-awa kung unsa ang nahitabo sa mga denominasyon. Karon silang tanan nagpaputol na sa ilang mga buhok, susama sa mga Pentecostal, ug—ug uban pa. Ug—ug silang tanan, halos, nanagsul-ob na og mga singsing ug uban pa. Tan-awa ang mga Pentecostal, sa mga nangagi nga mga tuig, kung giunsa nila kana pagsaway kaniadto, kita n'yo, ug, “Kami, ang iglesia! Kami, ang iglesia!”

²³⁷ Ang Iglesia mao ang Lawas ni Cristo. Usa kini ka indibiduwal, kauban sa ubang mga indibiduwal, nga natawo diha sa Gingharian sa Dios. Nagagawas kini nga gikan sa kinasuloran. Usa kini ka dipinugos nga pagkinabuhi.

²³⁸ Wala ninyo pangayoa sa usa ka carnero nga magkaaduna og pang-carnerong balhibo, o, pagpatubo og pang-carnerong balhibo, ang buot kong ipasabot. Dili kinahanglan sa maong carnero ang magpatubo og pang-carnerong balhibo. Moingon siya, “Karon, ang akong agalon gusto nga magkaaduna ako og mga balhibo niining tuiga. Kinahanglan ko kining mapadali.” Dili, ang bugtong butang nga kinahanglan niyang buhaton mao ang magpabilin lang nga usa ka carnero. Husto kana. Ang balhibo niya awtomatiko lang kining. . . Kini—kini. . . Awtomatiko lang kini motubo kaniya tungod. . .

²³⁹ Ug wala kita gihangyo nga magpagawas og mga bunga. Gitoohan kita nga mamunga gyud, kita n'yo, mamunga. Kita n'yo? Gitoohan kita nga mamunga gyud. Ug ingon nga usa ka nagapamungang kahoy sa Dios, uban sa Pulong sa Dios, pagapamatud-an sa Pulong sa Dios ang Kaugalingon Niini.

Magapamunga Kini basta ang Pulong anaa lang sa sulod dinha. Gisulti ni Jesus, “Kung kamo nagapabilin Kanako, ug ang Akong mga Pulong nagapabilin kaninyo, managpangayo kamo sa bisan unsa nga buot ninyo ug kini pagabuhaton.” Kita n’yo? Wala ninyo kini buhat-buhata. Wala ninyo ginapugos ang inyong kaugalingon paingon niini. Anaa na kini dinha, ug nagapadayon kini nga nagpadayon.

²⁴⁰ Karon ipapadayon nato, dalion lang, ingon nga pila na lang ka minutos ang nahabilin, ug dayon atong humanon.

²⁴¹ Karon, karon, ang uban mipaingon ngadto sa pagkapanatiko. Karon, mipaingon sila ngadto sa ubang direksyon. Ug naghunahuna sila, nga tungod kay sila nanaglukso-lukso, o nakaangkon og unsa nga matang sa sensasyon o emosyon, nagsulti sa laing mga dila, o—o—o nagpropesiya nga eksaktong nahitabo, o butang nga sama niana, naghunahuna sila nga Kini mao na, nga—nga anaa na kanila Kini. Apan, dili kini mao.

²⁴² Gisulti ni Jesus, “Daghan ang magaduol Kanako nianang adlawa, ug moingon, ‘Ginoo, dili ba nanaghimo man ako’g mga propesiya tungod sa Imong Ngalan? Sa Imong Ngalan nakapamuhat og daghang mga buhat, ug nagpagula og mga yawa?’” Moingon Siya, “Pahilayo, wala Ako makaila kaninyo.” Kita n’yo? Dili kini mao. Dili lagi mao, higala.

²⁴³ Mao kana ang hinungdan. . . Ug, ang pagsulti sa laing mga dila, ebidensya ba? Nagatoo ako sa pagsulti sa laing mga dila, apan wala ko kana ginadawat ingon nga mao ang bugtong ebidensya sa Balaang Espiritu. Dili, sir. Ang bunga sa Espiritu mao ang ebidensya. Kita n’yo? Oo. Karon, nakita n’yo, mao kana ang hinungdan nga dili ako uyon sa lihok sa Pentecostal nga mga kaigsoonan, nga ingon niana, nga moingon sila nga, “Kon ang usa ka tawo magsulti og laing mga dila, anaa na kaniya ang Espiritu Santo.” Dili ako mouyon. Dili kana’y timailhan nga naangkon na ninyo ang Espiritu Santo. Kita n’yo?

²⁴⁴ Nakadungog na ako og mga yawa nga nagsulti sa laing mga dila sa ingon ka paspas nga ilang mahimo, nanag-inom og dugo nga gikan sa bagolbagol sa tawo, ug motawag sa Yawa.

²⁴⁵ Nakakita na ako og mga Indian nga mikuha og mga bitin ug gibalikos palibot kanila, nga—nga—nga nagasayawsayaw diha sa ulan didto sa Arizona; gipataas ang ilang mga kamot nga sama *niana*, ug patuyok nga magdagandagan mismo. Mogawas ang maong barangan, nga ginasamaran ang iyang kaugalingon. Ug magbutang og usa ka lapis, ug magsulat kini diha sa laing mga pinulongan, ug ginahatag pa ang interpretasyon niini. Kita n’yo?

Busa, ayaw, ayaw na ko sultihi niana. Natigulang na ako niana. Kita n’yo?

²⁴⁶ Busa ang—ang bunga sa Espiritu mao ang—. . . miingon si Jesus, “Pinaagi sa ilang mga bunga,” dili sa pagsulti og laing mga

dila o mga emosyon, “apan pinaagi sa ilang mga bunga maila ninyo sila.” Kita n’yo? Busa mao kana ang bunga sa Espiritu. Ang Dios kini nga ginapaila ang Iyang Kaugalingon diha sa pagkamapainubsanon, kalumo, ug sa matag adlaw mao ra sa gihapon. May sa kung unsang butang bahin niini, usa ka tawo nga nagapabilin mismo sa Pulong. Sa matag higayon nga makita niya ang Pulong, ginapuntohan niya Kini og “amen,” bisan unsa pa ang ginaingon sa ubang tawo. Nga, ginatoohan niya gayud Kini, nakita n’yo. Sige. Kita n’yo?

²⁴⁷ Apan napahilayo na kita og husto, ingon nga, mosalig sa kung unsang panatisismo, ug anha na si Satanas sa mga tawo. Mao man kana ang buluhaton ni Satanas. Ug usa siya ka madanihon nga negosyante. Ug anaa na siya sa mga tawo, nga gipadahom sila nga nadawat na Kini nila tungod lang nga makahimo man sila og mga paglukso-lukso. Ug dayon dumtan ang inyong silingan? Dili. Kita n’yo? . . . ang—ang pagsulti og mga butang, ug ang pagsulti sa laing mga dila maanindot man, ug mga butang nga ingon niana.

²⁴⁸ Ug, hinumdomi, puede mong mahimo ang tinuod nga pagsulti og laing mga dila nga iya sa Espiritu Santo ug wala sa gihapon kanimo ang Espiritu Santo. Maoy giingon sa Biblia. “Bisan pa’g ako nagasulti’g pinulongan sa mga tawo ug sa mga Manulonda, ug walay gugma, kini walay kapuslanan kanako. Ako nahisama sa usa ka masaba nga agong, ug nagatagitingting nga piyangpiyang.” Unang Mga Taga-Corinto 13. Kita n’yo? Busa ayaw ninyo . . . Dili kini ingon niana, kita n’yo.

²⁴⁹ Miingon ang Methodist, “Niadtong pagsinggit namo, naangkon na namo Kini,” apan wala. Miingon ang Nazarene, “Sa dihang nagkinabuhi kono sila nga balaan, naangkon na nila Kini,” apan wala. Miingon ang Pentecostal, “Niadtong pagsulti namo og laing mga dila; didto namo Kini nadawat,” apan wala. Kita n’yo? Kita n’yo?

²⁵⁰ Ang Dios, ginapaila ang Iyang Kaugalingon, dili diha sa mga sensasyon. Dili, kanang . . . Mga sensasyon, hinoon, anaa man uban Niini. Nakita ba ninyo ang punto? Nagapaubos Kini og ayo hangtud nga makita Kini ni bisan kinsa, kung inyong—kung dili lang ninyo paninguhaon nga idugang, isulod Niini ang kaugalingon n’yong hunahuna, kita n’yo, ug ang inyong kaugalingon nga mga panghunahuna. Dios Kini.

²⁵¹ Karon, ug dayon nangahimo silang usa ka hugpong sa mga panatiko. Dayon, *ania* ang bugnaw nga mga pormal sa niining bahin; *ania* usab ang mga panatiko sa pikas bahin; ug *ania* ang Pangasaw-onon nga anaa mismo sa tunga niining tanan, nagapanawag sa niining duha ka bahin. Husto kana. Ang Dios nga ginapamatud-an Kini samtang nagpadayon Siya, sa Iyang Pulong.

252 Karon, oh, kinahanglan kong laktawan ang pipila niini tungod kay aduna ko og daghan pa dinhi. Ug ako—aduna ako’y . . . Ang akong oras hurot na. Dalion ko na kini kutob sa akong mahimo karon.

253 Sugod pa sa Eden, sugod pa sa Eden kini, dugay nang—dugay nang gipropesiya nga adunay moabot nga usa ka Mesias; gikan pa sa Eden.

254 Karon laktawan ko ang uban sa akong mga Kasulatan nga gisulat nako dinhi, ug mga mubong-sinulat, aron tapuson ang Mensahe, sa dili madugay, kung mahimo ko. Ang Dios nga mitago diha sa ubos nga mga butang. Karon, dalidalion ko na sa pagsulti, apan, bisan pa man, akong—gusto kong masabtan ninyo kini. Kita n’yo?

255 Gikan pa sa Eden, gipropesiya na kini nga adunay moabot nga usa ka Mesias. Gisulti-nang-daan kini kung unsang matang sa pagkatawo Siya. Mahimo kitang magdugay pa dinha. Kabalo mo gisulti sa Biblia, kung mamahimong unsa Siya, kung unsang matang sa pagkatawo Siya. Giingon ni Moises, “Ang Ginoo nga inyong Dios magapabarug og usa ka Propeta, nga sama kanako.” Nasayod sila nga kanang Mesias mamahimong usa ka propeta, ang matang sa ministerio nga magkaaduna Siya nga pagabuhaton Niya. Nagsulti na ang tanang mga propeta kung unsa ang Iyang pagabuhaton. Naghisgot sila mahitungod niini diha sa mga simbolo. Ug milagpas kadto mismo sa ilang mga ulo, ug milagpas ilalum sa uban pa kanila. Kita n’yo? Kita n’yo? Milagpas ilalum sa usa, ug milagpas ibabaw sa usa pa. Kita n’yo?

256 Sa takna nga miabot na Siya diha sa eksena sa maong panahon, ang mga tawo nga kanila gipadala Siya aduna sila og ilang kaugalingong interpretasyon kung mamahimong unsa Siya, diha sa ilang kaugalingong imahinasyon nga interpretasyon.

257 Wala sukad nausab ang Biblia. Ang Biblia sa kanunay mao ra gihapon. Mao kana ang hinungdan nga ginasulti ko, “Nagingon ang Kasulatan, ug ako magapabilin Dinha, ‘Ang Biblia dili puede hubaron og kinaugalingong panabot.’”

258 Busa, mga Methodist, mga Baptist, mga Pentecostal, ayaw paninguha nga ibutang Niini ang inyong interpretasyon, moingon, “Dili kana ang buot ipasabot Niana. Nagakahulogan Kini og *ingon niini*.”

259 Nagakahulogan Kini kung unsa lang gayud ang pagkasulti Niini, eksaktong ingon niana lang. Adunay miingon, “Unsaon man pagkahitabo niini?” Wala ako mahibalo kon unsaon. Dili ako ang mosulti niana. Ang Dios na ang bahala niana. Siya ang Usa Nga nagsulti niini, dili ako, kita n’yo, ug Siya na Mismo ang bahala.

260 Apan karon, apan, kini nga Mesias gipropesiya nang daan. Nagsulti na ang mga propeta sa eksakto kung unsaon Niya sa

pag-anhi, kung unsa ang Iyang pagabuhaton kung moabot na Siya. Apan, tungod lang sa ilang kinaugalingong interpretasyon niini, ngadto sa mga tawo! Ug sa pag-abot Niya, miabot Siya sa ingon ka ordinaryong paagi, sa ingon ka yano, hangtud nga ang tibuok pundok sa iglesia napandol niini. Husto ba kana? [Nagaingon ang kongregasyon, “Amen.”—Ed.] Didto, ang kadtong mga tawo nga natudloan. . .

²⁶¹ Ang usa ka tawo kaniadto dili mamahimong usa ka magtutudlo, usa ka sacerdote, gawas nga natawo siya sa kaliwatan, ni Levi. Ug, hunahunaa lamang, ang iyang kaapo-apo-apo-apo-apo-apohan mga sacerdote na kaniadto, nga dinha na nianang Pulong, sa templo, adlaw ug gabii.

²⁶² Pareho sa paring Katoliko o ministro nga usa—usa ka manununod ra nga ministro, gikan pa sa katigulangan, diha sa ubang mga simbahan, ug uban pa, “Ang akong kaapo-apo-apohan usa ka obispo sa Methodist. Ang akong lolo usa ka obispo, ug uban pa.” Kita n’yo?

²⁶³ Tanan niana, nagkinabuhi mismo sa Pulong, apan naghimo sila og ilang kaugalingon nga pamaagi niini. Ug nadawat kini sa ilang mga anak diha sa paagi nga naitudlo kini sa mga ginikanan. Hangtud, ang mga ginikanan nagtudlo niini nga mitipas na sa tinuod nga dalan, ug nagtukod sila og usa ka organisasyon gikan niini, hangtud, sa diha nga naningkamot ang Espiritu nga ipadayag ang Kamatuoran, dili na nila madawat Kini.

²⁶⁴ Ug mao ra kana sa gihapon karon. Dili ko tuyo nga magsinalbahis, apan tinuod kini. Mao ra kini sa gihapon karon. Ginahimo nila kini nga—nga komplikado kaayo, ug—ug sa kung unsa nga laing pamaagi. Ginatudloan nila ang ilang. . . Sama sa dugay nang ginaingon, “Ang Dios walay mga apo.” Kabalo na mo niana? Aduna ang Dios og mga anak nga lalaki, ug aduna Siya’y mga anak nga babaye, apan walay mga lalaking-apo ug mga babayeng-apo. Ang matag tawo kinahanglan magbayad sa mao ra nga kantidad ug moduol sa mao ra nga paagi. Pareho sa gibuhay sa inyong amahan, mao ra pud ang kinahanglan n’yong buhaton.

²⁶⁵ Karon, busa, Siya ordinaryo ra gyud. Sa dihang kining Mesias. . . Sulod sa upat ka libo ka tuig, ang matag propeta naghisgot mahitungod Kaniya; si David mikanta nga nagpahinungod Kaniya, ug lakip na ang tanan nga nagsunod. Ug sa dihang miabot Siya, ang mga tawo aduna na og ilang kaugalingon nga ideya, kung unsay Iyang siguradong pagabuhaton, kon unsaon Niya kini pagbuhay. Kung giunsa nila kini tanan pagpasabot, gi-drawing pa sa pisara ug tanan na, hangtud, sa dihang miabot Siya diha sa pinaka-yano nga paagi, kini—gibungkag niini og ayo ang ilang teolohiya. Kita n’yo, wala nila kini nahibal-an.

266 Miabot Siya sumala sa giingon sa Pulong. Karon, nagatoo ba mo nga ang Dios nagsulti pinaagi sa mga propeta, nga ang maong Mesias moabot sa usa ka pamaagi? Sayang lang nga wala na kita og usa pa ka oras unta nga mahisgotan kana ug masaysay kung unsay nahitabo kaniadto. Kita n'yo? Nahibalo kitang tanan kung unsa ang nahitabo kaniadto, bisan pa man, halos kitang tanan. Kung giunsa pagka-sulti sa Dios nga Siya moanhi, ug gisulti na kanang, "Ikaw, Betlehem sa Judea, dili ba ikaw ang labing ubos sa tanan. . . ." Ug ang tanan nang ingon niana, ug ang paagi sa pagbuhat Niya niini, ug kung unsa pa'y Iyang pagabuhaton. Kita n'yo?

267 Ug, bisan pa man, ordinaryo ra kaayo Siya! Hangtud, nanaglibog na kadtong mga bantugang eskolar, hangtud nga nangasipyat sila niini. Apan, kabalo mo nga si Jesus miabot nga dili sukwahi sa Pulong. Miabot Siya sumala sa giingon sa Pulong, apan sukwahi sa ilang interpretasyon. Kita n'yo? Nagtudlo Siya sa mga butang nga supak sa ilang pangsimbahang pagbansay mahitungod Kaniya.

268 Karon, miingon sila, karon, pananglitan, "Pag-moabot ang Mesias, siguradong, moadto gyud Siya didto sa templo ug moingon, 'Caifas,' o kon kinsa man ang labaw'ng sacerdote, 'miabot na Ako.' Moabot Siya nga kauban ang napulo ka-milyong-Angel nga nakasaludo. Ang Dios kono magaingon, 'Sige, mga kauban, sa niining dapita, usa—usa gyud kamo ka gamhanang iglesia. Kamo man ang Akong katawhan. Akong tuyokon kining pulohan ug tugotan nga mokanaug ang mga pasilyo sa Langit. Igapadala Ko ang Mesias nganha kaninyo, niining buntaga. Ipatugpa Ko kini mismo didto sa gawas sa nataran, ug paadtoa ang tanan nga mga tawo didto.' Ingna, 'Si Doctor *Ingon niini-ug-ingon niana*, ikaw ug si Doktor *Ingon niini-ug-ingon niana*, kamong tanan mahimong motindog didto sa unahan mismo, aron una kamong maghatag og katahuran Kaniya, nakita n'yo.'"

269 Karon ingon niana tingali nga butang ang ilang pagdahum sa karon. Karon, nahibalo ako nga usa kini ka medyo. . . Mora kini og madagmalon. Apan dili ko. . . Gipaningkamotan ko lang nga maghimo og usa ka punto.

270 "Ug—ug, kana, mao kana ang mahitabo. Ug kung dili kini moabot sa ingon niana nga paagi, dili kini husto; usa kini ka anticristo. Kita n'yo? Kon dili kini moabot sa ingon niana gayud nga paagi, usa kini ka anticristo, nakita n'yo, busa dili kini mao. Ug busa, pagkahuman, magkaaduna og usa ka. . . Dayon, ang sunod nga mokanaug, mao ang napulo ka-milyong-Manulonda nga nakasaludo, uban sa ilang mga panon. Ug mangtugpa sila didto sa nataran, kon diin didto gitukod ni Solomon ang templo, ug, oh, ang tanan mamaania dinhi ug dinha, sa niining balaang dapit kon diin dinha nangamatay ang mga balaan ug mga manggialamon, ug uban pa!"

271 “Oo,” miingon si Jesus, “kamong mga hipokrito! Kamo nga mga anak sa yawa!” Miingon pa, “Inyong ginadayandayanan ang mga pantiyon sa mga propeta, ug ang inyong mga amahan ang nagbutang kanila dinha.” Husto kana. Husto gyud kana. Kita n’yo? “Pila na ba ka matarung nga mga kalalaken-an ug mga propeta ang gipadala nganha kaninyo, ug sa gihapon gipamatay ninyo ang matag usa kanila!” Kita n’yo? Apan unsa kadtong mga gitawag Niya nga “matarung”? Ilang, ang ilang tawag kanila, “mga panatiko ug mga buangbuang.” Oo.

Didto, nagdahum sila nga sa ingon nianang paagi kini magaabot.

272 Apan, sa dihang, miabot Siya diha sa usa ka pasungan, gipanganak sa usa—usa ka ulay, nga usa lamang ka ordinaryong panday ang Iyang ama-ama, ug natawo sa usa—usa ka kabus, dili ilado nga dalaga. Kita n’yo, dili nga anak nga babaye sa labaw’ng sacerdote, o sa unsa man. Siya—miabot Siya ingon nga... gikan sa usa ka kabus ra nga gining nga Nagsuyo didto sa—sa gamay’ng, karaan na nga banwa nga ginganlan og Nazaret. Ug usa ka balo na nga lalaki; namatay na ang iyang asawa. Aduna siya’y pipila ka mga anak; si Jose. Ug—ug ang maong dalaga gikasaaran na niya. Ug busa miabot si Jesus nga nabulingan na ang dungog, sa sugod pa lang. Nanag-ingon sila nga Siya gipakatawo nga anak-sa-gawas. Oh, grabe!

273 Makalililang kana para sa ilang hinashasan nga gawi. Kita n’yo? Dili kana madawat sa ilang mga edukadong etiko. Ang ilang interpretasyon sa mga Kasulatan wala gyu’y nahibal-an mahitungod niana, apan bisan pa man mao kadto ang MAO KINI ANG GINAINGON SA GINOO. Oh, grabe!

274 Nagapakurog kanako, nga hunahunaon kini, ug makita ang mao ra nga butang nga nagakahitabo na usab. Ang Dios wala gayud nagakausab.

275 Alas dose na, apan akong... Mahimo pa ba ninyo, o, ihunong ko na, o ipadayon lang nato? [Nagaingon ang kongregasyon, “Ayaw.”—Ed.] Mao kana’y... Salamat. Magpabilin lang nga maglingkod sa makadiyut, kita n’yo. [“Ipadayon lang.”] Karon, kini, adunay butang nga igabasi ko dinhi alang sa usa ka Mensahe nga moabot, kita n’yo. Ug paninguhaon ko nga mapagawas na kamo sa gilayon, tingali sa mga sunod nga dies o kinse minutos, kung mahimo nato. Ang Dios magapanalangin kaninyo.

276 Matikdi, karon, pagkayano niini, nga kini—kini—nga ang ginapuntirya niini nasipyatan, nila. Apan naigo niini ang ginapuntirya sa Dios. Kita n’yo, naigo niini ang Pulong. Miabot Siya nga tukma gayud sa paagi nga giingon Niya. Apan, sila, ang ilang interpretasyon niini sayup. Ang interpretasyon mahitungod sa maong manluluwas sa panahon ni Moises sayup.

Ang interpretasyon usab sa panahon ni Noe sayup, kita n'yo, apan nagaabot ang Dios sumala sa Iyang Pulong.

277 Ug dayon miabot si Jesus, ug Siya—ug nagtudlo Siya og mga butang nga sukwahi kanila. “Kung Ikaw man ang Mesias, buhata ang *ingon niini-ug-ingon niana*,” nakita n'yo. “Kon Ikaw man, naug Ka diha sa krus wala nagapakig-komedyas sa amo karon.” Kita n'yo? Apan ang Dios wala nagapakig-komedyas sa mga tawo. Ginabuhat lang sa Dios ang mga butang nga makapahimuot ug husto.

278 Nagdahum sila nga ang Tawong ingon niana siguradong moabot nga inubanan og halangdon nga pagsaludo sa mga Anghel. Apan miabot Siya didto sa usa ka pasungan. Ug, para sa kaugalingon nilang hinashasan nga mga etiko, kataw-anan kini para sa usa ka tawong maghunahuna nga ang Dios nga Makagagahum sa tanan, ang halangdong makagagahum nga si Jehovah, Nga mao ang tag-iya sa yuta ug nagbuhat sa tanang mga butang, dili makaandam og usa ka dapit alang sa Iyang Kaugalingong Anak aron ipakatawo, dapit nga mas maayo kay sa tangkal sa baka diin nagkatipun-og ang hugaw. Giunsa man niini pagkahitabo . . . ? Kita n'yo?

279 Unsa man kana? Ang Dios nga anaa sa kasimplihan. Mao kana ang nakapahimo Kaniya nga daku. Kita n'yo, ang mga etiko sa edukasyon dili niini mahimong ipaubos ang kaugalingon niini nga sama niana; kita n'yo, dili niya madawat kini. Apan pagkadaku sa Dios nga gipaubos Niya ang Iyang Kaugalingon nga ingon niana, bisan sinina man lang wala Siya mapasul-ob sa Iyang Kaugalingong Anak. Hunahunaa kana! Ug ang kalibutan . . . Wala man lang og lawak sa balay-sak-anan. Ug miadto Siya sa usa ka pasungan sa baka, usa ka gamay'ng—usa ka gamay'ng nagsiwil nga kabatoan, usa—usa ka gamay'ng langob, mora og, luyo sa usa ka bungtod. Ug didto ibabaw sa usa ka higdaanang uhot miabot ang Anak sa Dios. Oh, dako kaayo kana nga kalainan kay sa tigumanan na didto . . .

280 Ug ang Iyang inahan buros na. Nakaplagan nga buros na ang iyang inahan, oh, pila na ka bulan nga wala pa sila nagkauyon nga magminyo, o, sa wala pa sila maminyo. Kita n'yo? Buros na siya. Ug nakita kadto sa mga tawo, ug nahibaloan nila nga sa ingon niadto kini nga paagi. Ug, si Maria, sa iya mismong kasingkasing, nahibalo siya kung unsa ang nahitabo.

281 Ug si Jose wala makasabot niini. Apan ang Manolunda sa Ginoo miadto kaniya sa gabii, nga nagaingon, “Jose, ikaw nga anak ni David. Ayaw pagpanuko sa pagpangasawa kang Maria nga imong asawa, tungod kay kana nga butang dili dautan, kondili iya kana sa Espiritu Santo.” Mao na kadto. Ang maong lalaki, si Jose, adunay ingon nianang pagpakig-kontak sa Dios, nga ang Dios makapapakig-estorya kaniya.

282 Apan sa karon naputos kita og ayo sa atong pangsimbahang mga jacket hangtud nga wala na'y makapakigsulti kanato, gawas sa pangsimbahang pundok nga ginapasakupan nato. Dili ko gustong mamahimong mabagison o radikal man, busa biyaan ko na lang mismo kini dinha. Himatikdi. Apan nasabtan ninyo kung unsa ang buut kong ipasabot. Matikdi.

283 Kataw-anan ang maong pasungan, alang kanila, nga mga hinashasan. Wala man lang kita og unsa mang rekord kung asa Siya nga eskuwelahan nakatambong; ug bisan pa niana, sa edad nga dose anyos, ingon nga usa ra ka yanong Batang-lalaki gipakaulawan Niya ang mga sacerdote sa templo, pinaagi sa Iyang pagtulon-an. Oh, grabe! Unsa man kini? Ang Dios nga nagatago sa Iyang Kaugalingon diha sa katalamayon. Mabati ko ang pagkarelihiyoso karon. Ang Dios nga nagatago sa Iyang Kaugalingon sa usa ka tangkal. Ang Dios nga nagatago sa Iyang Kaugalingon diha sa usa ka gamay'ng Bata. Kita n'yo? Bantayi, maipasundayag kini, sa dili madugay, sa gihapon, kita n'yo.

284 Gikinahanglan Niya nga mag-. . . Siya. . . Asa man Siya moagi nga dalan. Ang mga ginikanan, sa walay pagduhaduha, magsulti ug moingon, "Ayaw pagpakigdula nianang Bata. Ayaw pagpakighilambigit Kaniya. Ang inahan Niya wala'y lain kondili usa ka bigaon, kita mo. Ug, ang amahan ug inahan niana, natawo ang maong bata. . . Sa wala pa sila gikasal, buros na ang inahan. Ayaw gyud pagpakighilambigit niini."

285 Siguradong grabe gyud ang gihunahuna ni Maria! Apan, walay sapayan nianang tanan, bisan unsa pa ang gihunahuna sa mga tagagawas, ginapamalandongan niya ang tanan niining mga butang. Gitipigan nila kini sulod sa ilang kasingkasing. Nasayod gyud sila. Wala sila'y masulti og unsa mang dautan nga batok niini.

286 Nagapakig-estorya ang Dios sa Iyang tawo, usahay, moingon, "Hilum ka lang. Ayaw pagsulti og bisan unsa man bahin niini."

287 Aduna ko'y mga tawong nanambong sa akong panagtigum nga moingon, "Bueno, kung ikaw usa ka alagad ni Cristo, kabalo ka nga nagakahitabo na *kini* didto."

288 Sigurado, nasayod ko nga nagakahitabo kini. Apan dayon unsa ma'y mahimo mo sa dihang nagaingon Siya, "Maghilum ka. Ayaw pagsulti og bisan unsa man bahin niini?"

289 Gidala ko ang pipila ka tawo sa miaging adlaw, ug gipakita kanila, diha sa usa ka libro. "Adunay nagsulti, mga tuig na ang milabay," ingon ko.

Miingon, "Bueno, dili ko kana masabtan."

290 Ingon ko, "Nakita ba ninyo dinha?" Ania kini, nakasulat dinha, aduna pa'y petsa ug tanan na, sa dihang nahitabo kini didto. Daghang mga tawo ang nakakita niini nga nakasulat sa

libro. Ingon ko, “Mahitabo gayud nga kini mamaingon *nini* ug mamaingon *niana*.”

²⁹¹ Miingon, “Bueno, nganong wala ka ma’y gisulti mahitungod niini?” Kini maghinung-. . . Kinahanglan mahitabo kini sa nianang paagi. Kita n’yo?

²⁹² Ug dunay lahi nga nahibaloan si Jose. Nasayod siya kung kang Kinsa gikan kana nga Bata. Nasayod usab si Maria kung Kinsa Kini. Nasayod si Jesus kung Kinsa ang Iyang Amahan. Unsa man ang giingon Niya? “Kinahanglan Akong magapadayon sa buluhaton nga iya sa Akong Amahan.” Dili pagpanggabas og kahoy ug—ug pagpanghimo og pultahan; kondili sa mga buluhaton nga iya sa Iyang Amahan. Amen. Sa Iya kanang inahan giingon, “Dili ba nimo masabtan nga, Ako, panahon na alang Kanako nga magapadayon sa buluhaton nga iya sa Akong Amahan?”

²⁹³ Karon, naghunahuna sila, “Kining buangbuang nga Bata. . .” Basta anak sa gawas mora og salikwaut, talagsaon, bisan unsaon. Ug mao kana, kita n’yo, apan, dinha ginatago sa Dios ang Iyang Kaugalingon. Paminaw. Ginatago sa Dios ang Iyang Kaugalingon sa kung unsa ang ginadahum, sa kalibutan, nga, “Kahugawan, dunot, ilihitimo.”

²⁹⁴ Tan-awa, gitago sa Dios ang Iyang Kaugalingon diha sa dunot na nga patay’ng binhi, aron maghatud og kinabuhi. Kita n’yo? Nasabtan ba ninyo kini?

²⁹⁵ Ginatago sa Dios ang Iyang Kaugalingon diha sa usa ka yano ra, nga labandera. O sa usa ra ka ordinaryong tawo nga sipitsipit sa iyang buktion ang iyang pampaniudto, ginahalokan sa pagbabay ang iyang asawa ug mga anak, ug moadto na, ug mahimong itago sa Dios ang Iyang Kaugalingon nianang tawo aron mobuhat og usa ka butang nga wala gyu’y nahibal-an ang arsobispo og bisan unsa man niini. Kita n’yo? Dili ninyo Siya madungog nga nagabudyong ug imantala gyud kini. Siya, basta ang Dios, mahimaya na lang, kana lang. Madungog kini sa mga yanong tawo ug nangalipay sila, kita n’yo.

²⁹⁶ Karon, ginatago sa Dios ang Iyang Kaugalingon diha sa kayano sa maong Bata, ginatago ang Iyang Kaugalingon diha sa kayano sa usa—usa ka ordinaryong pamilya. Ang Dios! Ug ang mga ministro, ug ang bantugan nga mga tawo, ang mga edukado, ang mga utokan, ug—ug silang tanan, ug ang mga Herodes, ug uban pa, niadtong adlaw, ug ang mga Nero, ug silang tanan wala-makita kini. Nagatago ang Dios diha sa katalamayon.

²⁹⁷ Karon, sa pagdali. Si Juan nga Bautista, diha sa Isaias 40. Puede nato kining basahon kon gusto ninyo. Malaquias 3. Ang tanan, oo, isulat n’yo kung gusto ninyo. Sa Isaias 40, tanan, kabalo na mo, nagahisgot kini og kalinaw sa . . . ingon sa gisulti niini. Tingali akong . . . Maayo tingali nga akong—akong—basahon ko kini mismo dinhi, kon kamo aduna—aduna kamo

og igo pang oras. [Nagaingon ang kongregasyon, “Amen.”—Ed.] Basahon nato kini, sa makadiyut lang. Ablihon nato dinhi sa Basahon sa Isaias, ang ika-40 nga kapitulo, ug—ug basahon dinhi ug tan-awon kung unsa ang ginaingon niya bahin niini karon. Tan-awa dinhi, “Paglipay kamo, paglipay kamo akong katawhan.” Karon, hinumdomi, pito kini ka gatus ug dose ka tuig. Tan-awa sa ulohan niini, kita n’yo. Pito ka gatus ug dose ka tuig sa wala pa siya natawo, ania ang usa ka propeta nga naghisgot mahitungod kaniya.

Paglipay kamo, paglipay kamo akong katawhan, nagaingon ang GINOO.

Pagsulti kamo og pagpahalipay nga mga pulong ngadto sa Jerusalem, ug singgiti siya, nga ang iyang panahon sa gubat natapus na, nga ang iyang kasal-anan gipasaylo na: nga nakadawat na siya . . . pinilo gikan sa kamot sa GINOO tungod sa tanan niyang mga sala.

Ang tingog sa usa . . . nagasinggit diha sa kamingawan, Andama ninyo ang dalan sa GINOO, himoang patag ang iyang dalan diha sa kamingawan, ang usa ka halapad nga dalan alang sa atong Dios.

Ug ang tagsatagsa ka walog pagabayawon, ug ang tagsatagsa ka bukid ug bungtod pagapaubson: ug ang dili patag pagahimoong patag, ug ang gansanggansangon . . . pagahimoon nga mapatag:

²⁹⁸ Oh, grabe, grabe! Grabe kana nga tawo pag moabot! Kita n’yo? Karon abliha sa Malaquias, uban kanako, ang ulahing Basahon sa . . . ang kaulahian sa mga propeta diha sa Daang Tugon. Karon, sa Malaquias, paminaw niini. Gihisgotan kini ni Malaquias, sa katapusang panahon niadto, aron masigurado nga dili ninyo kini mahikalimtan. Malaquias, ang ika-3 nga kapitulo.

Ania karon, Akong ipadala ang akong sinugo, ug siya magaandam sa dalan sa atubangan ko: ug ang Ginoo, nga inyong ginapangita, moabut sa hinanali sa iyang templo, bisan ang sinugo sa tugon, nga inyong gitinguha: ania karon, siya moabut na, nagaingon ang GINOO sa mga panon.

²⁹⁹ Nagahisgot kini sa gihapon kang Juan, “Ipadala ang Akong sinugo nga magauna Kanako, aron magaandam sa dalan.” Naghisgot usab si Jesus mahitungod niini, diha sa Mateo 11:10, miingon:

Kung madawat ninyo kini, siya mao kadtong gihisgotan, Ania karon, igapadala Ko ang Akong magsasangyaw nga magauna Kanako, . . .

³⁰⁰ Kita n’yo? Husto kana. Karon, kining tanan gihisgotan na kaniadto! Kaniadto pang, pito ka gatus ka tuig, nga adunay

moabot nga magauna sa dili pa moabot ang Mesias. Apan sa dihang miabot na si Juan sa esena, sa ingon ka yanong paagi, wala nila siya nailhan. Nasipyanon nila siya.

³⁰¹ Karon, hinumdomi, anak siya sa usa ka pari. Bueno, tanawa kon unsa ka katawanan kadto alang kaniya nga wala misunod sa buluhaton sa iyang amahan, ang mag-eskuwela sa seminaryo. Apan ang iyang trabaho mahinungdanon kaayo. Sa nuebe anyos ang panuigon, miadto siya sa kamingawan. Ug paggawas niya didto, nagawali na siya. Wala nila makita kini. Siya yano ra kaayo, yano ra kaayo, para sa ilang hataas-ughinashasan nga edukasyon aron toohan ang usa ka tawo nga sama niana. Nagdahum sila, nga pagmoabot kini nga tawo . . .

³⁰² Unsa na kanang, “Tanan nga hatag-as nga mga dapit pagapaubson, ang tanan nga ubos nga mga dapit pagapatason, ang tanan nga gansanggansangon nga mga dapit pagapatagon?” Nakita kadto ni David, ug miingon, “Ang—ang kabukiran minglukso sama sa mga lakeng carnero, ug ang mga dahon nanagpakpak sa ilang mga kamot.” [Ginapakpak ni Igsoong Branham ang iyang mga kamot pila ka higayon—Ed.]

³⁰³ Unsa man? Nahitabo ba kini? Usa ka tigulang nga bungotong-tawo nga sama niana, nga wala man lang og edukasyon, nga naputos ra og panit sa carnero, susapinday nga migawas gikan sa kamingawan sa Judea, nga nagaingon, “Maghinulsol kamo, kay haduol na ang Gingharian sa Langit. Ug kamong pundok sa mga bitin, ayaw paghunahuna nga moingon, ‘Miyembro ako sa usa ka organisasyon.’ Kay mahimo man sa Dios nga patindogon kining mga bato nga mamahimong nga anak alang kang Abraham.” Grabe!

“Bueno, dili man siya ang atua didto. Nahibalo kita nga dili siya kadto.”

³⁰⁴ Apan siya gayud kadto! Kita n’yo, ginalimpyohan lang niya ang dalan. Kita n’yo? Mao kadto ang panahon nga ang gansanggansangon nga mga dapit gihimong patag. Didto kon diin gipaubos ang hatag-as nga mga dapit. “Ayaw paghunahuna nga amahan ninyo si Abraham. Ayaw gyud ko sultihing og ingon nianang mga butang, kay mahimo sa Dios nga patindogon kining mga bato nga mamahimong mga anak ni Abraham.” Ang hatag-as nga mga dapit gipaubos. Oh, grabe! Mao kana. Oo. Nakita ba ninyo ang kalainan? Nag-ingon na Siya nga mao kana ang magakahitabo.

³⁰⁵ Ug sa dihang didto sila, naghunahuna sila, oh, grabe, andam na unta sila nga dawaton siya, kung miapil siya sa ila mismong organisasyon. Apan tungod kay . . . Miabot man siya nga ingon niana, sa ingon ka yanong paagi. Bisan pa niana, sa paginterpretar sa Kasulatan, ang hatag-as nga mga dapit gipaubos man gyud. Dili nila kadto madawat, apan gipaubos gyud sila.

306 Aba, gipangsapsap niya sila. Gipangpanitan niya sila. Miingon, “Kamo nga panon sa mga bitin! Kamo nga mga bitin sa kasagbotan! Sultihan ko kamo, ang atsa napataop na sa gamot sa kahoy. Ug ang matag kahoy nga wala nagapamunga, kini pagaputlon ug isalibay ngadto sa kalayo. Ako sa pagkamatuod nagabautismo kaninyo sa tubig, apan adunay Usa nga nagasunod kanako, nga Siya labi pang gamhanan kay kanako; Siya magabautismo kaninyo sa Espiritu Santo ug Kalayo. Ang Iyang nigong-paliran anaa sa Iyang kamot. Ug Iyang pagahinloan pag-ayo ang giukanan. Ug Iyang dal- . . . pagasunogon ang mga uhot; ug dalhon ang trigo ngadto sa dapa.” Amen.

307 Mao na kadto ang panahon nga ang gansanggansangon nga mga dapit gipangpatag, kita n’yo, apan wala kadto masabti sa mga tawo. Apan eksaktong nakasubay kadto sa Pulong, eksakto gyud sa kung giunsa pagsulti sa Pulong. Yano ra kaayo, nga wala nila kadto makita. Nasipyat silang makita kadto.

308 Ayaw gayud pagpakabuta nga sama niana. Kita n’yo? Ayaw kamo pagpakabuta nga sama niana. Busa, paminawa, karon.

309 Wala nila makita kadto. Siya yano ra kaayo, tungod sa ilang naandan nang pagtan-aw sa usa ka tawong sama niana, nga wala niya makita kini. Hinoon, unsa man kini? Ang Dios, kinsa mao ang Pulong, nagatago diha sa katalamayon; dili usa ka pari nga nakapilo ang iyang kuwelyo, maantigo, edukado.

310 Gipangutana sila ni Jesus sa mao ra nga butang. Miingon Siya, “Unsa man ang inyong giadto didto aron makita?” Sa dihang mianha ang mga tinun-an ni Juan. Miingon, “Unsa man ang inyong giadto aron makita? Nangadto ba kamo didto aron makita ang usa ka tawo nga nagsul-ob og pang-pari nga kupo, kabalo na mo, ug panapton nga hamili,” miingon Siya, “kana—kana—kana nga matang sa magwawali?” Miingon Siya, “Nangadto ba kamo aron makita kana?”

311 Miingon, “Dili. Silang mga matang nga mohalok sa mga kabataan, ug, kabalo na mo, ug nagalubong sa mga patay. Sila, wala gyud sila’y nahibal-an mahitungod sa duha-kapulohan nga espada didto sa natad sa panggubatan. Atua sila didto nagahatud og intelektuwal nga mga pagpanulti, ngadto sa kung unsa nga Kiwanis Club o unsa man, kabalo na mo. Okey man sila pag mga ingon niana. Apan paghisgotan na gani ang pagpakigbugno, aron atubangon kini, wala sila’y himbangkaagan mahitungod niini. Sila—sila, atua sila sa mga palasyo sa hari. Nakig-uban-uban sila sa ingon nianang matang sa mga tawong popular.”

312 Apan miingon, “Kung ingon niana unsa man ang inyong giadto aron makita? Nangadto ba kamo aron makita ang usa ka tigbaw nga ginapalid-palid sa hangin? Mahimong moingon ang usa ka tawo. . . Adunay moingon, ‘Kabalo mo, miyembro man

gud kamo sa—miyembro man gyud mo sa Oneness; apan kon mobalhin kamo dinhi sa Assemblies, sultian ko kamo kon unsa ang akong buhaton, atong—atong buhaton kini . . .’ ‘Nagatoo ko nga mabuhat ko kana.’ Huh! Usa ka bagakay, ginapalid-palid? Dili ingon niana si Juan. Dili, dili. Dili, dili. ‘Kon moanhi ka, magpaka-Saduceo ka ug kung dili ka Fariseo, o unsa man, ingon niana?’ Wala ka’y makita nga ginapalid-palid sa hangin; dili ingon niana si Juan.” Dili, sir, igsoon; dili siya ingon niana.

³¹³ Miingon Siya, “Kung ingon niana unsa man ang inyong giadto aron makita? Usa ba ka Propeta?” Nagkinahanglan kini og usa ka propeta aron mahimo kana, kita n’yo. Miingon Siya . . . Karon, mao kana ang ebidensya sa usa ka propeta, kita n’yo, ang Pulong sa Dios nga nagauban kaniya. Ang Pulong nagaabot ngadto sa propeta. Kita n’yo? Miingon, “Unsa man ang inyong giadto aron makita? Usa ba ka propeta?” Miingon, “Oo, husto kana. Apan, sultihan Ko kamo, nga labaw pa siya sa usa ka propeta, kay mao man kana siya.”

³¹⁴ Nganong mas labaw pa siya kay sa usa ka propeta? Siya mao man ang mensahero sa Pagpakigsaad, siguradong ingon niana siya, aron magtulay sa balaod ug grasya. Siya ang kinatung-ang bato, kaniadto, nga gisulti nang daan.

³¹⁵ Miingon Siya, “Kung makadawat kamo niini, mao kini siya nga gisulti sa propeta, ‘Ania karon,’ sa Malaquias 3, ‘Akong igapadala ang Akong sinugo una Kanako, kita n’yo, ug siya magaandam sa dalan sa atubangan Ko.’” Kita n’yo? Oh, Siya yano ra kaayo. Ang Dios nga nagatago na usab diha sa kayano.

³¹⁶ Dayon bantayi kung unsa ang gibuhat niya. Giwali niya ang usa ka umaabot nga gamhanang Cristo, “Gigunitan Niya sa Iyang kamot ang Iyang nigong-paliran. Iyang . . . Ginahawanan Niya ang Iyang dalan. Bueno, ang buut kong ipasabot, pagahinloan Niya og ayo ang Iyang giukan. Kuhaon Niya ang mga basura, ug silhigon kini og ayo ug sunogon kini, usab. Husto kana. Pagatigumon Niya ang trigo ug dalhon kini pasulod sa dapa.” Kita n’yo, dinihogan siya.

³¹⁷ Apan niadtong miabot si Jesus, nagpaabot sila sa . . . Ug silang tanan nga mga apostoles, kabalo na mo, nagahulat sila kaniadto sa kung unsa nga dakung butang nga magaabot. “Grabe, grabe! Oh, moabot Siya. Mamaingon niana gyud kini. Aba, mamahimo Siyang gamhanan. Pagapapason Niya sila nga mga Romano ibabaw sa yuta. Grabe! Pangabogon Niya silang mga Griego paingon *niining* direksyon, ug ang mga Romano paingon *niana* usab, pag moabot na Siya.”

³¹⁸ Pag-abot Niya, usa ra ka makaloolooy’ng kabus nga tawo nga ginatukmod-tukmod lang gikan sa usa ka daplin ngadto sa usa pa. Unsa man kadto? Ang Dios nga ginatago ang Iyang Kaugalingon diha sa katalamayon. Oh, grabe!

319 Dayon mibarug Siya pagkahuman sa Iyang Mensahe, ug miingon, “Kinsa ba ang makahukom Kanako og silot tungod sa sala? Kung unsa tanan ang gisulti sa Biblia nga Akong pagabuhaton...Kung wala Ko ginabuhat ang mga buhat sa Akong Amahan, kung ingon niana hukman ninyo Ako. Apan unsa man ang giingon sa mga Kasulatan nga Akong pagabuhaton, nga wala Ko buhata?” Sala ang dili-pagtoo, kabalo na mo. “Kinsa man kaninyo ang makaakusar Kanako? Kung maghingilin Ako’g mga yawa pinaagi sa mga tudlo sa Dios, nan ipakita Kanako kung unsa ang inyong ginabuhat mahitungod niini.” Yano kaayo!

320 Bisan pa man gitugyan Niya ang Iyang Kaugalingon ngadto sa kamatayon! Apan, oh, niadtong buntag sa Pagkabanhaw, alelluyah, didtong higayon Niyang gihinloan ang giokanan. Gisilhig Niya ang basura, husto, igsoon. Oo, sa pagkatinuud. Ug ang trigo naselyohan na ngadto sa dapa. Nagapahulay ra dinha sa yuta, nga may Kinabuhing Walay Katapusan sa sulod niini, nagapaabot alang nianang dakung Adlaw nga atong ginahisgotan, ang Pagbalik sa Ginoo, kon diin kana nga kinabuhi mabanhaw ngadto sa Kinabuhi; ug mangbangon kita nianang pagkabanhaw, pagasakgawon uban Kaniya diha sa kahanginan, ug pagatigumon ngadto sa Dapa. Ug ang mga basura pagasunogon didto sa halayo; ang tipaka nga nagputos niini, ug nga mga naninguhang birahon Kini ngadto *niining* direksyon o *nianang* direksyon, pagasunogon sila sa kalayo nga dili maugdaw. Amen. Oh, dili ba makahibulongan Siya? [Nagaingon ang kongregasyon, “Amen.”—Ed.]

321 Wala nila Siya maila, ang Dios diha sa kayano. Ngano? Ngano man? Wala man lang Siya magwali sa mga terminong pangsimbahan. Wala gayud. Wala Siya miwali nga sama sa usa ka magwawali. Kita n’yo? Nagwali Siya nga sama sa usa ka...Naggamit Siya og yanong mga termino nga iya sa Dios, ang mga terminong sama sa “napadulot na ang atsa,” ang mga terminong “ang kahoy,” ang mga terminong “mga bitin.” Dili ingon nga usa ka magtutudlo sa seminaryo, sama sa mga ministro niadtong panahon, sama sa usa ka Doktor sa Dibinidad, Doktor *Ingon niini-ug-ingon niana*. Wala Niya buhata kana. Nagwali Siya didto nga sama sa usa ka tagalasang. Naghisgot Siya mahitungod sa mga atsa, ug mga kahoy, ug mga bitin, ug mga butang nga sama niana, ug trigo, ug mga dapa, ug tanan na nga sama niana. Mahimo Siyang isipon, sa karon, siguro, ingon nga usa ka magwawali diha sa dalan. Siguro gitawag Siya kaniadto ingon nga usa ka “tuud nga magwawali” niadtong adlaw, nagatindog ibabaw sa usa ka tuud nga atua didto sa Jordan. Sigur-...Ang Dios diha sa kayano, nga nagatago gikan sa kaalam sa kalibutan.

322 Karon hibaloon nato. Nag-ingon si Jesus, “Nagapasalamat Ako Kanim, Amahan, nga Imong gililong kining mga butanga

gikan sa mga makinaadmanon sa kalibutan, ug ginapahayag hinoon ngadto kanila nga mga bata nga makakat-on pa.” Kita n’yo? Ang Dios nga nagtago diha sa kayano, kang Cristo. Ang Dios nga nagtago diha sa kayano, kang Juan. Kita n’yo? Basta . . . Kita n’yo, Siya—Siya maoy . . . Hunahunaa lang kini, ang Dios diha sa kayano, nga ginatago ang Iyang Kaugalingon gikan sa kaalam nga iya sa kalibutan.

³²³ Karon mahuman na kita, sa mga usa ka minuto, o duha, tungod kay dili ko gustong padugayon kamo dinhi.

³²⁴ Tan-awa, mohunong kita sa kadali, usa kini ka personal nga butang. Hunahunaa ang adlaw nga atong gikapuy-an, sa pagtapos na niini karon. Pamalandunga ang adlaw nga atong gikapuy-an, sa dihang ang Dios nagaabot diha sa usa ka luoy ug karaan nang kabus nga dapit nga atong ginapuy-an, ginaayo ang mga ma’y sakit. Ug para sa mga adunahan, ug sa mga mapahitas-on, ug sa batid-nga-mga-eskolar, “Ang mga adlaw sa mga milagro milabay na. Wala na’y ingon nianang butang nga sama sa Balaanong pagpang-ayo.”

³²⁵ Nadumdoman ba ninyo ang Mensahe nga akong giwali gikan mismo sa niining dapita, niadtong buntag nga mibiya ako, mahitungod kang David ug Goliath?

³²⁶ Miingon, “Unsaon man nimo pag-atubang sa mga edukado sa kalibutan nga atua didto, Igsoong Branham, uban sa tanan Niini?”

³²⁷ Ingon ako, “Wala ko’y mahimo kung unsaon ko kini sa pag-atubang. Ang ingon lang sa Dios, ‘Lakaw ka.’” Kita n’yo? Kana lang, kita n’yo. Kini ang Iyang Pulong. Gisaad Niya Kini. Ania na ang maong takna.

³²⁸ Sa dihang ang Manolunda, nga inyong makita nianang hulagway dinha, mikunsad didto sa suba niadtong adlaw, magtrayntay-tres na ka tuig ang milabay sa niining umaabot nga Hunyo, o magtrayntay-tres na ka tuig ang milabay, diay, niining umaabot nga Hunyo; ug miingon, “Maingon nga si Juan nga Bautista gipadala,” sa atubangan didto sa lima ka libo ka mga tawo o sobra pa, “moabot ang takna nga ang imong Mensahe mokaylap sa tibuk kalibutan.”

³²⁹ Nadumdoman ba ninyo ang mga pagsaway, kung aduna man kaninyo ang atua didto. Siguro, si Roy Slaughter, o ang uban kanila nga naglingkod dinhi, makahinumdom tingali sa maong adlaw; o ang uban, si Mrs. Spencer, o—o kinsa man sa uban sa mga dugay na nga mga tawo dinhi nga tingali—nahibalo tingali, kita n’yo; si George Wright, o ang uban pa kanila, kita n’yo, nasayod sila niana, kung unsa ang nahitabo kaniadto. Apan dili ba nahitabo man Kini didto? [Nagaingon ang kongregasyon, “Amen.”—Ed.] Gibuhat Kini didto.

³³⁰ Ug dayon sa taliwala nila, niadtong gisalikway nila, ug miingon, “Usa lamang kini ka pagpang-ayo nga sa hunahuna

lang.” Ug gibalikan kini sa Dios ug nagpadala og usa ka tigulang, dili-makasulti nga opossum didto, ug giayo kini pinaagi sa Gahum sa Dios.

³³¹ Si Lyle Wood ug si Banks, samtang nagalingkod kami didto, ug nasaksihan ang Kamatuoran nga gipanghimatud-an sa Dios. Sa dihang, ang usa ka makaloolooy’ng, patay na nga minnow, nga isda, naglutaw-lutaw na lang didto sa tubig. Ug ang Balaang Espiritu nagsulti, usa ka adlaw sa wala pa kadto, nga igapakita Niya kanila ang Iyang Himaya ug aduna Siya’y usa ka butang nga buhaton. Ug niadtong buntaga, samtang atua mi didto, ug ang Espiritu Santo miabot diha sa sakayan, ug mitindog ako ug misulti sa maong isda. Ug kini naglutawlutaw sa tubig, nga patay na, mga tunga na sa oras; nanggawas na diha sa iyang baba ang mga hasang ug mga tinai niini. Nabuhi kini, ug milangoy palayo sa ingon nga mahimo niini sama sa uban pa nga isda. Unsa man kini? Ang Dios nga ginatago ang Iyang Kaugalingon diha sa kayano.

³³² Ang Dios makahimo niining mga bato sa pagpatindog og mga anak alang kang Abraham. Ang Dios makahimo sa pag-ayo og usa ka opossum, o usa ka isda, o unsa man. Kon ipadala Niya ang Iyang Mensahe, ug ang mga tawo dili magatoo Niini, mahimo sa Dios nga magpabangon og usa ka opossum aron toohan Kini. Alelluyah! Mahimong buhion sa Dios ang usa ka patay’ng isda. Mahimong buhion Niya ang patay’ng opossum. Mahimo Niya. Mahimo Niyang buhaton ang unsa mang butang nga gusto Niyang buhaton.

³³³ Daw sa unsa kini nga pagbadlong sa niining henerasyon! Sa dihang nangapandol sila Niini, ug makiglantugi pa tungod Niini, ug, “Wala mo gibuhat *kini* ug *kana*.” Ug nagpadala ang Dios og usa ka yanong mananap. Kita n’yo? Daku kini nga pagbadlong! Unsa man kadto? Ang Dios diha sa kayano, kita n’yo, nga gipadayag ang Iyang Kaugalingon nga daku kaayo, oh, grabe, nga ginabadlong kining mga tawo niining henerasyon, tungod sa ilang dili-pagtoo.

³³⁴ Karon, naghunahuna sila karon nga sama gayud sa kung unsay gihunahuna nila sa una pa, nga kinahanglan mamahimo kini nga subay gayud sa kaugalingon nilang pamaagi. “Karon, kung aduna ma’y ingon nianang butang nga sama sa Balaanong pagpang-ayo. . .” Sama, sa usa ka tawong Katoliko nga nagsulti kanako niini. Usa ka lalaki, sa miaging gabii, nagsulti kanako bahin niana. Kabalo na mo bahin niini. Miingon. . . Kining si Ayers, nga giadtoan ko aron makita ang mahitungod sa iyang anak nga lalaki didto sa Houston, miingon siya—miingon siya, “Bueno, karon, kon—kon usa man kana ka gasa sa Dios, kinahanglan nga moabot usá kini sa iglesiang Katoliko.” Nakita n’yo? Tan-awa? Oo, ang mga Methodista pud naghunahuna nga kinahanglan gyud nga moabot usá Kini diha sa ilang iglesia. Ug ang mga Pentecostal pud naghunahuna nga kinahanglan nga

moabot usá Kini sa ilang iglesia. Apan wala gayud Kini miabot sa bisan usa kanila.

335 Nagaabot Kini diha sa Gahum sa pagkabanhaw ni Jesus Cristo nga ginapadayag ang Iyang Kaugalingon. Husto kana. Siguradong, ingon niana ang ginabuhát Niya. Oo. Bantayi lamang Kini. Ayaw itugot nga molagpas lang Kini kaninyo. Tipigi Kini ilalum sa inyong—inyong kasingkasing, ug hinumdomi Kini. Hinuktoki Kini dinha.

336 Kinahanglan nga moabot Kini sa ilang kaugalingong paagi, alang sa ilang, nga gikan gyud sa ilang kaugalingong denominasyon. “Ug gawas nga ingon niana kini, dili kana mao Siya, kita n’yo. Usa lamang kini ka sikolohiya, o iya kini sa Yawa. Usa kini—usa kini ka . . . Dili kini iya sa Dios. Tungod kay, kung iya man kini sa Dios, kinahanglan nga moabot Siya,” diha sa ilang kaugalingong paagi, nakita n’yo, “sa paagi gayud nga pag-interpretar namo Niini.”

337 Mao kana kono nga kinahanglan si Jesus moabot diha sa mga Fariseo. Kinahanglan nga ingon niana gyud kono nga paagi. Kita n’yo? Kung ang ilang . . . Kung ang Dios kono magpadala—magpadala man og usa—usa ka Mesias, kinahanglan sila gyud ang mag-interpretar niining tanan kung sa unsang paagi Siya magaabot. Ug tungod kay miabot man Siya sa ubang paagi, kung ingon-ana, “Dili Kini ang Mesias. Usa Siya ka butang nga ilehitimo. Usa Siya ka Beelzebub.” Apan ang Dios kadto nga nagatago diha sa kayano.

338 Ang mag-uuna kono kinahanglan nga mamahimong usa ka edukadong tawo nga ang ilang . . . Bueno, ang usa, sa walay pagduhaduha . . . Sa matag adlaw, sa matag tuig sa diha nga sila, oo, nagaordena sila og ilang mga ministro ug ginapadala sila ingon nga mga misyonaryo, aron sa pagpangdani ug magpasulod; naghunahuna ang matag usa kanila, “Kini na siguro ang mamahimong mag-uuna nga umaabot.” Apan gimatuto sa Dios ang maong mag-uuna didto sa kamingawan kon diin didto walay seminaryo man lang, kita n’yo, ug mga butang nga ingon niana. Kita n’yo? Ang Dios nga ginatago ang Iyang Kaugalingon diha sa kayano ug diha sa katalamayon.

339 Karon hulát lang. Sa pagtapos, isulti nato kini. Apan ang pagsalikway sa yanong Mensahe sa Dios; ang—ang—ang pagsalikway Niini, sa yanong paagi sa Dios, mao ang Eternal nga pagkalaglag. Karon, ingon niana kung unsa . . . Gihisgotan nato kung unsa ka yano Kini, ug hunahuna sa mga tawo, bueno, mahimo nilang kataw-an Kini ug yatakan Kini, ug tagdon Kini sa unsa mang paagi nga gusto nila, apan Eternal kini nga pagkahimulag sa Dios.

340 Kadtong mga nangamatay sa mga adlaw ni Noe, ug wala manalinghog sa iyang mensahe, nangalaglag sila. Ug miadto si Jesus ug nagwali ngadto kanila didto sa mga talikala sa

kangitngitan, niadtong pagkamatay Niya, sa wala pa Siya nabanhaw. Ug miadto Siya sa impiyerno, ug nagwali ngadto sa mga espiritu nga atua sa bilangoan, nga wala maghinulsol bisan sa pagkamapailubon niadtong mga adlaw ni Noe; sa diha nga ang yanong mensahe sa Dios, pinaagi sa yanong tawo, ginawali kaniadto. Miadto Siya. Miingon Siya, “Nagwali si Noe nga moanhi Ako, ug ania na Ako.” Husto kana. Kita n’yo?

³⁴¹ Kadtong mga wala naminaw sa mensahe niadtong propeta, nga si Moises nga gikan didto sa kamingawan, nadawat niya kini gikan sa Dios, gipanghimatud-an og husto pinaagi sa usa ka Haliging Kalayo, ug gipangunahan didto sa kamingawan. Ug dayon naninguha gihapon sila nga magtukod ug maghimo og usa ka organisasyon pinaagi niini, ug nangalaglag sila ug nangamatay sila didto sa kamingawan, ang matag usa kanila; gawas ra sa duha ka tawo, si Josue ug Caleb.

³⁴² Ug didto, ang—ang mga Fariseo pagkabuta kaayo nga dili nila makita kadto, mao nga gidumdum nila balik ug miingon, “Ang among mga ginikanan nanagpangaon man og manna, nanagpangaon man og manna didto sa kamingawan.”

³⁴³ Ug miingon si Jesus, “Ug sila, ang matag usa kanila, nangamatay.” Nakita na nila ang Himaya sa Dios. Naglakaw sila diha sa Kahayag sa maong. . . Naglakaw sila diha sa Kahayag. Naglakaw sila diha sa Kahayag sa maong Haliging Kalayo. Naglakaw sila diha sa Presensya sa gahum Niini. Naglakaw sila agi sa mga dapit nga gibuhay sa Balaang Espiritu alang kanila aron pagalakwan. Nanagpangaon sila sa manna nga nangahulog gikan sa Langit, nga gitagana sa Dios. Ug, nangalaglag sila, ug miadto sa impiyerno. “Sila, ang matag usa kanila, *nangamatay*.” Kon masabtan ninyo kana nga pulong, kini’y “Eternal nga pagkahimulag” gikan sa Presensya sa Dios. “Sila, ang matag usa kanila, nangamatay.” Kita n’yo?

³⁴⁴ Ang tanan nga nagsalikway kang Jesus nangalaglag. Nakita ba ninyo ang buut kong ipasabot? Ang pagsalikway lang nianang kayano sa Dios! Dili lamang kini usa ka butang. . . Ingnon n’yo, “Hinoon, Nasayup ako.” Wala n’yo kini ginabuhay sa ingon nianang paagi. Wala kini ginadawat sa Dios sa ingon nianang paagi. Malaglag kamo, sa Walay Katapusan. Maayo pa nga maghunahuna kita og unsa mang butang. Karon, kinahanglan kining mailhan sa Dios sa hustong paagi, kita n’yo, ug dayon, kung mao man, Iya kining Pulong. Kita n’yo? Oh! Sama niadtong mga nagsalikway kang Moises, nagsalikway kang Elias, nagsalikway kang Juan, nagsalikway kang Jesus, sa ilang mga adlaw.

³⁴⁵ Dinhi, tugoti kong isulti kaninyo ang usa ka gamay’ng butang. Ug, dayon, nanghinaut ko nga dili ako makapasakit og ayo. Apan, tan-awa. Sa miaging adlaw gipaadto ako sa Houston, Texas, aron paninguhaon nga makakuha og usa ka pagpasaylo.

Pinaagi sa pagtigum og pipila ka mga tawo, aron makawali og usa ka mensahe, ug pa-pirmahon ang maong mga tawo didto sa usa ka pagpasaylo para makalingkawas sa silot ang—ang kadtong batan-ong lalaki ug batan-ong babaye. Kabalo na mo nga nahilambigit sila sa kagubot. Siguro nabasa na ninyo ang mahitungod niini sa mantalaan. Ug humabdos-nga-lalaki kadto ni Mr. Ayers.

³⁴⁶ Ug si Mr. Ayers ang maong nagkuha og litrato sa Anghel sa Ginoo, nga makita ninyo mismo dinha. Usa ka Romano Katoliko; ug ang iyang asawa usa ka Judio. Ug giminyoan niya kining babayeng Judio. Dili lang sila mag-estorya og relihiyon sa usa'g usa, ug uban pa, sama niana. Ug si Ted Kipperman, nga kauban niya sa negosyo, maoy tag-iya sa Douglas Studios.

³⁴⁷ Ug sa dihang miadto siya didto, kon diin atua si Mr. Best, si Dr. Best, nga taga-iglesiang Baptist, nga gikumoan niya si Igsoong Bosworth ubos sa ilong niini, ug nangbahad, ug miingon, “Karon kuhaan ninyo ko og litrato, nga ginabuhat kana.” Miingon, “Panitan ko kanang tingulanga ug isab-it ko kini didto sa akong lawak-tun-anan, ingon nga handumanan sa Balaanong pagpang-ayo.”

³⁴⁸ Ug sa wala pa ako moadto sa Houston, Texas, nagsulti na ang Ginoong Dios nga ginapaadto Niya ako didto. Ug miadto ako sa Ngalan sa Ginoo. Ug nahibalo na mong tanan bahin sa debate ug sa mga butang nga nangahitabo didto. Nabasa na ninyo kini sa mga libro, ug uban pa. Ug nahitabo kini didto. Ug niadtong gabhiona . . . Nanguha lang kami nga magpaubos.

³⁴⁹ “Aba,” ang ingon nila, “pundok ra kana sila sa mga tawo nga ignorante.” Miingon si Dr. Best, “Wala na’y laing pundok sa mga ignorante kondili sila.” Ang ingon pa, “Wala na’y mga tawo karon nga nagatoo pa sa Balaanong pagpang-ayo, sa mga butang nga ingon niana. Ang pundok ra sa mga pulpol.” Wala sila nahibalo nga ang Dios kadto diha sa kayano. “Aba,” miingon pa, “wala man lang gani nakaeskuwela og gramatika ang maong tawo.”

³⁵⁰ Hinashasan gyud siya og ayo sa tanang mga pang-iskolar nga digri nga iyang makuha, hangtud nga abi niya mapalisang niya si Igsoong Bosworth, sa unsa mang paagi. Apan paghisgotan na ang Pulong, wala man lang siya og diyes porsyento kung ikaparang kang Igsoong Bosworth. Kita n’yo? Ug nasayod gayud si Igsoong Bosworth kung asa siya nagabarug. Daghan sa mga miyembro niya, ang atua mismo didto nanaglingkod, didto sa maong debate. Ug atua kini didto.

³⁵¹ Ug diretsahan niyang ginaingon kanamo, ginasulti nga kami kono usa ka pundok sa mga burong. Miingon pa, “Ang mga tawong disente ang panghunahuna dili man lang motoo niana.”

³⁵² Miingon Si Igsoong Bosworth, “Kadali lang.” Miingon siya, “Pila ba ka mga tawong ania sa niining siyudad,” mga traynta

man ka libo niadtong gabhiona, ang nanaglingkod uban kanato nga sama niini, “Pili ba ka mga tawo dinhi niining siyudad, nga nagatambong, niining mga simbahang Baptist dinhi, ang makapamatuod pinaagi sa pamahayag sa usa ka doktor nga sila giayo tungod sa Gahum sa Dios sukad nga si Igsoong Branham mianhi sa siyudad, magtindog.” Ug mga tulo ka gatus ang mitindog. “Unsa man diay kana?” Atua kini. Ang Dios nga nagatago diha sa kayano. Dayon ingon siya, “Igsoon. . .”

³⁵³ Miingon siya, “Dalha dinhi ang Balaanong mananambal. Ipakita kanako siyang ginahipnotismo ang usa ka tawo, dayon patan-awa ko kanila usa ka tuig gikan karon.” Ug si Ted Kip- . . .

³⁵⁴ Ug si Ayers nga atua didto, ang mismong naglitrato, miingon, “Si Ginoong. Branham siguradong usa gyud ka maghihipnotismo. Nakita ko ang usa ka babaye, nga adunay goiter diha sa iyang tutunlan, nga sama *niana*, ug,” ingon niya, “gihipnotismo niya kadtong babaye. Pagkasunod nga adlaw giestorya ko ang maong babaye, ug wala na siya’y goiter.” Miingon pa, “Gihipnotismo sa maong tawo ang babaye.” Ug, oh, iya gyud kong gibiyabiayan. Ingon pa niya nga kinahanglan kono akong papahawaon pagawas sa siyudad, ug kinahanglan siya kono ang mobuhat niini, kita n’yo, ug ang tanan nang ingon niana. Dakung ulohan kadto sa mismong unang pahina sa *Houston Chronicle*.

³⁵⁵ Wala gyud ko’y gisulti ni usa ka pulong. Atua ako didto sa pagbuhat sa buluhaton sa akong Amahan, ug mao lang kadto; ang magpabilin nianang Pulong. Gipadala Niya ako didto, ug Iya kadtong buluhaton.

³⁵⁶ Niadtong gabhiona sa dihang miadto na ako sa atubangan, miingon ako, “ako—ako—ako—ako’y dili usa ka Balaanong mananambal. Dili ako ingon niana. Kon aduna ma’y nagsulti nga ako ingon niana,” ako na ang moingon, “nasayup sila.” Ug ingon ko, “dili ko gustong matawag nga usa ka Balaanong mananambal.” Ingon ko, “Kon si Dr. Best nagwali dinhi og kaluwasan, kung ingon niana dili niya gustong tawgon siyang usa ka Balaanong Manluluwas.” Ug ingon ako, “Kung ingon niana, kay nagwali man ako og Balaanong pagpang-ayo, dili ko usab gustong tawgon nga usa ka Balaanong mananambal. Apan ang ingon niya nga dili siya usa ka Balaanong Manluluwas; sigurado, dili man gyud siya ingon-ana. Bisan ako dili man pud usa ka Balaanong mananambal. Pero, ‘Pinaagi sa Iyang mga labod kita nangaayo,’ Kana ang ginapahinungdan ko.” Kita n’yo?

Ug busa, ingon niya, “Binuang!” Kabalo na mo, siya nga nagalakawlakaw didto.

³⁵⁷ Ug miingon ako, “Apan kon ang maong Presensya ug kining gasa sa Dios, kining Manolunda sa Ginoo, kung mao Kana ang imong ginaduhaduhaan, mapamatud-an man Kana.” Niadtong

mga taknaa, ania na siya nga nagaabot, nagatuyoktuyok paubos. Ingon ko, “Dili na kinahanglan nga mosulti pa. Nakig-estorya na Siya kanako.” Ug milakaw na ako.

358 Ug mibalik ako sa Houston, sa nianang dakong siyudad, usa sa pinakamaanindot nga mga siyudad nga ania sa nasud, bisan asa pa. Sa pagbisita ko didto, sa miaging adlaw, makauulaw kon tan-awon mo ang maong siyudad. Ang mga kadalanan hugaw. Mao usab ang mga baligyaan sa maong lugar, paingon didto mismo sa Texas Avenue; ug misulod ako sa Rice Hotel, kon diin didto kaniadto gasaka ang mga artista sa pelikula, ug miadto ako didto sa pinakasilong niini, didto sa kapiterya, ug nangalangkat na ang kisame, ug ang plaster sa salog, ug nagkalamukat ug mahugaw. Ug dunay dakung kalibog sa taliwala sa mga magwawali ingon nga wala ko pa sukad makita o madungog sa tibuok kong kinabuhi.

359 Ngano man? Ang pagsalikway sa Kahayag mao ang paglakaw diha sa kangitngit. Atua nakapila ang ang ilang mga anak ngadto sa kamatayon. Husto. Mikanaug ang Dios. Sa dihang gipakita ang kayano ug gisalikway kini, kung ingon-ana naipasundayag na sa Dios ang Iyang Kaugalingon diha sa maong kayano.

360 Ug nakuhaan nila kadto og litrato nga mikaylap sa tibuok kalibutan. Bisan gani ang mga siyentipiko miingon nga mao Kadto ang bugtong supernatural nga Persona nga sukad nakuhaan og litrato sa tibuok kasaysayan sa kalibutan; ug nakasab-it kini didto sa Washington, DC, didto sa lawak sa makarelihiyosong sining. Atua kini, ang kayanong naipadayag, didto. Kita n’yo? Kita n’yo? Ang Dios nga ginatago ang Iyang Kaugalingon diha sa kayano, nga ginapadayag ang Iyang Kaugalingon. Kita n’yo?

361 Karon, gitago Niya ang Iyang Kaugalingon diha sa kamatayon ni Cristo, apan gipadayag ang Iyang Kaugalingon diha sa pagkabanhaw. Oh, grabe! Ang uban pa, mahimo n’yong, atong . . . mahimo natong . . . Wala’y kahumanan kini; sige-sige’g nato kining hisgotan. Apan tan-awa, kita n’yo.

362 Ang dili pagdawat nga adunay kahayag-sa-adlaw, mao ang pag-adto padulong sa basement ug piyongon ang imong mga mata gikan sa kahayag. Ug husto kana. Ug, hinumdomi, ang bugtong paagi nga ikaw mamahimong sayup, mao ang pagsalikway una sa husto. Kita n’yo? Ug ang pagdumili nga ablihan ang imong mga mata, mao ang pagkinabuhi sa kangitngit. Kita n’yo? Kung magdumili ka sa pagtan-aw, unsaon man nimo pagkakita? Kita n’yo? Timan-i ang maong yanong mga butang. Tungod kini sa gagmay’ng mga butang nga inyong ginapasagdan, dili kini tungod sa dagkung mga butang nga ginapaningkamotan ninyong—ninyong buhaton. Oh, grabe!

363 Dayon, tan-aw dinhi, sultihan ko kamo. Sa Mal- . . . sa Mateo 11:10, miingon Siya, “Kung madawat man ninyo kini, kini mao siya.” Kita n’yo? “Kini siya ang maong gipadala sa unahan Nako.” Kayano kadto.

364 Gipangutana kini Kaniya kaniadto usa niana ka adlaw, miingon, “Nganong nag-ingon man ang mga escriba kung ingon niana nga . . .”

365 Siya, miingon Siya, “Ang Anak sa tawo magaadto sa Jerusalem. Igatugyan Ako ngadto sa mga kamot sa mga makasasala, ug ilang pagapatyon ang Anak sa tawo. Ug mamatay Siya, ug sa ikatulo nga adlaw Siya mabanhaw pag-usab.” Miingon, “Ayaw isulti kang bisan kinsa ang maong panan-awon, didto.”

366 Ug ang mga tinun-an, karon hunahunaa ninyo kini, ang mga tinun-an nga naglakaw kauban ni Juan, nakigsulti kaniya, nagkaon uban kaniya, didto sa kamingawan, nga naglingkod didto sa baybayon, niadtong tungora miingon sila, “Nganong nagaingon man ang mga magtutudlo nga kinahanglan moanhi una si Elias? Ginaingon Mo nga moadto Ka didto aron mailansang sa krus, ug pagabanhawon. Ikaw ang Mesias, nga magalingkod sa trono. Karon nganong nagaingon man ang mga escriba . . . ? Ang tanan natong mga Kasulatan nagaingon dinhi, ang Kasulatan klarong nagaingon, nga, sa dili pa moabot ang Cristo, moabot una si Elias.” Oo. Kita n’yo?

367 Siya miingon, “Miabot na siya, ug wala n’yo lang kini nahibaloan.” Karon, kinsa man kadto? Ang mga tinun-an.

368 Medyo makasakit ako dinhi, og gamay karon, apan wala ko ginatuyo kini, kita n’yo; alang sa sunod nga pipila ka minutos, kita n’yo, mga minuto na lang, o duha, apan aron lang nga masabtan gyud ninyo. Madungog pa ba ninyo ako? [Nagaingon ang kongregasyon, “Amen.”—Ed.]

369 Tan-awa! “Ngano man?” Sila mga tawo mismong naglakaw kauban ni Cristo, “Nganong ginaingon man sa mga Kasulatan, una, nagaingon nga kinahanglan moanhi pag-una si Elias?” Ug sila mga mismong kinabig ni Juan, ug wala man lang gani makaila kaniya. “Nganong nagaingon man ang Kasulatan, ang mga magtutudlo?” Nakita ba ninyo kung unsa ang buot kong ipasabot? Kita n’yo? “Nganong nagaingon man ang Kasulatan nga kinahanglan moanhi una si Elias?” Mga tinun-an man unta nga kauban niya kaniadto, “Nganong nagaingon man ang mga Kasulatan nga kinahanglan moanhi una siya, sa dili pa kining mga butanga, ug ipasig-uli ang tanan niining mga butang?” Gibuhat na niya kini, ngadto sa halos katunga sa usa ka dosenang mga tawo, ug ingon niana lang kadaghan. Kita n’yo? Mao ra man sila ang gipaabot nga makadawat niini. Mao ra man sila ang gikatagana nang daan nga makakita niini.

370 Miingon si Jesus, “Miabot na siya, ug wala n’yo lang kini nahibaloan. Apan nabuhat na niya kung unsa ang giingon sa Kasulatan nga iyang pagabuhaton. Gipasig-uli na niya sila, kamong tanan nga midawat Kanako ug nagtoo Kanako. Gibuhat niya eksakto kung unsa ang giingon sa mga Kasulatan nga iyang pagabuhaton. Ug gibuhat pud nila ngadto kaniya kung unsa ang giingon sa Kasulatan nga ilang pagabuhaton ngadto kaniya. Miabot na siya, ug wala n’yo kini nahibaloan.”

371 Andam na ba kamo? Gusto ko kamong kuraton og diyutay. Ang Pagsakgaw mamahimong ingon niana usab. Mamahimo kining yano kaayo, walay pagduhaduha nga kini mamaingon niini usab, hangtud nga ang Pagsakgaw moabot usa sa niining mga adlaw ug walay usa ang makahibalo niini. Karon, ayaw, ayaw, ayaw sá pagtindog karon, kondili tun-i kini sa kadali. Siguradong humanon ko na kini. Ang Pagsakgaw moabot sa ingon ka yanong paagi hangtud nga moabot ang mga paghukom, ug makita nila ang Anak sa tawo, ug magaingon sila, “Dili ba kinahanglan nga aduna usá kita og *ingon niini-ug-ingon niana?* Ug dili ba kinahanglan nga ipadala usá kanato si Elias? Ug dili ba kinahanglan magkaaduna usá og Pagsakgaw?”

372 Magaingon si Jesus, “Nahitabo na kini, ug wala n’yo kini nahibaloan.” Ang Dios diha sa kayano. Kita n’yo?

373 Karon, sa niining semanaha hisgotan nato ang pipila ka grabeng laglum nga pagtuon diha sa Pulong. Karon, matikdi, ang Pagsakgaw, gamay ra kaayo ang makauban sa nianang Pangasaw-onon! Dili kini mamahimong . . .

374 Karon tan-awa kung giunsa kini pagsabot sa mga magtutudlo? Aduna pa sila og mga tsart, ug mangasakgaw kono sila, magpakita og napulo ka milyon kono ka mga tawo ang masakgaw; tanan nga mga Methodist, kung ang magwawali Methodist; kung kini Pentecostal, tanan usab nga mga Pentecostal ang masakgaw. Layo ra kaayo kana.

375 Ang mahitabo, mahimong usa ra ang makauban sa Jeffersonville, usa ra ka tawo ang mawala. Moingon sila, “Bueno, wala mo gyud . . .” Ang tanang uban pa kanila dili mahibalo. Adunay usa ang makauban gikan sa Georgia. Kita n’yo? Aduna usab og usa ang makauban gikan sa Africa. Ug ingnon lang nato nga adunay lima ka gatus ka mga tawo, nga mga buhi, ang makauban sa maong pagkausab. Karon, dili kana—dili kana ang iglesia. Kana mao ang Pangasaw-onon. Dili kana ang iglesia. Kana mao ang Pangasaw-onon. Kita n’yo?

376 Ang—linibo ang mangbangon sa iglesia, apan sa sunod na kana nga pagkabanhaw. “Kini sila dili pa mabuhi pag-usab hangtud matapos una ang usa ka libo ka tuig.” Kita n’yo?

377 Apan, sa Pangasaw-onon, kung lima ka gatus ka mga tawo ang mibiya sa niining kalibutan karon mismong taknaa, wala gyu’y hinanawan ang kalibutan mahitungod niini. Miingon si

Jesus, “Magkaaduna og usa sa higdaan; ug kuhaon Ko ang usa, ibilin ang usa.” Panahon kana sa kagabhion. “Adunay duha diha sa umahan,” sa pikas bahin sa kalibutan, “Kuhaon ko ang usa ug ibilin ang usa. Ug sama sa nahitabo kaniadto sa mga adlaw ni Noe, maingon man usab kini sa pag-abot sa Anak sa tawo.”

³⁷⁸ Hunahunaa kini! Ang tanang butang magapadayon sa kasagaran kung unsa kini. Molabay ang usa ka panatikong Mensahe, ug, mahibaloan mo na lang, may moingon, “Kining ministro, miadto lang sa kung asa, wala na siya makabalik. Tingali miadto siya sa mga kakahoyan, nangayam. Wala na gayud siya sukad makauli. Ug *kining* tawhana miadto sa kung asa man. Kabalo ba mo kung unsa ang nahitabo? Nagatoo ko, nga kanang batan-ong babaye, siya—tingali gikidnap siya sa kung asa man, kabalo na mo, usa ka tawong midagit sa maong babaye didto ug gilugos siya, tingali gitambog siya didto sa suba. Wala man gud siya’y kauban.” Ang katunga niini. . . nubentay-nuebe porsyento sa matag niini. . . Mahimong ingnon nato nga usa gikan sa matag usa ka gatus ka milyon mao lang ang makahibalo niini; kita n’yo, kanang tawo lang nga nasayod gyud kaniya, nga moingon, “Ang batang babaye nawala. Hala, dili ko masabtan kini. Wala gyud siya sukad mibiya nga ingon niana.” Wala.

³⁷⁹ Ug sa dihang mosulti sila, “Ang—ang mga lubnganan mangaabli.” Sa unsang paagi man mangaabli ang mga lubnganan? Sa diha nga, ako—wala na ako’y oras nga pagahisgotan kini, kung unsa ma’y gusto ko. Hisgotan ko na lang gyud kini, kita n’yo, aron lang ipakita sa inyo ang kayano sa Dios. Ug kanang calcium, potash, ug tanan na, sa dihang. . . Ang tanan nga anaa sa inyo, nga mga materyal, ang mapuno niini usa ra ka kutsara. Husto kana. Ug unsa ma’y buhaton niana, mobalik kini ngadto sa espiritu ug kinabuhi. Mosulti lang ang Dios, ug moabot na ang Pagsakgaw. Dili kini nga, mokanaug ang mga Anghel ug kaluton ang mga lubnganan, ug hulboton ang dugay na nga patay’ng lawas nga nadugta na dinha. Unsa man kana? Lawas ra kana nga nahimugso sa sala, sa sugod pa lang. Apan, kini Usa gyud ka bag-o, nga gihimo sumala sa pagkaliwat niini, kabalo na mo. Kita n’yo? Kon magkaaduna kita og *ingon niini* sa gihapon, mamatay kita pag-usab. Kita n’yo? Walay usa. . . Moingon kamo, “Ang mga lubnganan mangaabli. Ang mga patay manggawas.” Mahimong tinuod kana, apan dili kini maabli sa paagi sa pagkasulti ninyo niini. Kita n’yo? Husto kana. Kita n’yo? Dili kini mamahimong ingon niana.

³⁸⁰ Usa kini ka sekreto, tungod kay miingon man Siya nga moabot Siya “sama sa usa ka kawatan sa kagabhion.” Nasulti na Niya kini kanato, ang Pagsakgaw.

³⁸¹ Human niana moabot ang mga paghukom; sala, mga hampak, mga balatian, ug tanan na. Ug ang mga tawo mangtuaw ngadto sa kamatayon aron kuhaon sila, sa panahon nianang paghukom. “Ginoo, nganong ania na man kanamo

ang paghukom, nga miingon Ka man nga magkaaduna usá og Pagsakgaw?”

382 Moingon Siya, “Miabot na kini, ug wala kamo niini mahibalo.” Kita n’yo? Ang Dios nga ginatago ang Iyang Kaugalingon diha sa kayano. Oh, grabe! Sige. “Kana lang, nahitabo na kana, ug wala ninyo kini nahibalo!”

383 Nganong dili man toohan sa mga magtotoo ang yanong mga ilhanan sa Iyang Pag-abot?

384 Nagapaabot man sila sa tanan niining mga butang nga gipamulong sa Kasulatan, ug—ug nga mosalup ang bulan diha sa udtong totok . . . o ang adlaw, diha sa udtong totok, ug magkaaduna og tanan na nga matang sa mga butang. Oh, kung magkaaduna lang kita og . . . Aduna ko’y mga sinulat dinhi bahin niini, kita n’yo, aron ipakita kung unsa kini nga mga butang. Ug mahibal-an nato kini diha sa pag-abli na niining mga Selyo niining semanaha, sa unsa mang paagi, kita n’yo. Kita n’yo? Anaa na, human na kining milabay, ug wala n’yo kini nahibaloan. Tan-awa kon kini man, kon pagaablihan man sa Manolunda sa Ginoo ang maong mga Selyo. Hinumdumi, naselyohan kini pinaagi sa niining Pito ka misteryosong mga Dalugdog. Kita n’yo?

385 Karon unsa man? Nganong dili man mahimong toohan sa mga tawo ang yanong katalamayon sa usa ka mapainubsanong pundok sa mga tawo, kita n’yo, ug ang—ang Tingog sa mga ilhanan sa Dios? Nganong dili man nila matoohan kini? Sama lang kini sa dugay nang nagakahitabo, sa matuod nga Pulong sa Dios nga napadayag. Kini, mga utokan ra gyud sila kaayo ug sobra ka edukado nga dili na nila matoohan ang yanong porma sa nahisulat nga Pulong. Gusto nilang iapil ang ilang kaugalingong interpretasyon Niini. “Dili *ingon niana* ang buut ipasabot *niini*. Dili *ingon niana* ang buut ipasabot *niana*.” Kita n’yo? Mao man gyud kana ang buut ipasabot Niana.

386 Paminaw. Tugoti kong isulti kini, sa kadali lang, karon. Bisan gani ang mga panan-awon nga ginahatag sa Dios dinhi niining dapita, wala kaayo kini masabtan. Mao kana ang hinungdan nga madungog ninyo ako diha sa mga teyp, nga nagaingon, “Isulti lang kung unsa ang gisulti sa mga teyp. Isulti lang kung unsa ang gisulti sa mga panan-awon.” Karon, kung abli gayud ang inyong mga mata, makita ninyo ang usa ka butang. Kita n’yo? Unta nga dili ko na kinahanglan nga gunitan pa kini sa akong kamot ug ipakita kaninyo. Kita n’yo? Kita n’yo? Kita n’yo? Kamo . . . Kini—ania na kini. Ania na kita sa katapusan. Kita n’yo? Oo, sir. Dili kini makita sa mga maantigong edukado. Ang yanong mga panan-awon, ginapadayag ang mga niini sa ingon ka yanong paagi, hangtud nga nagalagpas lang kini ibabaw sa ulo sa mga tawo. Kita n’yo?

387 Tungod kay nakita ko ang panan-awon, gisultihan kamong tanan mahitungod sa pag-adto didto sa pagpangayam, ug, kabalo mo, nga nakapandol hinoon kadto sa mga tawo. Ug gipadala ako didto sa Dios alang sa mismong katuyoan, ug mibalik ug gihubad kini, ginapakita ang pagtaliwan sa akong inahan, ug mga butang nga sama niana. Ug dayon mibalik ug gisulti na kini, sa wala pa kini nahitabo. Ug eksaktong nahitabo kini sa paagi gayud nga gisulti Niya nga mahitabo kini. Kita n'yo?

388 Ug, bisan pa man, si Juan miabot mismo didto ug nagtugan. Miingon siya, "Dili man ako ang Mesias, apan ako mao ang tingog nga nagasinggit sa kamingawan."

389 Ug dayon sila nga mismong mga tinun-an niya nagaingon, "Nganong, nag-ingon man ang mga escriba nga ang Kasul . . . ang Kasulatan nagtudlo nga kinahanglan moanhi una si Elias?" Kita n'yo? Ingon niana ang kayano sa Dios, nagalagpas lang sa ulo sa mga tawo.

390 Tugoti akong hisgotan kini, ug dayon tapuson na. Tapuson ko na, pinaagi sa tabang sa Dios. Kita n'yo? Tan-awa. Karon patin-awon nato kini og ayo. Dayon, ako—pasayloa ako sa pagsige og sulti kaninyo nga akong tapuson na, ug dayon dili ko matapus-tapus kini. Kita n'yo? Tan-awa . . . Pasayloa ko nga ginapadugay pa kamo. Apan, pipila na lang ka oras, mobalik kita.

Tan-awa, kuhaon na lang nato ang usa ka yanong tulo sa tinta.

391 Ang tanang butang adunay katuyoan. Nagkatigum kamo dinhi niining buntaga tungod sa usa ka katuyoan. Nagkaon ako didto sa inyong balay, Charlie; Nellie, nagluto ka para kanako, tungod sa usa ka katuyoan. Ako . . . Ang tanang butang adunay katuyoan. Kining simbahan gitukod alang sa usa ka katuyoan. Walay unsa mang butang nga walay katuyoan ug hinungdan.

392 Mokuha kita og yanong tulo sa tinta karon. Madungog pa ba ninyo ako? [Nagaingon ang kongregasyon, "Amen."—Ed.] Mokuha kita og usa ka yanong tulo sa tinta ug tan-awa kini. Unsa man kini? Usa ka tulo sa tinta. Diin man kini gikan? Sige. Kuhaon nato kining tulo sa tinta karon, kini, ug moingon kita nga itum kini nga tinta. Karon, kana nga tinta adunay katuyoan. Mahimong isulat niini ang pagpasaylo kanako gamit ang usa ka pen . . . para mapahigawas sa bilangoan. Mahimong isulat niini ang pagpasaylo kanako pagawas sa usa ka seldang kamatayon. Husto kana? Mahimong isulat niini ang Juan 3:16, ug luwason ang akong kalag tungod sa pagtoo Niini. Husto ba kana? ["Amen."] O, Mahimo niining pirmahan ang akong sentensiyang kamatayon. Kita n'yo? Mahimo niining hukman ako didto sa Korte sa Paghukom. Aduna kini og katuyoan. Husto ba kana? ["Amen."]

³⁹³ Bueno, tan-awon nato ang kanang gamay'ng tinta ug hibaloon kon diin kini naggikan. Karon, kini ang tinta. Kini mga sinagolsagol, nga mga kemikal ug uban pa, hangtud nga nahimo kining tinta. Ug kini itum. Ipatulo ninyo kini sa inyong mga sinina, maglama kini.

³⁹⁴ Apan nakagama kita og usa ka butang nga gitawag nga bleach. Kamong mga kababayan-an nagagamit og bleach nga Clorox. Bueno, mokuha ako og usa ka tulo nianang tinta ug ibutang kini sa usa ka banyera sa—sa bleach, karon unsa ma'y nahitabo sa maong tinta? Kita n'yo? Ngano man? Ang bleach nagama, naimbento ug nagama nga mga kemikal, sagolsagol, nga mahimong tunawon niini og ayo kanang pangkolor hangtud nga dili na ninyo makita kini. Karon, adunay tubig nga gisagol sa nianang bleach.

³⁹⁵ Ang tubig maoy H_2O , nga mao ang hydrogen ug oxygen. Ug ang hydrogen ug oxygen, parehong, delikadong pangpabuto. Ug, dayon, ang hydrogen ug oxygen sa pagkatinuod mga abo ra. Mao kana kung unsa kini, husto kana, mga abong kemikal, mga abong kemikal lamang. Karon, karon kung isagol mo ang maong duha, ug magkaaduna ka og tubig. Apan, bulaga kini, magkaaduna ka og hydrogen ug oxygen, ug padayon mo lang kini nga bulagon ug bulagon.

³⁹⁶ Karon, sa pagpadayon niini, kuhaon nato ang... Ug dili ko mahimo. Karon aduna tingali og mga chemist dinhi nga nagalingkod. Ug karon gusto kong isulti kini, tungod kay aduna—mahimong adunay mga chemist nga nagapaminaw dinhi, wala ako masayud sa pormula. Apan gusto ko lang isaysay kini dinhi sa akong kaugalingong kabus nga paagi, nagasalig nga igapadayag sa Dios ang Iyang Kaugalingon diha niini.

³⁹⁷ Tan-awa, ihulog ko kanang tulo sa tinta ngadto sa usa—usa—usa ka bleach. Unsa ma'y mahitabo? Sa gilayon ang itum nga lama nawala. Dili na ninyo kini makita pag-usab bisan pangitaon pa ninyo, wala na kini. Dili na ninyo kini makita pa. Unsa ma'y nahitabo? Karon, wala kamo'y makita og unsa man nga mitungha niini. Wala kamo'y makita. Ngano man? Tungod kay natunaw na kini.

³⁹⁸ Karon, ang siyensiya moingon, “Nibalik kini ngadto sa orihinal nga pagka-asido niini.”

³⁹⁹ Unsa man diay ang gigikanan sa mga asido? Kita n'yo? Bueno, moingon kamo, “Kini nagagikan—nagagikan kini sa kung unsang butang.” Sige. Ingnon nato, pananglit, “Mga aso man ang nagmugna sa mga asido.” Asa man nagagikan ang mga aso? “Bueno, gikan kini, ingnon nato, namugna man ang mga aso gikan sa mga molekula.” Asa man nagagikan ang mga molekula? “Gikan sa mga atom.” Asa man nagagikan ang mga atom? “Gikan sa mga elektronik.” Asa man nagagikan kini? “Sa pangkawanangan nga kahayag.” Kita n'yo, milagpas na kita sa

mga nahibal-an, sa mga chemist, karon. Ug, kon kini usa ka materyal ug usa ka binuhat, siguradong nagagikan kini sa usa ka Magbubuhat.

⁴⁰⁰ Busa, wala ka nagalingkod dinhi nga nasalagmaan lang. Wala ko nagalangan hangtud na niining alas dose-traynta, o ala una na, nga nasalagmaan lang. “Ang mga lakang sa matarung gitukod sa Ginoo.” Kita n’yo? Aduna gyud og unsa man nga katuyoan kini. Aduna gyud og unsa man nga katuyoan aron motoo ka. Aduna og unsa man nga katuyoan aron nga dili ka motoo. Susama lang sa—sa nianang tinta.

⁴⁰¹ Karon subayon nato kini pabalik. Karon, ang unang butang, pananglitan, human nga nasubay nato balik. . . Subayon nato kini pabalik hangtud sa pagka-molekula niini. Karon, napunting nato ang maong molekula, moingon ko, ingon nga 1 imultiplikar sa molekula 9, imultiplikar sa molekula 12. Karon, kon nahimo kining 11, moresulta kini nga pula. Apan kini—kinahanglan nga mamahimong kining 12, aron mahimong itum.

⁴⁰² Dayon dalhon nato kana pabalik pa ngadto sa pagka-atom. Kini ang atom. Ug 9^6 imultiplikar sa $+4^3$, ang katumbas niini mao ang atom nga 16^{11} . Kon kini nahimong 16^{12} , kini tingali nahimong purpora. Kita n’yo? Dayon padayon mo kining subayon pabalik.

⁴⁰³ Nagapakita kini nga aduna sa kung unsang butang kaniadto didto, nga gigikanan niini. Sumala kana sa sentido komon. Usa kini kaniadto ka paglalang. Sigurado nga aduna gyu’y Magbubuhat. Ug migula kini gikan sa usa ka Magbubuhat, ug dayon kini gikatakda ug gibutang dinhi, ingon nga lahi. Karon, dili mahimo sa siyensiya nga imultiplikar ang atom B_{16} sa 12, imultiplikar dayon sa 14, imultiplikar usab sa unsa man, nga ingon niana, aron mamugna kana. Dios ang kinahanglan magbuhat niana.

⁴⁰⁴ Ug dayon sige-sige kini nagausbaw hangtud ngadto sa punto nga miabot kini ngadto sa pagka-atom, dayon mahimo na kining tun-an sa siyensiya. Dayon moabot kini ngadto sa pagka-molekula, dayon mahimo na nilang makita kini nga mas klaro. Dayon nahimo kini, gikan sa pagka-ingon niadto, ngadto sa pagka-unsang man. Dayon, mahibaloan mo na lang, miabot kini ngadto sa pagka-kemikal, ug dayon gisagolsagol na nila kini.

⁴⁰⁵ Karon, sa dihang ang tawo, sa wala pa siya nakasala. Papahaman na ako, apan ayaw ninyo kini sipyata. Sa dihang nakasala ang tawo, gihimulag niya ang iyang kaugalingon gikan sa Dios, ug gitabok ang halapad nga bung-aw, ug gibutang ang iyang kaugalingon diha sa kamatayon ngadto sa pikas bahin sa maong bung-aw. Mibiya siya. Wala na’y paagi nga makabalik. Eksakto gyud. Wala na’y laing paagi alang kaniya aron makabalik. Apan sa diha nga nahimulag siya, ang Dios midawat og usa ka pang-puli, nga mao ang usa ka carnero, o

usa ka kanding, o carnero, o unsa man, alang sa dugo; nga maoy gisulti ni Adan, o—o gisulti ni Abel, didto sa pikas bahin sa dalama.

⁴⁰⁶ Sa nianang bahin, usa siya ka anak sa Dios. Usa siya ka kaliwat gikan sa Dios. Usa siya ka manununod sa yuta. Mahimo niyang kontrolahon ang kinaiyahan. Mahimo siyang molitok ug unsa man ug motungha kini. Aba, usa siya ka magbubuhat, mismo. Usa siya ka kaliwat sa Dios.

⁴⁰⁷ Apan, sa dihang milabang siya, gihimulag niya palayo ang iyang pagka-anak. Usa na siya ka makasasala, diha sa kinaiyahan. Napailalum na siya sa mga kamot ug sa pagkontrolar ni Satanas.

⁴⁰⁸ Ug midawat ang Dios og halad, usa ka kemikal, nga iya sa dugo, apan ang dugo sa mga laking baka ug mga kanding dili makatangtang og sala. Mahimo lamang tabunan niini ang sala. Kon aduna man ko'y lama nga pula sa akong kamot, ug tabonan kini og puti, ang maong pula nga lama anaa ra sa gihapon. Kita n'yo, anaa ra kini sa gihapon.

⁴⁰⁹ Apan ang Dios nagpadala, gikan sa Langit, usa ka bleach alang sa sala. Dugo kadto sa Iyang Kaugalingong Anak. Nga, kung ang atong naisugid na nga sala gihulog ngadto sa maong bleach nga iya sa Dios, mawala gayud bisan pangitaon mo pa kini! Ang kolor sa maong sala mobalik agi sa mga giagian niini, ug pabalik sa panahon, hangtud nga mobalik kini ngadto sa magsusumbong, si Satanas, ug maatua kini kaniya hangtud na sa Adlaw sa Paghukom.

⁴¹⁰ Unsa man ang mahitabo sa maong anak? Nahibalik siya sa hingpit nga pagpakig-fellowship uban sa Amahan pag-usab, nahibalik na didto sa pikas bahin sa dalama, nga wala na'y pagdumdum sa sala batok kaniya. Wala na gyud, wala na'y unsa mang lama diha sa bleach nga makita pa asa man niini. Gawasnon na siya. Alelluyah! Sama lamang nianang Clorox, o sama nianang tinta nga dili na gayud mamahimo pang tinta pag-usab, tungod kay natunaw na kini ug gidala na kini pabalik didto. Ug sa dihang gisugid na ang sala ug hingpit na nga gituslob ngadto niining... Ang usa ka lalaki o babaye nga hingpit nang gituslob ngadto sa Dugo ni Jesus Cristo, gipatay na niini ang tanan nga mga sintomas. Ug ang matag molekula sa sala nagabalik ngadto sa yawa, ug maatua kini kaniya hangtud na nianang Adlaw sa Paghukom, kon diin ang iyang Walay Katapusan nga paingnan didto na sa Linaw nga Kalayo. Ug ang dalama natulayan na, ug dili na gayud madumdoman pa. Ug ang maong tawo nagatindog nga gipakamatarung na, ingon nga usa ka anak sa Dios. Pagkayano!

⁴¹¹ Si Moises, ilalum kaniadto sa dugo sa mga laking baka ug mga kanding, uban sa iyang pagpamahayag sa Pulong sa Dios! Ug mahimong gamiton sa Dios ang maong yanong tawo,

ug ibutang ang Iyang mga Pulong diha sa iyang baba. Ug gipamatud-an niya nga siya'y alagad ni Jehovah, kay mahimo niyang moadto didto ug makigsulti si Jehovah diha kaniya pinaagi sa panan-awon. Miadto siya didto, gituy-od ang iyang mga kamot paingon sa sidlakan.

412 Ug karon, timan-i, nakigsulti ang Dios kaniya. Kini ang hunahuna sa Dios. Nagagamit ang Dios og tawo. Nakigsulti ang Dios kaniya. Husto. Miingon Siya, “Lakaw ug ituy-od kana nga sungkod, sa imong kamot, paingon sa sidlakan, ug moingon, ‘Mga langaw!’”

413 Si Moises, sa ilalum ra niadtong dugo sa kanding, carnero, miadto didto ug gikuha kadto nga sungkod, gituy-od kini paingon sa sidlakan. “MAO KINI ANG GINAINGON SA GINOO. Mangtungha ang mga langaw!” Wala pa’y nadungog og unsa man nga langaw. Mibalik na siya didto. Gisulti na kadto. Usa kadto ka hunahuna, karon paglitok niini, naipahayag na kini. Usa na kadto ka Pulong sa Dios kung ingon niana. Miabot kini ngadto sa mga ngabil sa usa ka tawo, usa ka yano ra nga tawo ilalum sa dugo sa usa ka laking baka, sa baka o kanding man.

414 Mahibaloan mo na lang, aduna na’y usa ka berdeng langaw nga naglupadlupad. Ang sunod nga mahibaloan mo, lima na sila ka libra ang kadaghanon matag yarda. Unsa man kadto? Pulong kadto sa Dios, nga gilitok pinaagi kang Moises, Pulong sa Magbubuhat. Tungod kay, sa ilalum sa dugo, nagabarug siya diha sa Presensya sa Dios, ug ang kaugalingon niyang mga Pulong dili na iyang pulong.

415 “Kon kamo nagapabilin Kanako, ug ang Akong mga Pulong nagapabilin kaninyo, nan pangayo kamo kon unsa ma’y inyong gusto ug igahatag kini alang kaninyo.” Asa na man nagabarug ang Iglesia?

416 “Mangtungha ang mga baki!” Ug wala pa kaniadto ni usa ka baki sa maong nasud. Sulod lang sa mga usa ka oras, napuloka-pye na ang kalawom nila, bisan asang lugar. Unsa man kadto? Ang Dios kadto, ang Magbubuhat, nga ginatago ang Iyang Kaugalingon diha sa yano ra nga tawo.

417 Karon gusto kong mangutana kaninyo og usa ka butang. Kung ang dugo sa laking baka o kanding gamiton aron himoong bleach, nga ang mabuhat niini mao lamang ang pagtabon, makapahimo gihapon sa usa ka tawo nga isulti ang makapaglalong nga Pulong sa Dios ug makapatungha og mga langaw, nganong mangapangdol man kamo sa bleach nga mao ang Dugo ni Jesus Cristo Nga makapatungha og squirrel o unsa man pinaagi lang sa paglitok niini?

418 Ayaw gayud buhata kana, ayaw kapangdol tungod sa kayano. Toohi nga Siya sa gihapon nagpabilin nga Dios. Oh,

grave! Pagpasaylo sa sala! Oh, daw sa unsa kong gipangandoy nga unta akong . . .

419 Dayon, diha sa Marcos 11:22, “Kung moingon ka niining bukira, ‘Pahawa ka,’ ug dili magduhaduha diha sa imong kasingkasing, kondili toohan nga kung unsa man ang imong gisulti mamatuman, oh, maangkon mo kung unsay imong gisulti.”

420 Grabe, aduna ako og tulo o upat pa ka mga panid. Ato na lang kini laktawan. Salamat.

421 Ang Dios nga nagatago sa Iyang Kaugalingon diha sa kayano. Dili ba ninyo makita? May sa kung unsa gyud nga sayup sa kung asa man. Adunay butang nga sayup sa kung asa man. Sa dihang ang Dios maghimo og usa ka pahayag, dili gayud Siya mamakak. Gihatag na Niya ang saad. Kita n’yo? Nagatago Siya diha sa kayano. Yano kaayo Kini!

422 Ang mga edukado ug mga eskolar moingon, “Ah, kini . . . Oh, usa ra kini ka telepatiya o unsa man. Kabalo mo, kini usa ka . . .”

423 Mahimo sa Dios nga dalhon ang Iyang Kaugalingon pabalik ngadto sa panahon, ug isulti kaninyo sa ingon kaeksakto kung unsa ang nangahitabo kaniadto, isulti kaninyo sa ingon kaeksakto kung unsa kamo sa karon, ug kung mamahimong unsa kamo sa umalabot. Kana pinaagi sa gihapon sa bleach nga iya ni Jesus Cristo, Nga mahimo Niyang kuhaon ang usa ka makasasala ug papution siya pasulod Didto, ug mamaanaa siya sa Presensya sa Dios.

424 “Ug kung kamo magapabilin Kanako, ug ang Akong mga Pulong anaa kaninyo; managpangayo kamo sa bisan unsa nga buot ninyo, pagabuhaton kini kaninyo. Siya nga nagatoo Kanako, ang mga buhat nga Akong ginabuhat pagabuhaton usab niya.”

425 “Unsaon man ninyo paghukom Kanako? Oh, dili ba ang inyo mismong mga balaod nagaingon man nga kung kang kinsa nagaabot ang Pulong sa Dios, nga mao ang mga propeta, dili ba nga gitawag ninyo sila nga ‘mga dios’? Ug unsaon man ninyo pagkondena Kanako kung ginasulti Ko kaninyo nga Ako ang Anak sa Dios?” Napakyas sila nga makita kadto. Napakyas sila nga makita kadto.

426 Karon, Iglesia, sa umaabot nga mga Mensahe, sugod niining gabhiona, ayaw pagkapakyas nga makita kini. Kita n’yo? Nga makita ang adlaw nga atong gikapuy-an. Ug, hinumdomi, ginatangtang sa Dugo ni Jesus Cristo ang sala palayo gikan kaninyo, sa diha nga sila wala na sa panumduman sa Dios, bisan unsa pa. Ginatangtang Niini ang tanan nga lama.

Nagbilin ang sala og lama,
Iyang gihugasan kini sa ingon ka puti nga sama
na sa niyebe.

Dayon sa atubangan sa Trono,
Nagabarug ako diha Kaniya nga hingpit.

427 Oh, grabe, unsaon ko man sa pagkahimong hingpit? Unsaon ko man sa pagkahimong hingpit? Tungod sa Dugo; dili ako, kondili kanang Dugo nga nagapataliwala sa Dios ug kanako. Gidawat ko Kini. Ug gibutang Niya kini... Usa ako ka makasasala, apan Dios Siya. Apan ang kemika nagapatunga tali kanako, ug sa nagapatay nga sala, mao nga makita ako sa Dios nga ingon ka puti sama sa—sa tubig nga anaa—nga anaa diha sa bleach. Ang akong sala nawala na. Dili na gani kini makaabot Kaniya, tungod kay Halad nga nakapahimutang na dinha.

428 Asa na ang atong hugot nga pagtoo aron toohan ang yanong Pulong sa Dios? Kung unsa lamang ang giingon sa Dios, dawata Siya sa Iyang Pulong. Ginatago sa Dios ang Iyang Kaugalingon karon diha sa kayano, diha sa usa ka talamayon nga gamay'ng pundok, apan usa niining mga adlaw igapadayag Niya ang Iyang Kaugalingon sama sa kanunay na Niyang ginabuhay sa nangaging mga panahon. Gihigugma ba ninyo Siya? [Nagaingon ang kongregasyon, "Amen."—Ed.]

Gihigugma ko Siya, gihigugma ko Siya
Tungod kay una Siyang nahigugma kanako
Ug gipalit ang akong kaluwasan
Didto sa kahoy sa Kalbaryo.

429 Gihigugma ba ninyo Siya? [Nagaingon ang kongregasyon, "Amen."—Ed.] Grabe, dili ba Siya pagkahibulongan? ["Amen."] Nagalaum ako ug nagasalig nga mamunga ang maong Mensahe sa kung unsa ang gituyo Niini nga buhaton, nga dalhon kamo Niini ngadto sa kahimtang nga wala ninyo ginatan-aw ang mabulakon nga mga butang. O ang pila sa... Pagmakita ninyo ang Dios diha sa kahalangdon, tan-awa kon unsa kini ka ubos, ug dayon makita ninyo ang Dios. Ayaw ninyo Siya pangitaa sa...

430 Sa dihang atua si Eliseo sa langob, adunay moabot nga aso, dugo, dalugdog, kilat; ug, kita n'yo, tanan na niining matang sa mga sensasyon nga nagkaaduna kita, dugo diha sa nawong ug sa mga kamot, ug mga sensasyon ug tanan na. Wala nakapabalaka niadtong propeta. Naghigda lamang siya didto hangtud nga nadungog niya ang usa ka malumong gamay'ng Tingog, (unsa man Kadto?) ang Pulong, dayon gitabonan niya ang iyang nawong ug milakaw na pagawas. Kita n'yo, mao na Kadto.

431 Hinumdomi, higala, ayaw pagtan-aw sa mga halangdon, dinagkung... Moingon mo, "ang Dios, naghigot man Siya og kahalangdon, dagkung mga butang. Moabot ang panahon nga magkaaduna og *ingon niini*, *ingon niana*, o *uban pa*, halangdon ug dagkung mga butang." Nanghinaut ako nga inyong nakuha ang mahitungod sa akong ginasulti. Kita n'yo? "Halangdon, og

dinagkung mga butang, kita n'yo! Ug, oh, pagmahitabo na kini, mamahimo gyud kining halangdon, daku kaayo nga sama *niini*."

432 Ug mamahimo kining ubos kaayo, nga dili ninyo makita ang maong tibuok butang, padayon ra mo sa gihapon. Kita n'yo? Ug mahinumduman n'yo balik ug moingon, "Bueno, wala gyud kadto miabot sa akong. . ." Kita n'yo, milagpas lang sa ulo, ug wala ninyo makita Kini. Miagi lang. Kita n'yo, tungod yano ra kaayo. Kita n'yo? Ang Dios nagapuyo diha sa kayano, kita n'yo, ipadayag sa kahalangdon ang Iyang Kaugalingon. Unsa man ang nakapahimo Kaniya nga halangdon? Tungod kay mahimo Niyang talamayon ang Iyang Kaugalingon.

433 Ang usa ka daku, halangdong tawo dili niya mahimong talamayon ang iyang kaugalingon; kinahanglan nga mamahimo gyud siyang talahurong tawo. Kita n'yo? Apan dili pa siya sa gihapon ingon nga daku. Sa dihang siya igo na kadaku, kung ingon-ana mahimo siyang magpaubos nga sama *niini*, nakita n'yo, mahimo niyang ipaubos ang iyang kaugalingon.

434 Maingon sa gisulti sa tigulang nga balaan didto sa Chicago, "Misaka dinha kana nga lalaki, dala ang tanan niyang edukasyon ug tanan na." Miingon pa, "Minaug siya, nga naminghoy, nakaduko ang ulo. Mihawa dinha, nga napakyas gyud." Miingon siya, "Kung misaka lamang siya dinha sa paagi kung giunsa niya pagkanaug, mikanaug unta siya sa paagi kung giunsa niya pagsaka." Bueno, husto kana. Kita n'yo?

435 Magpaubos gyud sa inyong kaugalingon. Magpaubos lang. Ayaw pagpaninguha nga magpakalahi. Higugmaa gayud—higugmaa gayud si Jesus. Kita n'yo? Ingna, "Ginoo, kung aduna ma'y unsang lama sa akong kasingkasing, kung aduna ma'y sayup, Amahan, dili ko gusto nga mamahimong ingon niana. Tangtanga kini. Dili ko gusto nga mamahimong ingon niana. Oh, gusto ko mamahimong usa kanila, nianang Adlaw, Ginoo. Ug makita ko ang maong Adlaw nga nagsingabot na."

436 Makita n'yo nga nagasugod na kining mga Selyo, kung ablihan sa Dios ang mga Niini alang kanato. Hinumdomi, Siya lamang ang makahimo niini. Nakadepende kita diha Kaniya. Ang Dios magapanalangin kaninyo.

437 Ug karon sa pagtoo ko ang atong pastor adunay pulong alang kanato, nga isulti; o aduna siya'y isulti, diay, sa—sa inyo, sa dili pa kita magkita pag-usab karong hapon. Ug sa hunahuna ko ang panerbisyo . . . Ang kantahang panerbisyo sa mga alas sais-traynta, ba pastor? Ug kini. . . [Nagaingon si Igsoong Neville, "Magsugod sa alas sais-traynta."—Ed.] Alas sais-traynta. Ug kini. . . ["Ang mga pultahan abli na sa mga alas sais."] Ang mga pultahan abli na sa mga alas sais. Ang kantahang panerbisyo magsugod sa alas sais-traynta.

438 Ug kung kabubut-on sa Ginoo, akong pagahisgotan, karong gabhiona, ang hilisgutan mahitungod sa Libro nga Selyado-sa-

Pito-ka-Selyo. Ug dayon, sa Lunes sa gabii, ang mangangabayo nga nagasakay sa puti-nga-kabayo. Sa Martes sa gabii... Ang mangangabayo nga nagasakay sa itum-nga-kabayo, pagka-Miyerkules sa gabii. Ang abuhon na usab nga kabayo, ang luspada nga kabayo. Ug ang mangangabayo nga nagsakay na usab sa pulang-kabayo. Ug dayon paingon na sa ikaunom... ikaupat, ikalima, ug ikaunom, ug dayon sa Dominggo sa gabii. Sa sunod nga Dominggo sa buntag, mahimo tingaling buluhaton na sa pagpang-ayo. Wala ako mahibalo.

⁴³⁹ Karon hinumdomi, napahinungod na kita ngadto sa Ginoo, ang atong mga kaugalingon ug ang simbahan, alang sa buluhaton sa Dios. Ang Dios magapanalangin kaninyo.

⁴⁴⁰ Ako—usa ka oras akong misobra. Mapasaylo ba ako ninyo? [Nagaingon ang kongregasyon, “Amen.”—Ed.] Ako—dili ko, kita n’yo, wala ko tuyoa nga buhaton kana. Apan, kita n’yo, ako—makauban ako ninyo sa niining semanaha, dayon molakaw na pud ko. Ug wala pa ako mahibalo kung asa ako padulong; kung asa lang Niya ako dalhon. Ug gusto kong ipahinungod ang matag minuto niini nga mahimo ko, tungod kay gusto kong makauban kamo sa Eternidad.

Ang Dios magapanalangin kaninyo. Karon, Igsoong Neville. 

GINATAGO SA DIOS ANG IYANG KAUGALINGON
DIHA SA KAYANO, DAYON GINAPADAYAG ANG IYANG
KAUGALINGON SA MAO RA GIHAPONG PAAGI CEB63-0317M
(God Hiding Himself In Simplicity, Then Revealing Himself In The Same)
SERYE SA KAPADAYAGAN SA PITO KA MGA SELYO

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Marso 17, 1963, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org